

✓

1

APOLOGIA  
pro  
OBSERVATIONIBUS, ET HYPOTESIBUS  
ASTRONOMICIS

*Nobilissimi VIRI*

DN. TYCHONIS BRAHE  
DANI, Astronomorum sui seculi  
facile principis,

*CONTRA*

Vanas cujusdam MARTINI HORTENSII  
Delfensis criminationes & calumnias, quas in Præfa-  
tionem commentationum Præceptoris sui PHILIPPI  
LANSBERGII Middelburgensis, de motu terræ diurno  
& Annuo &c. confarcinavit.

*Veritatis amore conscripta & edita.*

PETRO BARTHOLINO K. DANO  
Theol. & Mathes. Stud.

*Cicero de Natura Deorum.*

Qui admonent amicè docendi sunt:  
Qui inimicè insectantur repellendi.



H A F N I Æ,

*Apud JOACH. MOLTKEN, Bibliopol.*

M. DC. XXXII.





Ad  
Candidum & intelligentem Lectorem

## PROOEMIUM.



Vandoquidem inter omnes artes & scientias, quas unquam humana excoluit ratio, nulla detur Astro-  
nomia præstantior, siue jucunditatē, siue utilitatē spectes, ut quæ non circa caduca hæc & momentanea, sed æterna quasi, & nullis alterationibus obnoxia versetur corpora, & quorum motibus, Annorum, Mensium & dierum (ut alia in præsentī taceam) pendent intervalla, quorum cognitione nulla unquam carere potuit Respublica, ut vel hinc summa Creatoris luceſcat siue potentia & majestas, siue sapientia infinita, quæ merito omnes mortales in admirationem & cultum sui rapere possint ac debeant: Ideo etiam statim ab ipso rerum conditu, ad hoc usq; tempus, reperti sunt homines, qui ejus cognitioni sedulam semper adhibuerint operam, non tantum ut ipsi certis mediis ea investigarent & cognoscerent, quæ aliàs à communi sensu essent remotiora; sed eadem etiam ad posteros transmittèrent. Hinc Josephus meminit, Sethum Adami filium, sideralem scientiam, & coelestium rerum cognitionem excogitasse, duasq; columnas excitasse, latericiam unam, lapideam alteram, & utriq; sua inventa insculpsisse, ne unquam ex hominum memoria dilaberentur. Et ita continuè serie, quasi per manus traditum & continu-

Psal. 19.  
v. 2.

lib. 1. Ant.  
jud. cap.

atum est Astronomiæ studium, usq; ad Abrahamum, qui, teste eodem Josepho, cum Ægyptiis, antea rei Astronomicæ ignaris, numerorum & siderum communicavit scientiam; Et hi vicissim cum Arabibus & Chaldæis. Quin & subsequentiæ secula non minori diligentia res Astronomicas tractarunt, in primis ubi erant Respub. benè constitutæ, quales in Græcia præcipuè: Illi enim, postquam ab Ægyptiis & Phœnicibus Geometriam & Arithmeticam, quibus tanquam scalis in cœlum ascendit humana ratio, acceperunt; mox etiam Astronomiam observationibus Chaldæorum qualitercunq; fundatam adjunxerunt. Verum, cum absq; successivis observationibus, & harum cum antiquis collatione, perennes siderum motus constitui aut determinari non possunt; ceperunt, præter alios, Timochares, & Hipparchus Rhodius, diversis licet temporibus, Alexandriæ in Ægypto, ubi maxima ad studia Astronomica tractanda se offerebat commoditas, observationes suas ad cœlum instituire; quæ tamen omnes, sicut & aliorum Artificum observata, planè intercidissent, ob crebriores Saracenorum in Ægyptum irruptiones, nisi Cl. Ptolemæus Alexandrinus, qui circa Annum Christi 130 floruit, eas singulari Dei beneficio collegisset, exq; iis cum suis collatis opus Astronomicum nobis reliquisset. Hunc secuti sunt alij Artifices, Aractæ in Syria Albategnius Mahumetes dictus; in Hispania Arzahel; in Germania Georgius Peurbachius, Johannes Regiomontanus, Waltherus civis Noribergensis, Nicolaus Copernicus Torunensis, & alij; qui pleriq; omnes Ptolemæum tanquam antesignanum quendam sunt secuti; licet interim aliqui eorum satis sensibilemprehenderint calculi ejus in Almagesto propositi, & apparentiarum cœlestium discrepanti-

am.

am. Neq; enim Nic. Copernicus in suis Revolutionum Libris aliquid singulare inventis addidit Ptolemaicis, præter hypothesin Universi, ad mentem Aristarchi Samij, & Philolai Pythagoræi conformatam; itemq; Theoriam Lunæ, & Eccentroræticis in Sole & Planetis nonnullis mutationem, inæqualemq; Æquinoctiorum anticipationem, ut sicetiamnum Astronomia Veterum, ut plurimum, inhæserit vestigiis.

Cæterum, quod in aliis artibus, id etiam in Astronomia contigit, ut à parvis initiis, perfectionem indies fortita sit majorem, maximè eam ob causam, quod postera ætas rectius de periodis siderum judicare possit, ut quæ cum pari temporis effluxu perpetuò congruant, Deo ordinis autore sic disponente.

Postquam igitur Tabulæ Alfonso (quæ à Ptolemaicis parum dissident) & Copernicæ deprehensæ sint hoc nostro seculo non amplius apparentiis coelestibus respondere, capit Nobilissimus Vir, Dn. Tycho Brahe Danus, hujus rei causas ab ipso cœlo diligenter inquirere, easq; invenit partim penes veterum observationes non satis accuratè habitas, partim penes refractiones, quæ faciunt, ut sidera Horizonti viciniora, justò videantur altiora. Has olim generatim quidem demonstrarunt optici Alhæzenus & Vitellio; sed in coelestibus ante Tychonem nemo observavit; id quod pater è lib. I. Progymnasm. pag. 15; & alibi apud eundem.

Porro, cum constet, nullas è cœlo, sive in planetis, sive fixis, satis præcisas acquiri posse observationes, nisi instrumentis justè cum magnitudinis tum fabricæ quis fuerit stipatus, qualia vetera illa minimè fuisse, satis ex ipso Ptolemæo lib. 3. Almag. cap. 2. apparet, ut & ex magnitudine & fabrica Parallitici Lignei Copernici, ad

Dn. Tychonem Anno Christi 1584 à Canonicis War-  
mienstibus transmissi, quod cum nullo è Tychonicis, si-  
ve fabricam, sive ejus usum quis respiciat, comparari  
potuit.

Atq; hæc causa fuerunt, satis, ut opinor, graves (ni-  
si quis defectentia Fixarum in cœlo loca olim ab Hippar-  
cho observata hisce addere velit) cur Illustrissimus Lan-  
gravius, & inprimis Nobilissimus Tycho Brahe, ad re-  
stitutionem Astronomiæ quasi natus, tandem de or-  
ganis sufficientis quantitatis & fabricæ sibi prospexerint,  
quibus observationes caperent certiores, ut quæ in di-  
versis organis intra pauculas minutias convenirent.

Vide A-  
strono-  
miam  
Mecha-  
nicam  
Dn. Ty-  
chonis  
Brahe.

Talibus instrumentis pluribus, iisq; diversis, No-  
bilissimus Tycho Brahe, insulam freti Danici Hvenam,  
observationibus cœlitus deducendis valde opportunam,  
ante annos 50 ita nobilitavit, ut in toto terrarum orbe  
nullus exter locus celebrior, id quod testari potuerunt  
complures, etiam è peregrinis, Reges Serenissimi & Prin-  
cipes Illustrissimi, qui hæc olim suis oculis, etiam cum  
admiratione, viderunt. Nec ociosus fuit ejusmodi in-  
strumentorum apparatus, aut visui saltim expositus, sed  
in usum ita directus, ut illis observationes, quâvis obla-  
tâ occasione, à sex, septem, aut pluribus studiosis, plerisq;  
rerum Astronomicarum, & inprimis observandi & cal-  
culandi peritiâ benè instructis, simul & semel possent in-  
stitui. Testes sunt plures Cometae illo tempore illucescen-  
tes, testes stellæ fixæ numero circiter mille, testis Sol &  
Luna, testes reliqui deniq; planetae, quorum omnium  
per 22 annos continuos quovis cœlo sereno extant ob-  
servationes accuratissimæ, in totidem observationum  
libros digestæ, qui si aliquando, quod speramus & op-  
tamus, lucem viderint, non modò admirandum Dn.

Tycho-



Tychonis Bratie in coelestibus Phænomenis observandis & calculandis probabunt curam & industriam, sed summum etiam in eo veritatis amorem, qui vix uni unquam instrumento, aut observationi fidebat, sed pluribus sibi mox succedentibus, idq; à pluribus stellis ad reciprocam probationem. Et ne quid veritatis cognitioni deesset, sæpius sua inventa cum Lantgravianis contulit, quemadmodum legere est in libro Epist. Astronom. multis in locis. Prætereo nunc, brevitatis causa, ingentes illas impensas, quas partim propriis sumtibus, partim regia munificentia adjutus, in tot tantorumq; organorum fabricam, arcis Uraniburgicæ structuram, plurium studiosorum alimoniam annuatim erogavit. Quæ certè omnia, talia tantaq; sunt, ut ob illa meritò, Astronomorum sui seculi princeps & Atlas, omnium rectè sentientium judicio celebrari possit ac debeat, utpotè cujus etiam jam defuncti fama in omnes mundi diffusa sit angulos, nec unquam obliteranda, quam diu hocce duraturum est coelum.

Atq; hæc, cum ita se habeant, satis demirari nequeo quorundam hominum sive φιλαυτίαν, sive invidiam, qui dum vel suas, vel aliorum falsò præconceptas opiniones, sub veritatis tamen specie aliis persuadeant, sibiq; nomen in vulgo concilient, non verentur aliorum labores summa cura & industria exantlatos, studiosis è manibus, cum summo Reipub. literariæ detrimento excutere, vel saltim suspecta reddere: Sed fallentur sua spe; premi enim potest, non opprimi veritas.

Non jam loquar de Scipione illo Claremontano Italico, qui ante aliquot annos, ut accepi, conatus est observata Dn Tychonis in argumento Cometarum & novorum cœli Phænomenon eludere, ut Aristoteli suam vindic-

vindicaret auctoritatem, sed quàm insulsè, patet ex Hyperaspiste Clariss. Viri, Dn. Johannis Kepleri.

Prover-  
bium.

Præfationem tantum Martini Hortensij adeamus, quam instructu & suggestione, ut apparet, præceptoris sui Lansbergij ediderat, statim visuri sumus, quàm invidiose homo iste exactissimas Dn. Tychonis observationes traducat, dum non tantum illas in dubium vocet, sed & hypotheses Luminarium super his extructas falsitatis arguat, iisq; Lansbergianas præferat, & sic *MORINO LEONI insultant lepores*, quasi per hos solos esset Astronomiam restituere; cum interim constet pleraq; illorum ex incertis veterum deprompta esse observatis; vel, ubi quid veri continent, maxima ex parte ex ipsis Tychonicis, paucis minutis pro suo instituto variatis, cujus nisi arassent vitulo, vix aliquid solidi attulissent; licet illa interim suo Quadranti & quidem unico asseribant, cui quantum fidei, in comparatione cum Tychonicis sic habendum, velè superioribus constare arbitror. Magnam proinde oportet esse hujus Hortensij malitiam, quòd ita velit in gratiam Præceptoris requisita illa, quæ incredibili sumtu, indefesso labore & nocturnis vigilis olim à Dn. Tychone in Dania sunt exantlata, tam superciliosè spernere & calumniari, proq; iis nobis incerta sua, & aliunde emendicata obtrudere, fortè quòd existimet illam discrepantiam, quam tamen ipsum cælum successu temporis satis arguet, ob exiguam organorum ad cæli immensitatem proportionem, dioptrarum variam dispositionem, visus quorundam (qualis proculdubio in sene Lansbergio) imbecillitatem, & similia, minus observabilem, ut proinde mirum non sit, si in aliquibus minutis observata non conveniant, quod tamen tantopore exagitat in Tychone, sed quo jure infra dispiciemus.

Cate.



Caterum ne tuâ, mi Lector, abuti velle videar æquanimirate, ad ipsam Præfationis Hortensianæ refutationem me accingo, ostensurus cum bono Deo, spiritum hunc Calvinisticum, pro suo genio, & calumniandi libidine, voluisse quidem aliquid observationibus, & Theoriis Nobiliss. Dn. Tychonis, sicut & Astronomiæ Danicæ Clariss. Longomontani detrahere; sed tamen nihil aliud effecisse, quàm suam malevolentiam, Præceptoris verò sui arrogantiam, & utriusq; imperitiam prodidisse, qui talium Astronomorum detractio, eorumq; laborum extenuatione sibi aliquam nominis celebritatem conciliare posse sperarunt: sed quàm longè ab illo suo scopo absint, in sequentibus intelligenti monstrabitur Lectori, idq; modeste & simpliciter, secus quàm facit Hortensius, siquidem.

*Ornari res ipsa negat contenta doceri.*

Manil.

Tu interim Vale candide Lector, rectoq; tuo iudicio  
veritati fave.

# MARTINI HORTENSII

## PRÆFATIO.

In qua Astronomiæ Braheanæ fundamenta examinantur; Et cum Lansbergiana Astronomiæ restitutione conferuntur.

### TEXTUS HORTENSII.



*Athematicas Disciplinas, Geometriam & Arithmeticam, Amice ac Benevole Lector; quatenus Rebus materiatis applicantur, discensibus summam Utilitatem, cum pari Voluptate adferre, in confesio est apud omnes. Videmus enim, quotquot iis operam navant, Mente conceptas, confestim ad Sensus & Praxin revocare; & pro abstractione à Materiâ, Rerum sensibilibus Dimensionem, unicè sectari: cùmque Subjectorum in quibus exercentur, magna sit varietas, alia aliis placere; & cuiq; pulchrum videri, quo maximè capitur, quodq; Vita instituto, rectius censet convenire. Tibi quidem, ex quo per Dei Gratiâ occasio facta est, in his Disciplinis (quibus ab incunnte Etate, haud mediocriter fui addictus) primam ducendi lineam: nulla unquam magis arrisit, quàm Astronomia. Hæc enim, quanquam in aliis latissimum Geometria & Arithmetica cernerem usum, & libatis omnibus, cum Animi ac Vita Proposito conferrem; Subjecti nobilitate, & peculiari suavitate, sic videbatur reliquas antecellere, ut nihil præstantius, nihil jucundius reputarem, quàm duabus illis Platonis alis in sublime ferri, Sydera ad Normam expangere, & mirabilia Dei Opera, seu coram intueri.*

*Totus ergo in Astronomiam propendens; cùm à propriâ Industria, Librisq; auxilium petere cogerer (quippe privato studio*

*cam*

eam aggressus,) tantum successive autodidax & profeci; ut post hoc variaz  
delibata Elementa Spharica; cognitionem Syderum, Termino difficul-  
rum usum, & supputationem Problematum Primi Mobilis (sola tates in-  
Doctrinā Triangulorum, & publicis D. SNELLII Lectionibus studio A-  
hausta) mihi fecerim familiarem. Post, ubi ad Theorias Pla- strono-  
netarum Animum ac Studium appuli; tanta se obtulere impe- mico ab  
dimenta, quantus initio aderat ardor. Nam qualicumq; dili- Autorib.,  
gentiā prastantissimorum Artificum Scripta scrutabar; quia maximè  
carebam Præceptore, Rem omnem à fundamento solidè intelli- Tycho-  
gente; qui caligantem in quibusdam obscurioribus, adjuvaret: ne obje-  
nunquam eò potui pervenire, ut Apparatum Demonstrationum, ctaz.  
& quomodo ex Observationibus deducantur, in diversis Auto-  
rum Hypothesibus; ex voto assequeretur.

Hinc, cepit obrepere tedium, & lentior impetus ad expu-  
gnandam hanc Arcem: qui pænè irritum fecisset, quicquid in  
Astronomicis desudaram; ni singulare & inexplebile deside-  
rium cunctantem revocasset, & per varios Opinionum fluctus,  
paulatim reddidisset peritiorē. Consultis enim Theoriis Rein-  
holdi, Scriptis Tychonis Brahe, ac Discipulorum: mox Coper-  
nici & Ptolemai; etsi non perfectam Artis ideam, ob multa ut  
dixi dubia; mediocrem saltem Theoriarum, præsertim Solis ac  
Luna, & Compositionis Tabularum, proprio Marte acquisivi.  
A Tychone autem, aliisq; recentioribus Astronomis, à quibus  
sufficientem Theoriarum explicationem expectabam, præter  
solum Calculi usum, nihil obtinui. Rationem enim Observandi,  
& Demonstrationes Observationibus superstruendi, aut non ad-  
dunt; aut nimia brevitate ita involvunt; ut nisi quis solidam  
adferat Astronomie peritiam, nequeat se iis extricare. Itaq; sa-  
tius duxi, Tabularum usum nostro seculo congruum ab his pete-  
re, quàm non sine magnâ temporis jacturâ diutius in incerto  
vagari.

Ptolemaicum quidem & Copernicum, etsi plenariam Artis

*Institutionem, Libris suis comprehendisse, satis viderem; tamen aut minus frequenter adibam, aut quo digni sunt loco, non habebam. Illius causa, erat partim Rei difficultas; partim, vada subinde occurrentia; quibus idoneo Duce destitutum, non mirum erat, aliquandiu sine spe liberationis inherescere. Hujus, perversum de iis Judicium, hinc solummodo conceptum; quod apud Tychonem, aliosq, identidem reperirem, Veterum Observationes esse erroneas; Instrumenta non satis præcisè divisa, & Modum observandi illegitimum; Copernici numeros Cælesti Normæ incongruos &c. Suas contra Observationes, accuratissimas atq, incomprabiles; Instrumenta exactissima, & in magnâ copîâ; Calculum certissimum, & Cælo adamussim congruentem. Quid n. homini sciendi cupido faciendum erat, Amice Lector, nisi ut totus in has partes transiret, & pro vexis ac certis arriperet, quæ à tantis Viris plenis laudibus efferebantur? Tractus igitur in consensum, Ptolemaeum & Copernicam deferrebam quasi inutiles, solum Tychonem approbabam; & omisso pleniore examine, ex productis Exemplis fidem Calculi aestimans, securè ejus Tabulis acquiescebam.*

*Sic periit Annus unus atq, alter, dum perditum reor, quicquid opere in Lectionem Ptolemai & Copernici impendo; & Calculo Tychonico inharens, insuper habeo, quod ab illis observatum, Posterisque relictum est. Dudum enim persuaseram, Tychonem Observationibus suis, in Sole, Lunâ, Fixis, aliisque Planetis, eo pervenisse; quò unquam humana industria potest assurgere: neq, aliunde aut petendam, aut sperandam Astronomie institutionem: ideoque de prioribus Difficultatibus, quæ semper objecta fuerant, minùs sollicitus; diem ex die trahens, tertium jam consumebam Annum, sine spe, perfectam ac solidam, unquam obinendi Astronomie Cognitionem.*

*Tandem verò (quæ mea fuit felicitas) Middelburgi in Zelandiâ degens, cum ope Doctissimi D. Isaaci Beccmanni, Scho-*

la Dordracena Moderatoris, in noticiam & familiaritatem venissem, Reverendi Viri, D. PHILIPPI LANSBERGII; quem in restituendâ Astronomiâ inde à multis Annis occupari sciebam; commodam nactus sum occasionem, Studium Astronomicum perficiendi. Hic enim (ubi profectum meum, & de recentioribus Astronomis opinionem ei exposuissem) pro summâ suâ Humanitate tantum communicavit, ut de solidâ Astronomia Cognitione obtinendâ, non dubitarem; præsertim cum non desisteret quarentem indies docere, dubitanti viam monstrare tutam ab erroribus, & (quod vix ausus fuisset sperare) Instrumentorum, Scriptorumq; copiam facere: adeo ut quem apud alios frustra quaesiveram, apud eum purissimum invenirem Veritatis Solem.

Resumpsi ergo Animum, & manu ducente Viro Doctissimo feliciorẽ viam ingressus; vidi, non tam exquisitas esse Tychonis Observationes, quàm vulgò habentur: Motum Solis ac Luna, & loca Fixarum, non tam exactè Cælo congruere, atque hætenus toti Mundi Authoritate suâ persuasit. Ipsum deniq; etsi in rejiciendis promiscuè veterum ac recentiorum Astronomorum Observationibus promptissimum, vix quicquam dignum præstitisse eo strepitu; quem in Astronomicis excitavit.

Sed ne verbis tantum agam, Lectori benevolo aliquem Profectus mei, Humanitatisque D. Lansbergii, fructum apponam. Revocabo enim totam Tychonis Astronomiam ad examen Veritatis, ut quilibet in posteram talem ei locum concedat, quali apud intelligentes & sincero judicio præditos, cernet habendam. Quod non ita intellectum cupio, quasi Honori D. Tychonis quicquam detractum velim: neque enim eâ sum Animi protervia, ut instantum Virum ardore contradicendi, aut inanem captandi gloriolam, insurgam; quem non solum

*antehac, maximo semper affectu profectus sum, sed etiamnum veneror, licet manifesta à Cælo discrepantia, vel invitum ab Observationibus ejus coegerit recedere.*

#### REFUTATIO.

**I**N his verbis, quibus Hortensius magna Orationis ubertate aditum sibi parat ad Astronomiam Tycho-  
nicam examinandam, hæc præcipuè observationem aliquam merentur.

1. Propria commendatio à studio Mathematico, Astronomico verò inprimis.

2. Quærela ejus de infructuoso Labore, quem in Astronomiam cum veterum, cum Tychonis maximè, impendit.

3. Nimia ejus felicitas in eo, quòd Lansbergium natus sit Præceptorem.

4. Descriptio profectus ejusdem sub Lansbergio facti, quo jam totam Tychonis Astronomiam ad Veritatis examen revocare possit & velit, ut omnes intelligentes & sincero judicio præditi cognoscant, qualis ei in posterum sit concedendus locus, nihil interim honori ejus detrahens.

Quæ singula jam ordine nobis sunt excutienda, ut Dn. Tycho-  
ni contra ejusmodi Calumnias sua constare possit integritas & Existimatio; observationibus ejus à se, & Cl. Keplero in Tabulis Rudolphinis permissu Hæ-  
redum editis; aut aliis, deinceps edendis, sua certitudo & veritas: Ne unquam Astronomia Tycho-  
nica, vel etiam Danica, quam genuinus ejus per decennium discipulus M. Christianus S. Longomontanus, ante totidem annos elaboravit, è manibus Studiosorum excutiat-  
ur, inq; ejus locum commenta Lansbergii vana substi-  
tuantur, quod in hac sua præfatione intendit Hortensius.



1. Igitur quod attinet, optandum quidem foret, complures talem studiis Astronomicis impendere operam, qualem de se prædicat Hortensius, rectè ejus cum præstantiam, tum jucunditatem æstimans, nisi lateret anguis sub herba.

2. Quòd verò triennium integrum in evolvendis scriptis Astronomicis & imprimis Tychonicis, absq; ullo singulari fructu trivisse se asserat, præcipuè eam ob causam, quòd Autores isti rationem observandi, & demonstrationes observationibus superstruendi, non satis exposuissent: Id satis non tantum retundit horum Autorum in relictis Exemplis industria, de quâ prolixè omnes intelligentes testari poterunt; sed simul Hortensii arguit in observando imperitiam, quæ hujus difficultatis vera causa existit, cujus rationem oportuit ipsum prius didicisse, quàm observationum censuram sibi arrogasse. Neq; enim hic sufficit Arithmeticam & Geometriam novisse, sed praxi in observationibus capiendis, censendis, & ritè applicandis opus est, quam an rectius olim Dn. Tycho, an tuus, Hortensi, Lansbergius tradiderit, te etiam tui Belgæ, (& qui cum eis degit Cl. D. Johannes Pontanus) Doctis. Hadrianus Metius, Solertis. Wilhelmus Jansonius Cæsius, docere poterunt, ut vel tandem desinas tanti viri famam propriâ infamiâ rodere.

3. Felicitatem Hortensio suam, quam relictis aliis præstantibus Astronomis, in solius Lansbergii collocat institutione, libenter gratularer, nisi vanam existimarem, prout ipsemet suo tempore cognoscet, ubi rigorosum hoc ejus Examen in fumos abire senserit.

4. Deniq; Quòd velit Hortensius ad probandum sui profectus & humanitatis Lansbergii fructum, non particulam aliquam, sed totam Tychonis Astronomiam,  
ad

ad Examen veritatis revocare, ut quilibet in posterum talem ei locum concedat, quali apud intelligentes & syncero judicio præditos cernet habendam, id ipsum magis animo dixisse fastuoso, quàm ingenii viribus præstare potuisse, & docti norunt, & sequentia evincunt. Quòd v. addit hæc non ita intelligenda, quasi honori Dn. Tychoonis quid veller detractum, id subdole facit: jam enim prius dixerat: Tychoonis observationes non esse exquisitas, Motum Solis & Lunæ, Locaq; Fixarum cœlo non congruere, nihil dignum præstitisse tanto strepitu, quem in Astronomicis excitavit; Et mox: manifestam observationum ejus à Cœlo dari discrepantiam; Quod annē sit honori tanti viri detrudere velle, judicent eruditi: Et sic callidus homo novit uno ore sufflare calidum & frigidum, benedicere & maledicere, quod petulantis & indomitæ linguæ est indicium, teste Apostolo Jacobo, cap. 3. v. 8. & seq. Et interim hoc manet firmum; nullam in hoc Hortensio tantam dari dicendi facultatem, quæ quicquam honori tanti Astronomi apud viros cordatos detrudere possit, ut jam porro dispiciemus.

TEXTUS HORTENSII.

2.  
Elevatio  
Polo Ura  
niburgici  
incerta.

**P**rimò enim, animadverti Tychonem Brabe circa Elevationem Poli, quæ Basis est ac Fundamentum Observationum Cælestium, nihil certi obtinuisse. Nam Tomo 2. Progymnasmatum, pag. 124. assignat Uraniburgo Alitudinem Poli, 55 gr. 53. scr. ex propriis inventis: quàm Epistolarum Astron. pag. 40 & 53, tam ex ipsâ Stellâ Polari, quàm cæteris Circumpolaribus, multoties comprobata, statuit 55 gr. 54 $\frac{1}{2}$  scr. & Tomo 1. Progym. pag. 28. 55 gr. 54 $\frac{1}{2}$  scr. pag. 218. 55 gr. 54 $\frac{1}{2}$  scr. Postea, Christianus S. Longimontanus, Astronomia Brahamæ per continuum decennium sectator; & hoc tempore Professor Mathematicum in Academia Hafniensi: Astron. Danicæ pag. 43. eandem

dem fecit 55 gr. 54  $\frac{1}{2}$  scr. sed in Catalogo Locorum illustrium, duntaxat 55 gr. 54 scr. Ac tandem, Vir Celeberrimus, Joh. Keplerus, trium Caesarum Mathematicus, 55 gr. 55 scr, in Catalogo Civitatum, Tab. Rudolphi: quantam etiam D. Lansbergius ex quamplurimis Tychonis Observationibus inter se collatis, deprehendit. Ex quo dissensu manifestum est, Elevationem Poli apud Tychonem, vel intra unum scrupulum adhuc in ambiguo versari: quam tamen, cum debuisset certò cognitam habere, norunt, quotquot hisce Sacris operantur.

#### REFUTATIO.

**I**n ipso hujus Examinis vestibulo Hortensius suam prodiit cum in Præceptorem Lansbergium nimiam observantiam, cum pari in Tychonem, quem sibi Adversarium delegerat, invidia; tum rerum Astronomicarum, & inprimis observationum cœlestium ritè administrandarum, & æstimandarum (ut de *φαινόμενα* proculdubio ipsi à Lansbergio inspirata nihil dicam) imperitiam; absq; quibus si fuisset, nunquam, tantà temeritate, in tantum Astronomum, cum quo non Lansbergius, nedum ipse ullà ratione poterit comparari, infurrexisset. Sed discursum ejus de Poli Uraniburgici Elevatione examinemus. Sic infert: Qui Elevationem Poli loci relinquit incertam, is quoq; nihil certè observando assequitur, cum hæc observationum Basis esse debeat. At id Tycho fecit Uraniburgi in Dania. Ergo &c.

**R.** Propositio non est Universalis; Nam & Fixarum ab invicem distantia, unde illarum loca etiam investigantur, observari poterunt sine Elevationis poli loci cognitione. Assumptio planè falsa est: Nam licet per exigua in allatis Exemplis appareat discrepantia: Ea tamen Poli Uraniburgici Elevatio est, quam Tycho accuratissimis suis observationibus lib. 1. Progymn. p. 28. &

218. advenēerat 55. gr. 54 $\frac{1}{2}$  min. quā etiam in Luminariū  
 restitutione, libro eodem, & stellarum altitudinib. meri-  
 dianis lib. I. Epist. Astron. pag. 40. & 52. ac alibi, crebrō u-  
 sus est. Nec est, quod quisquam miretur ejusdem poli  
 Elevationem, in observatione Cometæ Anno 1577. duo-  
 bus fermē minutis, assumtam esse justā minorem, cum  
 etiamnum destitueretur Dn. Tycho Organis sufficienti-  
 bus, qualia postea fabricari, & in certo insulæ istius loco  
 firmari fecerat: cum idem etiam acciderit magno illi  
 Copernico, qui Elevationem Poli Fruenburgici in Bo-  
 russia 2 $\frac{3}{4}$  m. assumserat minorem justō, ut legere est apud  
 Tychonem lib. I. Progym. p. 34. & 35. Idem contigit Illu-  
 strissimo D. Wilhelmo Lantgravio Hælsiæ, qui Cassallis,  
 Elevationem Poli invenit, primò 51. gr. 18. min. mox 51.  
 gr. 20. min. tandem 51. gr. 19. min. Lib. I. Epist. Astron. p. 39.

Porro, quod Cl. Longomontan<sup>9</sup> Astron. Dan. p. 43. ean-  
 dem Poli Uraniburgici Elevationē assumat 55. gr. 54 $\frac{1}{2}$  m.  
 saltem  $\frac{1}{4}$  unius minuti minorem; istius rei rationē ipse  
 met à Parallaxe<sup>s</sup> Solis diminutione, ibidem reddit.  
 Quod vero ejusdem Poli Elevatio, in Tabulis locorum il-  
 lustrium Astron. Danicæ, uno minuto, dissideat ab eā,  
 quæ est in Tabulis Rudolphinis Cl. Kepleri, facit extre-  
 mæ præcisionis utrobique; neglectus, dum minutia<sup>s</sup> secun-  
 dæ omittuntur.

Si jam Lansbergius dictam Poli Uraniburgici Eleva-  
 tionem, rectius ex observationibus Tychonicis, quā  
 ipse Tycho, demonstrare poterit esse 55. gr. 55. min.  
 quemadmodum præpostero suo judicio affirmare non  
 veretur Hortensius, contra tantam Dn. Tychonis indu-  
 striam, quam lib. I. Progym. dictis locis abundè probat:  
 Næ, & nos ex observationibus Lansbergii, si quas alicu-  
 jus accuratioris nobiscum communicare velit, idem præ-  
 stabi-

stabitur circa Elevationem Polorum Goësæ & Middelburgi, quam ominor non utrobiq; parem, nec minorem 51 gr. 32 min. ut ita declinatio Solis non sit Tychonicâ minor evasura, de quâ mox dicendum.

Dijudicent jam cordati Astronomi, Hortensii, an hic aliquid autoritatis observationibus Tychonicis sit detractum, an non potius ipsemet, imperitiâ & malevolentia, ut apparet, inductus, calumniandi causam quaesiveris, ubi nulla erat? Sed pergamus.

#### TEXTUS HORTENSII.

**S**ecundo: Maximam Solis declinationem, non ex aliorum modo, sed & ipsius Braheii observationibus, cognovi nostro seculo non esse 23 gr. 31 $\frac{1}{2}$  scr. sed tantum 23 gr. 30 scr. Nam Joh. Regiomontanus, sumus ille Mathematicum in Germaniâ Instaurator; deprehendit Tropicorum Distantiam apparentem 46 gr. 56 sc. sed correctam per Parallaxin & Refractionem 47 gr. proximè: ut verâ Zodiaci Obliquitas fuerit 23 gr. 30 sc. quâ etiam in Tabulis suis usus est. Similiter, Illustrissimus Princeps, Guilielmus, Hassia Landgravius, per proprias Observationes, non minori diligentia quam apud Tychonem institutas; invenit maximam Solis Declinationem, proximè 23 gr. 30 scr. & Doctissimus D. Lansbergius, Observatione accuratissimâ 23 gr. 30 $\frac{1}{2}$  scr. quam etiam propriâ Experientia, postquam in notitiâ ejus veni, veram deprehendi. Observavimus enim, An. 1629, Altitudinem Solis in Solstitio Æstivo, per amplum Quadrantem, 61 gr. 58 $\frac{1}{2}$  scr. cui addita Parallaxis i. scr. 4. sec. dat Altitudinem veram 61 gr. 59. scr. 19. sec. à quâ rursus deducta Altitudo Equatoris Middelburgensis 38. gr. 29. scr. relinquit Obliquitatem Zodiaci 23 gr. 30 scr. 19. sec. Ex quo apparet, maximam Solis Declinationem, non modo Tychonicâ 1 $\frac{1}{2}$  scr. minorem esse: verum etiam nunc accrevisse, quæ ex Sententiâ aliorum adhuc decrevit.

Verum quia multi Authoritate Tychonis inducti, nec Regio-

3.  
Maxima  
Solis de  
clinatio  
major v  
râ assun  
ta à Ty  
chone

montani, neq; Landgravii, neq; D. Lansbergii, multò minus nostra cum eo Observationi acquiescent: mox evidentè ostendam, maximam Solis Declinationem Ætate Tychois, haud fuisse majorem: Argumento in hanc rem ex propriis ejus Observationibus productò, cui nemo fidem ulla ratione poterit derogare. Id mihi hoc loco adferre promptum esset, sed quia etiam alterum errorem in Observatione Luna secum trahit; malui patientiam Lectoris deponere, quam intempestivè hic referre.

#### REFUTATIO.

**Q**uandoquidem Hortensius quadruplici hic conetur probare Autoritate, maximam Solis declinationem, seu Eclipticæ obliquitatem, hoc nostro seculo non esse 23 gr. 31½ min. ut voluit Tycho; sed tantum 23 gr. 30 min. ut statuit Lansbergius, ideo illas etiam breviter examinemus:

1. Regiomontanum quod attinet, vel ejus discipulum Waltherum Noribergensem; Quia Elevatio Poli Noribergensis, quam Dn. Tycho lib. I Progym. pag. 47. & 48. artificiosè invenit 49 gr. 26 min. uno minuto minor sit eà, quam Andreas Schonerus assumsit; ideo subtracta Inclinatione Æquatoris 40 gr. 34. min. à verà altitudine Tropicæ Æstivæ, quam Waltherus observarat 64 gr. 5 m. relinquitur declinatio Solis maxima 23 gr. 31 min., quæ tunc temporis minima fuit, à Tyconica dimidio saltim minuto deficiens, quæ proinde nihil contra ipsum concludit.

2. Quòd idem velit probare ex observationibus Landgravii Hortensius, declinationem scilicet Solis maximam esse 23 gr. 30 min. proximè, in eo fallitur & fallit.: Nam eodem libro, eademq; pagina 47.; ut & lib. I. Epist. Astron. pag. 59. ex observatione Rothmanni, evadit dicta declinatio Solis maxima 23 gr. 31½ min. Tyconicæ quam



quàm proximè conveniens. Quin & ipse Rothmannus manifestis verbis hanc Hortensii assertionem refellit, lib. 1. Epist. Astron. pag. 82. ; ita inquires: Inveni (Anno 1587) proximo Solstitio æstivo, maximam Solis Altitudinem meridianam exactè (Casellis) 62 gr. 11 min. diligentissimè ; unde additâ Parallaxi Solis, & assumptâ verâ nostra Equationis Elevatione 38 gr. 41 min. tua (Tychonis) Zodiaci obliquitas (23 gr. 31½) resultat. Legantur insuper Cl. Willebrodi Snellii, in observationes Lantgravianas Annotationes, pag. 88. seqq.

3. Licet vel maximè Hortensii relationi de maximâ solis Altitudine 61 gr 58½ min: in Solstitio æstivo, per amplum quadrantè observatâ, fides esset habenda ; tamen, quia nec de Poli loci istius Elevatione, nec de distantia Solis à Terra Lansbergiana, quâ Parallaxin suam minuit, satis constet ; ideò illi acquiescere tutum non existimamus. Quin & valde Lynceus est hîc Hortensius cum suo Lansbergio, qui ex unica hac observatione & quidem per unicum quadrantem habita, perspicere poterat primus & solus obliquitatem Eclipticæ jam accrevisse 19 sec. dum alii illam decrescere existiment: sed miserabilem hunc oportet esse Astronomiæ restauratorem, qui ex unica observatione illam restituere præsumit.

Cœterum, & hic placebit, vel ex ipso Lansbergio ostendere, quàm verè ille, pag. 4. Progym. suorum Astronomiæ restitutæ, obliquitatem hanc investigarit: ibi siquidem maximæ (si modò maximæ) solis Altitudini æstivæ in meridie observatæ, detrahit ½ min. Et in minima Altitudine 15 gr. adimit Refractioni Solis 1½ min. qui defectus utrobique, si adjectus fuerit, evadet declinatio Solis maxima, ex ipsius Lansbergii observatis, major 23 gr.

31 min. parallaxi Solis ejusdem ubiq; retentâ : ut nihil jam dicam de ipsis observationibus , quæ non in ipsis Tropicis punctis, sed ultrâ citraq; habitæ sunt.

4. Promittit quidem Hortensius se ex observationibus Tychonicis evidenter ostensurum, declinationem Solis maximam, ætate Tychonis, non fuisse majorem 23 gr. 30 min.: sed cum ipsemet hoc suum promissum suspendat, propter alium, quem eadem ex causâ comminiscitur in observatione Lunæ, errorem; Et nos responsum tantisper differemus : ostensuri interim etiam hoc loco, quid veri insit ejusmodi effatis Hortensianis, idq; ex accuratissimis Dn. Tychonis observationib., quas juxta utrumq; Tropicum, duobus, & interdum etiam tribus maximis & elaboratissimis Quadrantibus Uraniburgi in Dania habuit, easq; ex Astron. Dan. Cl. Longomontani, lib. I. Theor. pag. 45, huc transcribemus.

Juxta Tropicum Æstivum Anno Dom. 1586. d. 12 Jun.

Altitudo Solis meridiana, 57 gr 35½ min.

Juxta Tropicū Hybernū, Anno Dom. 1594. d. 11 Dec.

Altitudo Solis meridiana, 10 gr. 41 min.

Verum, utraq; observatio à Puncto Tropico remota erat triente unius diei ; ideo, major augenda erit 4 sec.; minor verò totidem minuenda, ut sic Altitudo maxima evadat 57 gr. 35 m. 40 sec.; minima 10 gr. 41 min. 6 sec. Jam si Parallaxis Solis Tychonica 1 min 33 sec. Æstivæ addatur, fiet illa 57 gr. 37 min. 13 sec.; sic si minimæ adjiciatur Parallaxis 3 min. 3. sec.; at refractio 9 min. 40 sec. juxta multiplicem Tychonis experientiam, eidem adimatur, evadit illa 10 gr. 34 min. 29 sec., quæ à priori ablata, relinquit Tropicorum distantiam 47 gr. 2 m. 44 sec. & ideo declinationem Solis maximam 23 gr. 31 m. 22 sec. At si jam Parallaxis Solis Tychonica, quæ hic utrobiq; assumi-

sumitur, esset justo' major, minorem etiam relinqueret declinationem Solis maximam, quod notandum.

Porro, quoniam Elevatio Poli Uraniburgici jam ante inventa est 55 gr. 54 m. 40 sec.; & sic obliquitas Æquatoris 34 gr. 5 min. 20 sec.: ideo si hæc maximæ Altitudini Solis 57 gr. 37. min. 13. sec. subtrahatur, relinquitur declinatio Solis maxima 23 gr. 31. min. 53.: ut siue hanc ad priorem limitare volueris; siue Parallaxin Solis paululum imminuere, ut in altitudine 57 $\frac{1}{2}$  gr. sit 1 $\frac{1}{2}$  m. nunquã obliquatio Solis maxima, ex hisce alijsq; certissimis Dn. Tychonis observationibus, minor est evasura, 23 gr. 31 $\frac{1}{2}$  min., quantam & ipse Dn. Tycho lib. 1. Progym. & alibi in Epist. Astron. passim reliquit.

Dijudicent jam rursus intelligentes, Hortensi, anné & hic in proprium retorqueri possit jugulum, quicquid in Tychonis, de declinatione Solis maxima, constitutionem voluisti Vibratum, & anné tuus Lansbergius, dum illam justò minorem assumat, fundamentum veræ Astronomiæ evertat?

#### TEXTUS HORTENSII.

**T**ertio: in Observationibus Æquinoctiorum, inveni Tychonem à seipso non semel dissentire. ipse n. teste Clavio in Apol. 4. Tychonis  
pro Calend. Romano, ad Scultetum scripsit, Æquinoctiū Vernale à seipso  
Anni 1586, contigisse Martii die 10 hor. 9 scr. 2. à Mer. sed Tom 1. dissensus  
Prog. p. 13, posuit hor. 9 scr. 8, interveniente differentiâ scrupulorum 6: quod, ne aliorum tantum relationi insistamus, etiam in obser-  
ab ipsâ Observatione comprobabimus. Nam Christianus S. Longi- vatione  
gimontanus, Astron. Dan. Parte 2. p. 43. assignat Soli Altitudinē Æquino-  
meridianam ad diem 11 Martij, ex Observatione Tychonis, 34 gr. 18 scr. 30 sec. Refractio tollit 42 sec. Parallaxis addit 2 scr. 30 sec. tionum.  
ferè: fuit ergo vera Solis Altitudo, 34 gr. 20 scr. 18 sec. Elevatio  
Æquatoris, quâ Tycho tunc utebatur, 34 gr. 5 scr. 20 sec. ergo De-  
clinatio

*clinatio Solis Borea 14 scr. 58 sec. quam Sol peremeavit horis 14 scr. 58: qua de die integro ablata, relinquunt Tempus Equinoctii, die 10, hor. 9, scr. 2. planè uti Tycho ad Scultetum scripserat; est ergò hîc dissensus scr. 6.*

*Simili examine in Equinoctio Autumnali 1586, ex assignatâ Altitudine Solis Meridianâ apud Longomontanum, instituto, invenitur illud contigisse, die 13 Septembris, hor. 3, scr. 24: cùm Tycho habeat hor. 3 scr. 38. differentiâ existente scr. 14: quæ longè tolerabilior est dissensibus inter Equinoctia reliqua. Hac enim si examines ex Altitudinibus Longomontani, videbis differentiam subindè exurgere ad sequi horam. Quod ut in tantis Astronomi Observationibus non est ferendum; ita nobis magnam movit suspicionem, immò quasi manibus palpandum dedit, neq; Solis, neq; Luna Motum, ab ipso bene esse restitutum; quod & sequentia manifestè docebunt.*

#### REFUTATIO.

**P**Rogreditur nunc Hortensius ad Tychonicas Equinoctiorum, observationes examinandas, & positum in Sole Fundamentum evertendum, idq; ut, assequatur, non tantum incomparabilis Astronomi, Dn. Tychonis Brahe accuratissimas observationes calumniis (quibus rotas novem complet paginas) proscindit, sed iisdem etiam cruda veterum observata, variis ob Organorum imperfectionem, & Refractionum neglectum scatentia vitiis præfert, ut sic malam suam & Lansbergii causam palliare, Dn. Tychonem, & Cl. Longomontanum [à quo etiam meritam expectasset retorsionem, nî celeb. ille vir ejusmodi calumnias, quas novit apud intelligentes nullum habituras pondus, contemneret; & rectius bonas horas, quàm in ejusmodi nugis refellendis, collocare nosset] traducere, eorumq; observationes, saltē, apud imperitos, suspectas reddere possit. In hunc igitur Hortensij

tensij hortum jam sumus exspatiaturi, præcipuas criminationum herbas evulsuri, ne sua graveolentia infirmiorum turbent cerebrum; nec enim sanis & Astronomiæ peritis exinde aliquid metuendum periculi.

Initio igitur, discrepantiam illam Æquinoctiorum ex observationibus Tychonicis proveniente, quod attingit, illam multis excusare, apud eos præsertim, qui praxi observationum Astronomicarum sunt assueti, non videtur necessum, cum ipsimet satis norint differentiam 14 min. in tempore, non constituere  $\frac{7}{8}$  min. in motu Solis, quæ ex Altitudine vix est deceptibilis; de qua re legatur Dn. Tycho lib. 1. Progym p 28. & Cl. Longomontanus lib. 1. Theor. Astron. Dan. pag. 43. ut vel hinc judicium fieri possit de nimia Ph. Lansbergij scrupulositate, qui in exemplis Progymn. ipsius insertis, Æquinoctia tam præcisè novit determinare, ut ne in uno secundo differre videantur; qua re, ut imperitis fortè imponere possit, sic apud exercitatos non tam facilem meretur fidem; ipsi siquidem satis norunt tam exquisitam præcisionem esse impossibilem. Quod verò addit Hortensius, de differentia subinde ad sesquihoram in Tychonicis exsurgente, si ex altitudinibus Longomontani lib. 1. Theor. Astr. Dan. pag. 43. & seq. examinentur, id commentum est superioribus simile; neq; enim ulla observatio in dictis locis ultra 2 m. integra variat, præter unicam quæ undecima est, in Annum 1596. incidens, de qua legatur pag. 105., secundæ part. Astr. Dan. Ex hisce paucis benevolo Lectori æstimandum relinquo, quid sentiendum sit de iis, quæ tam præpostero judicio, de Solis & Lunæ motu non satis benè à Tychone restituto, subjungit Hortensius; de qua re pluribus infra.

TEXTUS HORTENSII.

5.  
Motu So-  
lis Tycho-  
nicus er-  
rori ob-  
noxius:

**N**am ipsius Motus Solis, haud minimo errori obnoxius est, tum ob dictas causas, tum quod multa observare neglexit, quæ erant necessariò observanda: inter quæ primas faciliè obtinet, Distantia Solis à Terrâ, & hinc consequens Parallaxis. Illam Tycho Brahe non conclusit è certis Observationibus; sed ex Numerorum Mysteriis, & Symmetriâ Mundanorum Corporum, ex libello quodam Jofranci Offusii, pro lubitu & propriis Animi Conceptibus collegit: & (quam Geometricè demonstrare debebat) mediam ut sæpe aliàs, inter Ptolomaum & Copernicum præsupposuit; atque ita Observationibus Eclipsium, & Apparentiæ in Motu Solis, putavit satisfacere.

Neg, Christianus S. Longomontanus, quanquam Observationibus ipsius instructus veriore attulit. Cum enim parte 2. Astr. Dan. pag. 112. ex Distantia Luna Tyconicâ & Observatione anguli, quem facit Semidiameter Orbis Luna ad Solem; certius ut vult, unicè per hoc medium, Ptolemaicâ nonnihil majorem concludit, incertam per incertiora querit. Cum verò pag. 170, per hanc, suppositam non demonstratam Solis Distantiam Geometricè inquirat Semidiameterum Umbra; per quam regressu factò, licet colligere Solis Distantiam: proprius Dedomenis, & processui per Calculum repugnat. Inventam enim Umbra Semidiameterum 48 scr. 34 sec. deminuit scr. 4 sec. 24, ut sit tantum 44 scr. 10 sec. idq; ob Anomaliâ quandam à se in Daniâ animadversam; quæ ob Refractionem Radiorum Solarium in Aere, Umbra Terra per diversa loca diversimodè extenuet, & veram Distantia Solaris Dimensionem ubiq; inturbet. Demonstrationem insuper, quâ Hipparchus & Ptolemaus in hoc negotio usi sunt, planè rejicit; ut qui nunquam veram Semidiameteri Umbra, ad Semidiameterum Terre Proportionem, potuerint invenire; impediti hac occultâ Umbra Anomaliâ: cum tamen, hoc medium unicum sit, per quod trium maximorum

Mun-



*Mundi Corporum Distantiam ac Proportionem, certo liceat concludere; ut optimè nos docuerunt veteres illi Astronomi Antistites.*

*Sed nisi Longomontanus, certissimâ Demonstratione ostenderit, Semidiametrum Umbra hanc Anomalium subire, per omnia Loca & Tempora, frustra est, & merum videtur querere effugium vitiis suarum Hypothesum: cui tantum abest, ut Experientia ferat suffragium, ut quamplurima contra Eclipses Lunares, in diversissimis Regionibus prorsus eadem Quantitate conspecta, contrarium inferant. Quod & ipse non videtur dissimulare, dum pag. 173. Partis 2. Astr. Dan. investigatâ verâ Umbra Semidiametro, fatetur; se Attenuationem Umbra ex inaequalitate Aeris spissioris circa diversorum Locorum Horizontes, aestimaturum; nihil ferè etiamnum firmum; & quod ordinariam mutationem subit, invenisse. Et rursus pag. sequenti, Variationem Semidiametri Umbra, non usq; adeo per Observationes diversorum Astronomorum sensibilem fuisse; ob rapidum Aerem non multum sibi inaequalem. Si ergò per diversos Horizontes nulla Variationis Umbra inaequalitas, cum tamen Aerem esse diversissima conditionis, & in singulos dies mutabilem, nullus negarit; quidni inferamus, ipsam quoq; Variationem à Peristasi Aeris, nullam esse; quippe quæ alioqui, citrà dubium, manifesta foret inaequalitatis; Hinc autem evidenter apparet; Longomontanum cum videret ex Geometriâ aliam sequi Umbra Terrestris Semidiametrum, quàm ex Placitis Tychonis, Magistri sui; hujusq; Positiones, non posse conciliari cum Pragmatiâ Veterum; eorum Observationes maluisse eludere, per effictam Anomaliam à Sphæra Aeris, de quâ nullus Prædecessorum, vel per somnium cogitavit; quàm Tychonis Supposita, cum aliorum inventis conciliare: magis enim in promptu erat Veterum Observationes rejicere, quàm Dedomena Tychonica, ad eorum Schema Geometricum, & Numeros revocare, quibus naturâ suâ convenire nequeunt.*

*Vidit hoc Doctissimus Joh. Keplerus ; qui (licet aliquando in Veteres hand multò benignior) aperte profitetur, inventa Ty-  
 chonis cum Diagrammate Hipparchi, non stare : Verba hac sunt in Tab. Rudolphi, pag. 100. itaq, Umbra Latitudo, quam Tycho  
 tradit ; si ad Demonstrationum Diagrammata, Numerosq, con-  
 trà naturam suam pertrahatur ; Theoremata illa Hipparchi,  
 pulcherrima, & aestimationis immensa, (ut qua Umbram Cælo  
 pro Scalâ injiciunt) penitus evertit. Fatetur id Longimontanus,  
 Tychonis in hac Pragmatiâ minister, ingenuè ; methodum hanc  
 dicens irritam fieri, frustra, fuisse Veteres. Parcius inquam  
 Ego, hac Artificibus objicienda fuerant. Nam & Ego, diu mul-  
 tumq, versatus in consideratione Eclipsium ; etsi sum expertus  
 aliqua nocumenta à Causis Physicis ; at ea non tanta fuerunt,  
 per omnes Eclipses constanter, ut universam Astronomiam ever-  
 terent. Viden' ergò Benevolo Lector, vel hujus Viri testimonio,  
 Variationem Semidiametri Umbra Longomontani, non esse per  
 omnes Eclipses constantem ? Optandum verò esset, ut Keplerus  
 in vestibulo Veritatis constitutus, eandem cum Veteribus ingres-  
 sus esset viam, ad inveniendam Solis Distantiam : cùm hucusq,  
 triplam ferè Ptolemaica, non demonstret ; sed Rationibus Har-  
 monicis, quæ si non aliis, sibi saltem egregiè satisfaciant, confir-  
 met. Nam quæ quæso hac vanitas, ex Harmonicis quibusdam  
 Rationibus, aut aliis incertis Speculationibus, id velle conclude-  
 re ; cujus inventioni tota veterum Astronomorum Schola, tan-  
 toperè insudavit ? major sanè Hipparchi & Ptolemai laus : qui  
 inde ab antiquissimo Aristarcho Samio, per manus quasi acce-  
 ptam Demonstrationem, admiranda sagacitate perfecerunt ;  
 Geometricè quærentes, quod hoc pacto conjecturis tantum ve-  
 namur, incertiores semper abeantes, quàm accesseramus. Nec  
 est quod Joh. Keplerus, in Ptolemai Assumpta animadvertens,  
 pronunciet esse suspectissima, tanquam ad hoc ipsum, quod Ptole-  
 mai à Veteribus transsumpserat, evincendum, subornata : in*

*Hype-*

*Hyperaspiste Tychonis, pag. 187. Nam quòd ex Demonstratione artificiosissimâ apud Ptolomæum, vera Solis Distantia non colligatur; est à falsis Semidiametris Solis, Luna, & Umbra; qua mutari possunt, salvâ Demonstrationis methodo: adhibitis n. verioribus Semidiametris, is est consensus eaq; connexio; ut si vel tantillum transmutet, totum Schematis Apparatum confundas, & Distantiam Solis diversissimam acquiras: uti nos præeunte D. Lansbergio, pro diversis apud Autores Dedomenis, per Calculum experti sumus.*

*Quantum ad Observationes Artificium; non possumus omnes falsitatis accusare, quasi nullus animadvertere quiverit, veram quantitatem Semidiametri Umbra, in loco transitus Lunæ; est n. id possibile, si diligentia non desit: eog; nec Processu hunc ad investigandâ Solis Distantiâ, deferere quasi inutilem: nam Reverendus D. Lansbergius, in consiliû adhibitis omnium, Etatû Eclipsibus, incredibili labore, eam consecutus est Semidiametrum æquale, ut verissimum ostendat Solis à Terrâ intervallum per omnes Eclipses constanter, sicut in Uranometriâ, brevi, Deo volente ostensurus est. Quam dum expectas, certus sis, neq; Tychonem, neq; ullum ejus Discipulorum, veram Solis Distantiam & Parallaxin, cognitam habuisse: & consequenter, eos commisisse errores qui ex incertâ Parallaxi Solis, in Motum ejus redundant.*

#### REFUTATIO.

**E**Xpendimus hætenus discrepantiolam illam, quam Hortensius in Observationibus Æquinoctiorum Tychonicis, irritò licet conatu repræhenderat: Nunc progreditur ipse ad Luminarium à Terra distantiam, & Semidiametrorû eorundem, ut & Umbrae Terræ, in transitu Lunæ quantitatem, quæ parum aut nihil ad Solis motum faciunt; tantum, ut habeat, quod in Tychone & Longomontano carpat, de quâ re pluribus in Doctrinâ Eclipsium.

Verum, ut hæc controversia Benevolo Lectori placior fiet, brevem ejus elucidationem proponam. Veteres Astronomi, Hipparchus & Ptolemæus, ac post eos, Nic. Copernicus, visibiles Luminarium Semidiametros primum diligenter observarunt; sicut & Semidiametrum Umbrae Terræ in transitu Lunæ per Eclipticam, mediante motu Lunæ à Sole interea. Postea conjecturis tantum distantiam Solis à Terra assumerunt, ut liquet ex Ptolemæo lib. 5. Almag. cap. 9: quod idem etiam fecit Dn. Tycho. In tali autem suppositione constituit Ptolemæus, mediam Solis & Terra distantiam 1165. Semid. Terræ, Copernicus 1142; Tycho verò, mediâ fermè inter utrumq; via incedens 1150, & non prorsus cum Offusio 1152, ut vult Hortensius; licet hic numerum in integris diametris 576, proposito non esset inconueniens. Videatur D. Tycho, lib. 1. Progymn pag. 472. Cæterum Semidiametrum Umbrae in transitu Lunæ, loco inter Apogæum & Perigæum in Eclipsibus medio, Sole etiam mediam distantiam occupante, quod attinet; si Semidiamet. Terræ  $44\frac{1}{2}$  m. assumatur; nihil hic ab Experimentia & certâ Eclipsium Lunarium Dimensione committitur alienum, nec quicquam ferè discriminis inter Ptolemæum & Tychonem repetitur, velut patet Astron. Dan. Part. 2. pag. 173. Huic veterum & Dn. Tychonis, de distantia Solis à Terra, (quam alias ab exigua Solis Parallelæ inquirere, ipse Ptolemæus cap. citato statuit impossibile,) suppositioni, reliqui Astronomi absq; ulla alia demonstrationis certitudine, acquieverunt, usque dum Cl. Longomontanus causam remotionis Solis à Luna ex Angulo digressionis hujus à Syzygiis mediis in Quadraturas quævisse visus est, & sic distantiam Solis à Terra 1288. Semid. Terræ demonstrasse, ut liquet Astr. Dan. Part.

Part. 2. pag. 112. Quæ certè inventio, quoniam & diſtæ digreſſionis Lunæ rationem reddit, & hæc diſtancia Solis non ita multum Ptolemaicam ſuperat, omnibus Aſtronomiæ cultoribus meritò eſt magnificiendæ, & Eclipſibus, cum Longomontano, applicandæ.

Quod verò Keplerus & Lansbergius diminutionem magnitudinis Eclipſium à Dn. Tychoſe per cœleſtem experientiam in hiſce Borealiſus locis introductam, à Longomontano inſuper in doctrina Eclipſium, per ſuas cauſas luculenter aſſertam, ſicut & umbræ diminutionem in tranſitu Lunæ, prout legere eſt Aſtron. Dan. part. 2. pag. 164. & ſeqq., improbant; id ideo factum exiſtimo, quòd ipſi tali experientia fuerunt deſtituti: unde & Lansbergius, ut Phœnomena in Eclipſibus ſalvaret, viſibiles Luminariū Diametros pro lubitu, contra cœleſtes veterū & Dn. Tychoſis obſervationes immutat, imutatas Eclipſibus accomodat, ſicq; decurſatâ etiam Umbræ Semidiametro, diſtanciam Solis mediam in ſua Uranometria inveſtigat 1498 $\frac{1}{2}$  Semid. Terræ, ſuper qua quidem inventionem plurimum ſibi, & reſtitutæ ſuæ Aſtronomiæ gratulatur, Eclipſesq; nonnullas (non autem omnes, ut ille exiſtimat) huic normæ accomodat, nihil interim advertens, quantum, variatio illa, quam circa diametros Luminarium & Umbræ introducit, ab Apparentiis cœleſtibus diſſidet; ut jam nihil dicam de immani Fixarum à nobis remotione, quam tam aucta Solis à Terra diſtancia in Hypotypoſi Copernici (quam ſuam facie Lansbergius) demonſtrativè requirit. Sed cum de hiſ infra plura dicendi detur occaſio, hic copioſior eſſe nolo: tantum de Intentione Hortenſii verbum addam, qui exiſtimat Solis motum ideo non rectè à Dn. Tychoſe aſſignatum, quòd diſtanciâ Solis à Tellure Lansbergiana

giana non utatur, & consequenter Parallaxes suas minores faciat; licet differentia ista, si vel vera esset Lanshergii assertio, nihil sensibiliter in motu Solis alteraret.

Superest, ut hic etiam aliquid pro Longomontano, ad hunc Hortensii paragraphum: Nisi Longomontanus certissima demonstratione ostenderit semidiametrum umbræ hanc Anomaliā subire per omnia loca & tempora &c. reponam: Asseverat Longomontanus attenuationem umbræ ex inæqualitate aeris spissioris circa diversorum locorum Horizontes, nullam ferè mutationem subire: hoc Hortensius sic interpretatur, quasi variatio à peristasi aeris nulla esset, ut quæ aliàs sine dubio manifestæ foret inæqualitatis. Verum sciendum, aliam esse rationem umbræ, quæ à radiis Solis Horizontalibus semper & ubiq; eodem modo afferitur; aliam Luminarium super Horizontem conspicuorum, quæ non itidem: illa siquidem omni loco diminuitur, cum crassus aer ubiq; Horizontem obsideat, in quem radii solares agendo, umbram quasi lambunt, & non nihil depascunt, ut loquitur Longomontanus Astron. Dan. part. 2. p. 164 & 168: hæc verò non nisi in aere densiore supra Horizontem diversimode sese, juxta diversa Climata Polum versus diffundente, dilatentur. Neq; hic rejicit Longomontanus veterum observata, quod umbræ diametrum & sensibilem Luminarium magnitudinem, ut ait Hoatensius, & facit Lansbergius; sed eadem potius confirmat. Anomaliā refractionis illis incognitæ non solum sideribus, sed & Eclipsibus, licet diversimodè applicatâ. Quin & Refractiones radiorum Solarium juxta Horizontem, qui terram ex averſa umbræ parte perpetuò circumstant, in umbram terræ agere, in deliquiis Lunaribus ad oculum patet. Si enim quis in observatione Lu-

næ



næ tubum Opticum paulò antè initium, & mox post finem Eclipsis, cœlo sereno, adhibere voluerit, deprehender vestigia quædam subrubicunda, parti illi umbrę, quæ Lunæ proxima est, aspersa; id quod in Eclipsi Lunari anni 1631. d. 29 Octobris in Horizonte Hafniensi est observatum. Eodem modo in Deliquio Solari, quoniam Luna opacum corpus est, etiam umbram versus aspectum nostrum projicit, quæ à radiis Solaribus in aere crassiore non nihil ita inescatur, ut veram Lunæ magnitudinem non planè repræsentet; nam & Luna illuminata hic semper major verâ apparet. Atq; hæc Eclipsium historia apud nos verissima est, quam si alia ratione universaliorē reddere poterit Lansbergius, in examine Eclipsium dispiciemus. Porro, quòd Hortensius Keplerum alleget contra Longomontanum in causâ de Anomalia Lunæ, à Refractione radiorum Solarium proveniente, id tale est, ut absq; admiratione quis illa legere non possit, quæ habet idem Keplerus in sua optica, p. 279., ubi asserit, umbram terræ à Refractione radiorum Solis haud procul à tellurē remotam, totam prorsus absumi; sed rursus in transitu Lunæ reddi. Verum, quia inter ipsum & Longomontanum controversia erat de tali radiorum solarium & aeris in his Borealibus locis operatione, qua sc. Eclipses imminuuntur, idè Keplerus, ut veteribus ejusmodi Anomaliæ ignaris, in causâ aliena subveniret, tam hyperbolicè contra Longomontanum concludit, quasi hac umbræ Anomalia introducta, universa Astronomia everteretur, & nunquam inter Astronomos talis extitisset jam prius controversia. Atq; hæc etiam candido & intelligenti Lectori, contra hanc Hortensii accusationem, pro Dn. Tychone, & Cl. Longomontano, spero suffectura.

6.  
Tycho  
non cōfi-  
deravit  
Anoma-  
liam pr-  
cessionis  
Æquino-  
ctiorum.

**S**ecundò: Non consideravit inaequalem Motum Sectionum Æquinoctialium. Cum tamen ipse fateatur, diversam Anni quantitatem, & inaequalem Motum Stellarum Fixarum, aliis atq; aliis seculis, ab Astronomis fuisse observatum. Mirum verò, Tychonem Motum Nodorum reciprocum videre potuisse in Luna, qui reverà nullus est; & non vidisse in Sole, nam neque Hipparchus, neq; Ptolemaeus, neq; Albateginus, nec Copernicus, nec Regiomontanus, neq; D. Lansbergius, ullam in Motu Nodorum Luna invenere inaequalitatem; quam solus Tycho ei assignavit: quā Observationum certitudine, viderint Tychonici: ubi de Lunaribus agemus, easdem attentius considerabimus. Certè Reciprocatio ista Sectionum Æquinoctialium, in Motu Fixarum tam evidens est, ut nisi quis omnium Astronomorum Observationes rejiciat; aut proprio Calculo à Calo longissime abeat, (quod in Tychonico Fixarum Motu fieri, perspicuo exemplo infra demonstrabimus) non possit eam praterire. Quod cum vidissent Longomontanus & Keplerus, ille in Astr. Danica, hic in Tab. Rudolphi, Equationem Æquinoctiorum, etsi non ad eò certam, aliquam tamen adhibuerunt: maxima enim Aequatio, demonstrante D. Lansbergio extendit se ad 1 gr. 14 scr. 16 sec. non 27 scr. 5 sec. ut habet Longomontanus; neq; ad 30 scr. 31 sec. ut Keplerus. Tycho autem, etsi Anomaliā in Motu Sectionum Æquinoctialium concedat; causam tamen non addit, cur eam negligat; & opinari licet, quod Rei difficultate absteritus, suum 51 sec. in Fixis Annuum Motum, ad 4 saltem secula, valere voluerit: de ceteris Sententiam hanc ferens; Ep. Astr. p. 45. quod apparentis Octava Sphaera Motus, exactam Cognitionem, vix ulli Mortalium absolute perscrutabilem existimet.

REFUTATIO.

**Q**uod Dn. Tycho Anomaliā Æquinoctiorum suo & proximis circumstantibus seculis non introduxerit, ejus

ejus rei rationem ipsemet in Progymn. suis passim red-  
 dit. Nam qui novis Phœnomenis observandis, & cœlo  
 vindicandis, præcipuè esset intentus, ideo etiam Luna-  
 rium restitutionem ad hæc secula præmittere voluit sic-  
 ut & stellarum fixarum, numero circiter 800. diligentis-  
 simè observatarum; ut ex illis Planetarum etiam loca  
 quovis oportuno tempore acquireret. Et certè in illis  
 observandis tam diligentem ac copiosum fuisse Dn. Ty-  
 chonem accepimus, ut si diutius supervixisset, iis totam  
 Astronomiam, facta suorum cum veterum observatis  
 collatione, de facili perfecisset; ut ita nulli dubium fo-  
 ret, quin & inæqualem punctorum Æquinoctialium Se-  
 ctionem, & obliquitatis Eclipticæ mutationem, aliaq;  
 consimilia, quatenus veterum observata inter se collata,  
 & à Refractionibus aliisq; viciis liberata admitterent,  
 Theatro suo Astronomico, quod operosè moliebatur,  
 inseruisset. Interim tamen, propter hunc inæqualem se-  
 ctionum Æquinoctialium motum, ipsum nihil sensibili-  
 ter à cœlo aberrasse, evincit non tam bina anteceden-  
 tiâ, quàm subsequentiâ secula. Nam ab Anno Christi 1582.  
 quo restitutionem Luminarium primum adornare cœ-  
 perat, ad hoc usq; tempus, per integros 50 Annos, nihil  
 in Solè deprehensum est à veritate alienum, quod evi-  
 denter in sensus cadere possit; ut vel hoc indicium esse  
 poterit, tantam Æquinoctiorum inæqualitatem, quan-  
 tam Nic. Copernicus introduxit, in cœlo vix dari, ne-  
 dum quantam Ph. Lansbergius; qui eandem nunc ut  
 apparet non tantum adauget super fundamentum ad-  
 modum lubricū; sed insuper Revolutione Copernicâ  
 duplo ferè constituit velociorem, ut ausim dicere, non  
 duo, sed vel unum seculum, si mundus tam diu est per-  
 man furus, hanc vanitatem, ut & alias plures, cœlicus red-

arguturum. Et interim miratur Hortensius ossitantiam Tychonis, tali ratiocinio, ad calumniandum more excogitato: Qui considerat id, quod in cœlo non est; illum oportet magis considerare illa, quæ ibidem verè existunt: At Tycho Brahe motum Nodorum Reciprocum in Luna, qui re vera nullus est, consideravit: Ergo multò magis oportuit illum tam evidentē Æquinoctialium sectionum inæqualitatem æstimasse, eamq; restitutioni Solis ac Siderum adhibuisse &c. Verum cum ipsemet Hortensius satis intelligat suæ Assumptionis infirmitatem; ideò, ut eam roboret, & motum Nodorum inæqualem contra certissima Dn. Tychonis observata, lib. 1. Progymn. pag. 114. & seqq. tollat; statim ad Autoritates confugit inquiring, illum neq; ab Hipparcho, neq; Ptolemæo, neq; Albategnio, nec Copernico, nec Regiomontano, neq; à Magistro suo Ph. Lansbergio observatum; & proinde nullum esse: Quasi verò nihil unquam Dn. Tycho exactissimis suis observationibus invenisset, quod ab his esset neglectum, & nunquam prius animadversum: Nonné primus Tycho Refractiones siderum observavit, & ad cœlum probavit? Nonné idem augmentum Anguli latitudinis Lunæ à Syzygiis in Quadraturas digredientis primus demonstravit? Ut alia ejusmodi hic præteream, inprimis quæ cursum & altitudinem Lunæ Hypothesi ejus inserta concernunt, utut illa Lansbergio minus arrideant, sicut suis locis, ad quæ ordine provocat Hortensius, plenius ostendetur. Nec est, quod interea existimet quispiam cum Hortensio, qui tantopere urget inæqualem Æquinoctiorum sectionem contra Tychonem, de qua tamen ipsum sufficienter, ut supra monui, temporis exculat brevitates, ideò indefessum ejus laborem, quem circa 800. aut plurimum stellarum

larum fixarum accuratissimam in cœlo designationem & Canonicam Restitutionem exantlavit, fuisse frustra-  
neum; siquidem ista Æquinoctiorum inæqualitas, vel  
è Copernico aut Lansbergio; vel potius Longomonta-  
no aut Keplero, ut qui hanc ex Veterum observatis debi-  
to modo restitutus maximè probent, poterit desumi, de-  
inceps omnibus Stellis Fixis, unà cum ipsarum medio  
Motu potissimum temporis intervallo congruente, æ-  
qualiter applicanda. Et hæc etiam ad hanc Hortensii ac-  
cusationem de Anomalia Æquinoctiorum à Tychone o-  
missa, dicta sufficiant.

# TEXTUS HORTENSII.

**T**ertio: non habuit rationem mutationis Eccentricitatis So-  
laris inæqualisq; Motus Apogei: qua duo evidentissimè con-  
spicua sunt in Cælo, & ab omnibus Astronomis observata. 7.  
Nam quia Ptolemaus eandem penè Eccentricitatem, & Apo- Tycho  
gaum retinuit, quod invenerat Hipparchus; non statim suspicari non ha-  
licet cum Tychone, Prog. Tom. 1. pag. 32. vel utriusq; Observatio- buit rati-  
ni, vel alterius saltē eorum, errorem aliquem subesse, sed cau- onē mu-  
sa erit perspicua si dicamus, Centrum Eccentrici in utriusq; Obser- tationis  
vatione, aequaliter ferè distitisse, à limite Maxima Eccentri- Eccentri-  
citatū, in parvo Circello, (juxta Theoriam Solis, in Progymnas- citatis So-  
matibus D. Lansbergii, Cælestibus Phenomenis congruenter ex- lis, & in-  
pressam) & 285. Annis, quot sunt inter Observationem Hipparchi xqualis  
& Ptolemai; contra Successionem signorum in tantum delatum motus A-  
fuisse; quantum medij Apogei Linea, processerat in Signorum pogzi.  
consequencia. Inde enim factum necessario, ut Apogæum ve-  
rum, tempore Ptolemai, eodem ferè loco Sphæra Fixarum con-  
spectum sit. quo tempore Hipparchi; & Ptolemaus non confi-  
det, ut vult Longomontanus Parte 2. Astr. Dan. p. 48. sed se-  
cundum Rei veritatem, situm Apogei, suo seculo eundem retine-  
rit. Post Ptolemaum; Albategnius, Arzabeh, Regiomontanus,

Copernicus, D. Lansbergius, aliiq; variabilem Eccentricitatem, & inaequalem Apogei progressum, deprehenderunt: nec quicquam causa superest, cur Tycho eam praterierit; nisi forte, quod propriis Observationibus nimium addictus, rejectis inventis aliorum; Motum Solis ad omnium Temporum Observationes nequiverit extendere: quod satis arguit, continua ejus ab aliorum Observationibus discrepantia; quæ non tantum nostro seculo, sed præcipuè, cum ad alia Tempora revocatur, est conspicua.

Nec video, quâ licentiâ Longimontanus, stabilem Eccentricitatem, & æqualem Motum Apogei, nobis obtrudat, Astr. Dan. Parte 2. pag. 47 & 48; cum tot præstantium Virorum, & non minus in Observationibus exercitatorum, Inventæ, contrarium evincant: cum ipse Tycho, mutationem Eccentricitatis non omninò negarit; Motumq; Apogeo, sua opinioni respondentem, ut fatetur pag. 48 dictæ Partis secundæ Astr. Dan. non addiderit. Et quid oberit, quo minus dicamus; eum Observationes Veterum ad suum Propositum, violenter proculdubio accommodasse, quod ibidem pronunciare non veretur de Ptolemao; cujus Apogaum pag. 47. violenter promovet in 10 gr. Geminorum? Quasi verò Ptolemaus, tantus Artifex observare nequisset, Apogaum Solis, ab Hipparcho ad suum tempus mutatum fuisse; cum Mutationem Apogeorum in cæteris Planetis primus nobis manifestarit. Sed operæpretium est, videre, quàm pulchre Longimontani Tabula, ex stabili Solis Eccentricitate deducta, cum Observationibus consentiant.

Ptolemaus Anno Christi 140, Martii die 22, observavit Alexandria Equinoctium Verum apprens, horâ 1 post meridiem; verum horâ 2, à mer. vide Magni Operis lib. 3. cap. 2. Tabula Longimontani dant locum Solis in 0 gr. 14 ser. 55 sec. Arictis: quæ Sol confecit horis sex: tanto citius debuisset Ptolemao apparere illud Equinoctium. Similiter: Albategnius observa-

vit Equinoſtium Autumnale verum, Araçta in Syria, Anno  
Chriſti 882, die 19 Septemb. horis 4 cum dimidiâ, & quartâ ferè,  
ante Solis Ortum; vide Albat. cap. 17; hoc eſt Sept. hor. 15 ſer. 16  
à merid. non 25, ut habet Longimontanus Parte 2, Aſtr. Dan.  
p. 105 ubi ſaſetur, ſe Obſervatione Albategnii, abeſſe horis 14½;  
quas ex Tabulis ejus invenimus 15½: & quaſi re benè geſtâ ad-  
dit, neminem ante ſe, Albategnium hunc ſibi propius reconciliaſ-  
ſe; cum tamen D. Lansbergii Calculus, Obſervationi Albateg-  
niana, conſentiat intra ½ partem hora: uti videre eſt in ejus  
Progymnaſmatibus; pag. 48.

Hiſta inter ſe collatis, neminem eſſe arbitror, qui non vi-  
deat; Tabulas Longomontani, antecedentiam Aſtronomorum  
Obſervationib., non congruere; quod tamen unicè ſectari opor-  
tebat; etiam proprio Calculo potius reformato, quàm aliorum  
certiſſimis Obſervationibus in dubium vocatis. Sed is Tychonicò-  
rum penè omnium mos eſt; ut quoties Obſervationes Veterum,  
Placitis ſuis non convenire cernunt; toties eas limitent, caſti-  
gent, emendent rejiciant, aut planè invertant: viam mon-  
ſtrantes, quâ ſi quis in eorum Obſervationes animadvertat; &  
quoties Calo diſconveniunt, ad Limitationem trahat; tandem  
efficiat, ut neq. ſibiipſis, neq. Calo, neq. proprie ipſorum Hypothe-  
ſi, ullatenus conſentiant. Non ſunt proſectò, hoc modo, grati ergà  
eas, qui labore, curâq., lucem nobis aperuere in hac luce; ut re-  
ſtius de illis Plinius: neque conſiderant, ſine eorum Auxilio,  
nihil nos in hac Arte poſſe proſecere. Nam ſi Obſervationes Ve-  
terum, quantumvis diligentes pro arbitrio rejicere liceat, nulla  
unquam condetur Aſtronomia: & ſi (ut monet Albategnius cap.  
52) ipſi propter instrumenta, quibus hac obſervabant, decipri  
ſunt; & nos ſimiliter neceſſariò decipimur; cum non niſi per Ob-  
ſervationes eorum, Obſervationis noſtræ poſſit eſſe conſideratio.  
Valeant ergò, quotquot Veteres, eorumq. Obſervationes, tam  
parvi faciunt; & quos nullo tantorum Artificum, tam perſpi-  
cuium

*cacium ingeniorum tangit Reuerentia; nihil quoq. supra isto-  
rum Conatus, unquam censeantur effecturi.*

REFUTATIO.

**D**Eduobus hic agit Hortensius, mutatione scilicet Ec-  
centricitatis Solaris, & inæquali motu Apogæi, quæ  
ambo licet reuerâ non existant, nec ab aliis, nisi solo Co-  
pernico, ex observationibus minus accuratis, & Refra-  
ctionum vicio laborantibus primum assumpta, & in Hy-  
pothesin redacta: Hortensius tamen ista evidentissimè  
in cœlo conspicua esse, & ab omnibus Astronomis ob-  
servata asserere non veretur; tantum quod videat  
ista confictæ Hypothesi Copernicæ, à Ph. Lansbergio  
renovatæ congruere; ignorans interim, etiam falsis ob-  
servationibus Hypotheses posse accommodari. Magis  
deuisset Hortensium, si illud obtinere voluisset, prius  
observationes Veterum, quæ non tantum Armillarum  
exilitate & luxatione, ut infra quoq; ab ipso ostendetur  
Ptolemæo, sed etiam Refractione, omnibus Horizonti  
vicinis adhærente, laborant, ad Examen veritatis re-  
vocasse; nimiumq; Ptolemæi & Hipparchi in Annua  
quantitate Solis, & hujus cum Lunari, consensum, (de  
quo videatur illustr. Scaliger lib. I. Theor. pag. 30. & seq.)  
à suspitione vindicasse; &, quoniam hæc res ut pluri-  
mum à determinatione temporis ingressus Solis in 4  
Puncta Cardinalia  $\vee/\text{☿}/\text{♊}/\text{♋}$  dependet, tam certam  
Ptolemæi circa eadem demonstrasse temporis mensu-  
ram, ut opus non fuisset illam contulisse cum Plinianâ,  
lib. 10. cap. 25. è designatione Sosigenis & Julii Cæsaris,  
quorum seculum intermedium quasi fuit inter Hippar-  
chum & Ptolemæum, de qua re legatur Astr. Dan. lib. I.  
pag. 34. Ob ejusmodi incommoda, aliq; complura Ve-  
terum observatis in Solis motu adhærentia, cœpit Cl.

Lon-



Longomontanus hanc rem diligentius æstimare, eamq; subductis rationibus, lib. eodem, pag. 47. ut & antecedit. & consequente Commentarii Solis eò deduxit, ut Anomalix istæ mutationis Eccentricitatis Solaris, & inæqualis Motus Apogæi, ex incertis observationibus originem trahentes, rursus è naturâ cœlestium eliderentur, nec commenta ista calculum maximis frustra involveret difficultatibus; idq; eâ demonstrationis discretione, ut si eam Hortensius absq; livore & prejudicio in dicto Commentario legisset & perpendisset, non licentiæ Longomontani, sed sagaci potius industriæ tribuisset, quod accuratissimis Tychonis observationibus suffultus (etiam contra ipsius Tychonis quondam spem, sed non conatum, quod ipso opere demonstrasset, si tam diu vixisset, donec Veterum observata in Examen & debitam cum suis comparationem adducere potuisset) Astronomiam ab hisce tricis, tantum à falsis, ut modò dictum, observationibus obortis, liberare voluerit, & potuerit. Quin & Albategnii, & Arzahelis Eccentricitas Solis inter omnes minima, licet non item Solis obliquitas minima, satis ostendit, quàm benè Eccentricitatis Solis mutatio variationi obliquitatis Eclipticæ respondeat, ut proinde satius fuerit inæqualitatem Æquinoctiorum obliquitati Eclipticæ annexam, uni, cum Longomontano, Hypothesi includere, quæ extat lib. I. Theor. Astron. Dan. pag. 88. Porro, si Motus Apogæi Solis in Examen vocetur, apparebit statim, etiam è simplici ejus diductione, lib. eodem Astron. Dan. pag. 47 & seq. inæqualitatem Copernicæam  $7\frac{2}{3}$  gr. aut Lansbergianam  $5\frac{3}{4}$  [ neq; enim hîc in mensura & revolutione conveniunt ] satis incongruenter hujus Motui esse accommodatam. Ostendat enim, si poterit Hortensius observationibus certis & indubitatis alicubi

ab Hipparcho ad Tychonem, imò à mundi exortu ad nos  
 usq; , vel unius gradus in Motu Apogæi Solis, inæqualita-  
 tem, præter illam, quam Ptolemæo affingunt, 5 gr. circi-  
 ter, ob recentum proculdubio æquale Temporis inter-  
 vallum, inter ingressum Solis in  $\gamma$  &  $\alpha$  tam Hipparchi  
 quàm Ptolemæi temporibus. Nec hoc cuiquam Astro-  
 nomorum mirum videbitur, qui norunt Tropicum So-  
 lis locum, propter declinationem inibi minus variabi-  
 lem, nullam admittere satis præcisam observationem.  
 Verum si Hortensius operâ Præceptoris sui Lansbergii  
 [ qui fortè omnia valet ] ostendere poterit, Apogæi Solis  
 inæqualitatem 5 $\frac{1}{2}$  gr. ostendat etiam aliquâ ratâ obser-  
 vatione ejus duplam 10 $\frac{1}{2}$  gr.; cum Hypothesis requirat,  
 ut in tantum inter se observationes circa Apogæi Solis  
 constitutionem aliquando dissideant; apud Coperni-  
 cum verò, juxta Hypothesis Solaris exigentiam, 14 $\frac{1}{2}$  gr.  
 Adhæc, cur non etiam adscribit Hortensius Lunæ & reli-  
 quorum Planetarū Apogæis suum inæqualem motū &c.?  
 Judicent jam intelligentes, an Eccentricitatis Solis muta-  
 tio, & Apogæi motus inæqualis in cœlo evidentissimè sint  
 conspicua, ut loquitur Hortensius, an secus? Imò ibi non  
 esse, è dictis patet, nec ab uno potest colligi Ptolemæo, ne-  
 dum ut sequentibus seculis Solis cursui ritè applicari pos-  
 sit. Præterea, ut etiam de discrepantiâ illa aliquid dicam,  
 quæ reperitur inter Æquinoctium vernale Ptolemæi,  
 itemq; Autumnale Albategnii, & Calculum Longomon.  
 è Tabulis; illa facilem merebitur excusationē, apud eos  
 inprimis, qui Comētarium ipsius de Motu Solis, in Astr.  
 Dan. legerint; & juxta æstimarint Veterum instrumen-  
 torum, maximè circa Æquinoctia ab Hipparcho & Ptole-  
 mæo observata, insufficientiam, quam ipse Ptolemæus  
 verbis manifestis astruit lib. 3. Almag. cap. 2. inquiens:

Poreft

Potest non solum in Tropiciis observationibus, verum  
 etiam in Æquinoctialibus error aliquis accidere, usq; ad  
 quartam unius diei partem. Nam si in 3600 solum parti-  
 cula circuli (qui per polos Æquinoctiales describitur) si-  
 tus aut divisio instrumentorū ab exactā ratione diversi-  
 ficabitur, hanc secundū latitudinem accessus Solis juxta  
 Æquinoctiales proportionem quarta parte gradus unius  
 in obliquo circulo secundum longitudinem motus adæ-  
 quat, ut discrepantia usq; ad quartam proximè diei unius  
 fiat. Præterea major error accidere potest, quando per  
 instrumenta fiunt observationes, quæ non observatio-  
 num ipsarum tempore exquisitè posita sunt, sed jam o-  
 lim à certo principio sic constituta, ut ad longum tem-  
 pus firma permaneant. Solet enim fieri longitudine tem-  
 poris occulta instrumentorum hujusmodi commotio,  
 ut in Armillis æneis apud nos in Palestra, quæ viderentur  
 Æquinoctialis circuli superficie propositionem habere,  
 perspicere quispiam poterit, adeò enim diligenter nobis  
 observationibus situs earum lapsus esse videtur, & maxi-  
 mè majoris atq; vetustioris, ut nonnunquam etiam bis  
 in iisdem Æquinoctiis cavæ superficies ipsarum illumi-  
 natæ sint &c. Hic duo præcipuè circa instrumenta Vete-  
 rum refert Ptolemæus, quæ errorem in observando cau-  
 sari poterant: Unum, quòd in Armillis istis ea circuli  
 maximi magnitudo sæpè non exstet, ut singuli 360. gra-  
 dūs possint in sexagena, sed dena tantum scrupula divi-  
 di: quo efficitur, ut sena illa minuta in declinatione  
 Solis intermissa, 15 min. dent in longitudine, quæ in Mo-  
 tu Solis quartam fermè diei partem, juxta Ptolemæum,  
 constituunt: Alterum, quòd de luxatione Armilla-  
 rum Alexandriæ ab Hipparcho relictarum subjicit,  
 Ptolemæus, id inter alia, etiam Refractionis Solis apud

Alexandrinus, præcipuè Horizonti viciniore, indicium est. Ut vel hinc appareat, ejus considerationem non absq; causâ à Longomontano, circa Solis restitutionem esse susceptam, qui etiam, ne ejusmodi Armillarum à vero Poli situ remotio, aliquid erroris tanto temporis intervallo, quod inter Hipparchum & Ptolemæum effluxit, medio motui Solis ingereret, maluit ejus constitutionem ab ipso Hipparcho ordiri; Cujus quoq; Æquinoctia satis benè cum calculo Longomontani conveniunt, licet non in ipsis Secundis, cum Lansbergio, quòd id ridiculum sit; sicut & istud, meo quidem judicio, quo pag. 10. Progymn. suorum ostendere intendit, Parallaxin Solis Horizontale ita Æquinoctiis applicandam, ut verum inde per 1 horam tardius ingruat; Autumnale verò tantundem anticipet in Instrumentis Armillaribus perpetuò; Astronomi siquidem satis norunt, Parallaxes veræ Alitudini Solis detrahere, licet diversimodè Phænomeno applicentur, prout revolutionem cœli sequitur; & interim tamen non semper esse Horizontales &c. sed de eo etiam alij dispicient.

Ex his hætenus è Ptolemæo prælibatis, planum evadit, non ita novum esse, si differentia aliqua, & quidem satis notabilis inter Æquinoctia à Veteribus, Ptolemæo & Albategnio, observata, & Tabulas Longomontani in Astronomia Danica, occurrat: cum & ipse Copernicus proximo hoc seculo, plus dimidio unius diei ubiq; fermè in motu Solis representando, ab ipso cœlo diversum eat. Ut proinde hic satis mirari nequeam, iniquissimum Hortensii judicium, qui existimat Longomontanum rectius sibi suaq; famæ consuluisse, si accuratissimis Tychonis observationibus relictis, suum calculum, Veterum incertis accommodasset observatis; cum interim

sciat,

fiat, aut scire debuisset, nullas unquam perennes Side-  
 rum in Hypothesibus constitui posse Revolutiones, nisi  
 observationes cœlestes, quæ harum principia sunt, veri-  
 tati omni ex parte consentiant, & ab incommodis præ-  
 missis sint immunes. Interea tamen etiam Artifici Astro-  
 nomo opera danda est, ne Anomaliæ ab incertis prove-  
 nientes observationibus, alicubi in Hypotheses introdu-  
 cantur, & sic Entia præter necessitatem multiplicentur:  
 sed potius, ut Hypothesium causas, quoad possibile, red-  
 dat, non tam, ut mea fert opinio, à naturâ inferiorum,  
 quod D. Keplerus conatus est; quàm superiorum seu cœ-  
 lestium, circa plures Planetarum Revolutiones, sibi in-  
 vicem, ut in Horologiis, contranitentes, quod Platoni-  
 cæ Philosophiæ admodum est consentaneum. Neq; ex  
 toto verum est, quod asserit Albategnius Cap. 52.: si Ve-  
 teres propter instrumenta, quibus hæc observabant, de-  
 cepti sunt, & nos similiter necessariò decipimur, cum  
 non nisi per observationes eorum, observationis nostræ  
 possit esse consideratio: Hic enim ad medios Motus præ-  
 cipuè respicere videtur Albategnius, qui ut plurimum è  
 Veterum dependent observatis: At in cæteris, error eo-  
 rum non mox novis observationibus est ascribendus,  
 imprimis illis, quæ Organis sufficientibus (qualia præ o-  
 mnibus Tychonica hætenus sunt æstimanda) debito  
 modo fuerint acquisitæ. Neq; enim ideò Dn. Tycho suo  
 seculo in observationibus Planetarum, Stellarum Fixa-  
 rum, & novorum cœli Phænomenon, quod Veteres lapsi  
 sint, aberravit: Nec fortè ipsè adeò Albategnius, utpotè  
 cujus celerior Æquinoctiorum præsentatio, ex nimia  
 temporis apud Ptolemæum, inter ipsum & Hipparchum  
 productione, originem traxisse videtur, quæ tantam a-  
 lias subirepente Anomaliam annis 740. inter Ptole-

mæum & Albategnium meritò diminuisse; Id quod ex observatione utriusq; , Ptolemæi sc. & Albategnii circa Cor Leonis habita, quodammodo apparet. Nec dubium est, quin omnes interim Astronomi, præter Ph. Lansbergium, ad tantam Anomaliam obstupescant, eamq; averfentur, utpote cui æqualis nullo unquam tempore, nec ante, nec post, ab Artificibus in cursu Solis, & ejus ad puncta Æquinoctialia accessu, sit observata, ut proinde ista Albategnii Æquinoctia non immeritò sint à Copernico repudiata, & à Longomontano, ob minus cognitum observandi modum, suspecta. Hinc quoq; non nisi mediocre Elogium inter Astronomos ei tribuitur à Tychone, lib. I, Astron. circa finem: hoc Disticho:

*Emendare aliquid, licet Albategnius orsus,*

*Non tamen exactas protulit ille vias.*

Et hæc etiam existimo ad hanc Hortensii criminationem diluendum sufficere.

#### TEXTUS HORTENSII.

8.  
Tycho  
non rectè  
constituit  
medium  
Solis Mo-  
tum.

**Q**uartò: Motum Solis medium Tycho nequaquam rectè constituit. Nam cum Motus medius Solis, colligatur ex vera Quantitate Anni Tropici; isque ob Sectionum Æquinoctialium, Motum reciprocum, & mutationem Eccentricitatis & Apogei Solis, inæqualis perpetuò appareat: certum est, nisi removeantur hæc impedimenta, veram Anni Tropici Medii quantitatem, nunquam posse obtineri. Sed Tycho Brahe ut diximus, neutram causarum Inæqualitatis Anni Tropici Veri, rectè consideravit; Motum ergo medium Solis, Cælo congruum, haud constituit. Quòd si abhibuisset veram Prosthapharesin Æquinoctiorum, & mutationem Eccentricitatis Solaris; non est dubitan-

bitandum, quin veram quoque Anni Tropici Medii quantitatem, certò obtinuisse: est enim adeò constans dictarum causarum conspiratio, ad inferendam Anni Tropici Veri Inequalitatem; ut si pro diversorum Autorum Ætates debite applicentur, eandem prorsus, prodant Anni Medii quantitatem tempore Hipparchi; quam Ptolemai, & Albategnii; neque aliam Ætate huius, quam nostrâ; & per consequens, eundem per omnia Secula, Motum Solis medium: qui quidem in singulos dies, ex Demonstratione D. Lansbergii, est 59 scr. & sec. 19 tert. 45 quart. ferè.

Tycho autem, sine ullo respectu ad inequalitytatem Anni Tropici, à precedentibus Astronomis inventam; tali (ut inquit Prog. Tom. 1. pag. 45.) solammodo Restitutione Cursus Solaris contentus; quæ hisce proximis Seculis, intra 300 aut 400 Annos, satisfaciât; longè abît à verâ quantitate Anni, & Motus mediû Solis: vult enim hunc esse 59 scr. 8 sc. 19 tert. 50 qu. ferè; qui excedit Motum medium D. Lansbergii; penè 5 quartis.

Longomontanus, adhibita aliquâ Equinoctiorum Equatione Astron. Dan. Parte 2. pag. 97. invenit 59 scr. 8 sc. 19 tert. 48 quart. excedens D. Lansbergium quartis 3. Sed cum stabilitatem Solis Eccentricitatem supponat; & Prosthapharesin Equinoctiorum nimis contrahat; certum est, etiam ejus Motum medium, Calo & Observationibus omnium Astronomorum, minimè responderè.

#### REFUTATIO.

Hæc ultima est, Hortensii Criminatio, circa mediû Motus Solaris constitutionem, quam non à D. Tychone aut Cl Longomon. sed solo Lansbergio ritè elaboratam hoc evincere conatur Syllogismo: qui non attendit inequalitytatem Equinoctiorû, & reciprocam Eccentricitatis & Apogæi Solaris mutationem, is neq; veram Anni Tropici quantitatem definire, aut medium Solis Motum, qui

ab istâ unicè dependet, rectè constituere potest: At Tycho dictas inæqualitates non considerat; ergo neq; medium Solis motum rectè constituit &c. B. Propositio languida est; Constat enim enumeratione earum præcipuè rerum, quæ in constitutione Anni Tropici maxime abundant; ut sunt; Eccentricitatis mutatio, & reciprocus Motus Apogæi Solis; Quæ duo in cœlo non esse, multò minus evidenter ibidem conspicua, ut vult Hortensius, superiori disquisitione ostendimus. Restat proinde exigua illa Æquinoctiorum inæqualitas, quam obliquitatis Eclipticæ mutationi in unâ Hypothesi rectè unitam extare diximus lib. 1. Theor. Astron. Dan. p. 88. Et interim tamen ipse Tycho rationes reddit, cur maluerit ex ratis & perspectis observationibus, Anni Tropici Quantitatem, & hinc etiam medium Solis motum ad proximas Annorum centurias derivare, quàm ex incertis veterum observatis ad longissima secula extendere; quæ legantur lib. 1. Progym. pag. 53 54 & seqq. Nec dubium est, quin cursus Solaris per ipsum facta Restitutio satis præcisè hisce proximis seculis sit cœlo responsura; dum contrà, Lansbergii suppositionem, vel bina proximè subsequencia secula æq; eludent, atq; jam ipsum cœlum Copernici calculum refellit. Nam & tardior Solis Motus medius ab ipso constitutus, & nimia Sectionum Æquinoctialium Prostaphæresis, Anomaliâ hujus suo Apogæo nunc appropinquante, defectum Calculi Lansbergiaci suo tempore arguet. Causâ autem, cur Annus Tropicus Tychonis, minor sit medio; sed motus Solis medius apud eundem concitator, hæc esse videtur, quòd motus Anomalix Æquinoctiorum, Perigæum suum, ex constitutione Longomontani, pertransiens, aliquid exiguæ illius deputatæ inæqualitatis, motui Solis magis



magis magisq; adjiciat : ut sic Calculus Motus Solaris è  
Tabulis Tychonicis diu cum Longomontani conveniat,  
nec quid sensibilibiter, magis quàm hætenus per Annos  
50. ; à coelo diversum eat : id quod posteri, si qui futuri,  
rectius dijudicare poterint. Et tantum etiam de Sole.

TEXTUS HORTENSII.

**H**æc sunt è quorum defectu aperitè colligere est, Motum Solis Transitio.  
à Tychone nonnàm accuratè esse restitutum. Transeo nunc  
ad Lunam, cujus Motibus investigandis, se ingentem industri-  
am, variorumq; Instrumentorum copiam, adhibuisse, non uno  
in loco testatur. Ostendam autem, non aliter quàm suprà, Obser-  
vationes ejus sibi non constare : & quæ ex iis deduxit, non esse  
Cælo consentanea; postquam Deo favente, & viam monstrante  
D. Lansbergio, detractâ Autoritatis Tychonica Larvâ, Rem pe-  
nitus introspexi.

REFUTATIO.

**P**RIorem hujus Transitionis partem, de Motu Solis  
non accuratè à Dn. Tychone restituto, in superiori-  
bus ita discussam arbitror; ut verear, ne in posteriori, in  
qua Larvâ Autoritatis Tychonica, ut loquitur Horten-  
sius detractâ, Lansbergianam induit, hoc est; certissimis  
Tychonis observationibus, quas frustra impugnat, reli-  
ctis, commenta Lansbergii amplectitur, omnibus in-  
telligentibus se exponat deridendum &c. Sed ad rem.

TEXTUS HORTENSII.

**U**tq; ab Eclipsibus Lune fiat initium; quas ternis aut quater-  
nis accuratissimis Organis observavit; animadverti non  
tantam iis inesse certitudinem quantam multis Tycho passim de-  
predicat. Nam Medium Eclipseos Lunaris Anni 1584. 7. Nov.  
quod P. Wittichius Cassellis observaverat hora 13. scr. 3. post me-  
rid. & Brucæus Rostochii, hor. 13. scr. 4. ; Tycho se observasse scri-  
bit, Epist. Astr. pag. 72. hor. 13. scr. 8. ; & carpit Wittichium, quod  
9. Tempora  
& magni-  
tudines E-  
clipsium,  
non satis  
exactè, à  
Tychone  
observa-  
ta.

octavâ horæ parte in observatione peccarit: cùm tamen ejusdem Deliquii Medium, propria Observationis inconstantiâ, contigisse scribat hor. 13. scr. 12. Progymnasin. Tom. 1. pag. 02. de Motu Luna.

Eclipsiitem Lunari, Anni 1587, Septemb. 6; de quâ, licet saltem per intervalla, momentanea quadam serenitas, per recurrentes nubes illucet; se intrâ 2 aut 3 scrupula certum esse Rhotmanno affirmat, Epist. Astr. pag. 113. in Catalogo Eclipsium, assignat hor. 9. scr. 10. Sed Christianus S. Longomontanus, Observationum Testis; Astron. Dan. Parto 2. p. 52. eidem tribuit hor. 9. scr. 30. excedens Tempus à Tychone annotatum, scrupulis 14. Sic & defectui Anni 1594. Octob. 19. Tycho assignat hor. 19. scr. 26. Longomontanus, hor. 19. scr. 10. deficiens ab illo scr. 10.

Confer, si lubet, etiam reliqua Eclipseon momenta; quæ Tycho & Longomontanus referunt: offendes interdum discrimen scr. 7. ut Anno 1576 & 78.: interdum scr. 6. ut 1595 & 99.: sapius scr. 4. aut 3. ut 1592. 96. & 1581. 84. Unde non sinceratione suspicari licebit, Tychonicos serò tandem didicisse, quod Ptolemæus verissimè asserit, Magni Operis lib. 5. cap. 10. scilicet in Apparentibus Conjunctionibus & Oppositionibus, octavam horæ partem neglectam, vix sensibilem errorem inducere: & proinde à nimia istâ Magistri sui, ad scr. 2 aut 3, scrupulositate, liberius recessisse. Aut quod verisimilius videtur, Eclipseum momenta, ad consensum vitiosi sui Calculi, contrâ Observationes, violenter detorsisse, quæ jam ante vix ad octavam horæ partem, multò minus ad scr. 2 aut 3, sibi constabant.

Deinde: in Observationibus Eclipseon Solarium non parùm hallucinatum vidi. Nam defectum Anni 1567. Aprilis 9, cujus Medium Tycho Brahe scribit in Literis ad Clavium, se adolescentem Rostochii ad litus Maris Baltici, vidisse, in ipso quasi Meridie: celeberrimus Job. Keplerus, Opt. pag. 297. Uraniburgi ex Calculo Tychonis contigisse ait hor. 9. 19. scr. post meridiem: & de-

defecisse Dig. 6 scr. 29. Tycho vero, Progymn. Tom. 1. pag. 62. de Motu Luna, assignat ei ipsum meridiem, & digitos 6 scr. 20. & in aliâ schedâ ut testatur Keplerus, hor. 11 scr. 0. dig. 9 scr. 0. quâ nullo pacto conciliari possunt. Manifestum igitur est hanc Tycho-  
nis Observationem vitiosam esse, utpote, quæ neg. in tempore, neg. in magnitudine nullatenus sibi constat.

Anno 1600. 30. Junii, Keplerus Grati in Syriâ, observavit  
Quantitatem Eclipsos Solaris  $7\frac{1}{2}$  Dig. sub Altitudine Poli 47.  
gr. 2. scr., Optic. pag. 427. Tychonici in Arce Benaticâ, tantum  
Dig. 5. quanta etiam scribitur in Progymnasmatibus. Sed cùm  
Keplerus 3. gr. Australior; totidem fere (ut ait) scrupulis viderit  
Solem tectiorem; patet dictam Eclipsin Benatica apparuisse sal-  
tem  $6\frac{1}{2}$  Dig. ut discrimen sit  $1\frac{1}{2}$  Digiti: quod ulterius confirmari  
videtur Testimonio doctissimi Martini; quem ibidem, hoc u-  
num Keplerus excepisse dicit, quod notabiliter ultra Medium Sol  
defecern.

#### REFUTATIO.

**S**I Astronomus esset, & observationibus, tam cœlestium  
Phœnomenon, quàm Eclipsium, Lunarium æq; ac  
Solariū, assuetus Hortensius (aut ipse Lansbergi, ex quo  
has Calumnias hausisse videtur) nunquam discrepanti-  
am illam temporis, quæ ad pauca tantum minuta se ex-  
tendit, Dn. Tycho viçio vertisset. Ecquis enim tam  
perspicax est, qui initia & fines Eclipsium observando,  
etiam inter nubes quandoq; , præcise determinare po-  
rerit? Expertus id est Dn. Tycho, etiam in quatuor aut  
pluribus interdum studiosis, singulis seorsim ad singula  
instrumenta collocatis; Neq; id mirum; nam dum alii  
magis attenti, etiam asperginem umbræ, tam terrestris  
in deliquio Lunæ, quàm ipsius corporis Lunarior, in Sola-  
ri, à radiis Solis illustrata, (de qua supra) pro initio & fine  
Eclipsis acciperent; alii non nisi visibilem satis eorun-

dem defectum; factum est, quòd eadem Eclipses, etiam in iisdem locis, pro variâ observantium æstimatione, nonnihil variaverint; quantò magis in locis longiùs ab invicem distantibus, etiamsi differentia meridianorum eorundem aliàs satis esset cognita? Adhæc, neq; tempora ex observationib<sup>9</sup> Solis, Lunæ aut Stellarum satis certa acquiri possunt, nisi illæ in locis oportunis fuerint habitæ: Nam si circa ortum aut occasum instituantur, ibi Refractiones; si circa meridiem, ibi invariabilis ferè altitudo, aliquot minutorum errorem temporis important: ut nihil addam de Quadrantis insufficientiâ, & Horologiorum, si quis hinc tempora accipere velit, crebrâ à cœlo aberratione: ut vel ob has causâs, aliquem in nonnullis Eclipsibus effato Ptolemæi lib. 5. Almag cap. 10. ab Hortensio citato, locum demus; non verò omnibus, quas nunc certius, Tubo Optico adjuti, observamus ingruentes, quàm olim. Interim tamen, in illis per Organa sufficientiâ observandis tantum Dn. Tycho suo tempore præstitit, quantum aliqua valuit unquam humana industria: ut proinde discrepantiam illam in observatione Eclipsis Anno 1596. d. 9. Aprilis, à Dn. Tychone Rosstochii habitâ, quam Hortensius Kepleri testimonio, ex quadam schedâ, extendit, in tempore ad horam integrâ; in magnitudine, ad 2 $\frac{3}{4}$  dig. nugalem esse existimen; nisi eandem schedam manu Tychonis exaratam ostenderit; quod fortè faciet ad Calendas Græcas. Neq; enim verisimile est Dn. Tychonem, qui aliis veritatis & constantiæ Exemplar in vita fuerat, in tantum à seipso & veritatis tramite recessisse, ut quam in ipso quasi meridie 6 $\frac{1}{2}$  dig. observarat Eclipsin; eandem in alia scheda assereret plus integra hora anteveruisse, & 2 $\frac{3}{4}$  digitis observatâ majorem extitisse: licet Kepleri forte magnitudo 9 dig. ma-

gis

gis attriserit, ut qui imminutionem Eclipsium Solarium, in hisce Borealibus locis, satis notabilem, hactenus admittere noluerit. Deniq; quod Eclipsin Anno 1600. d. 30 Junii Benaticæ in Bohemia observatam attrinet, causam, cur illa, opinione Dn. Tychonis aut Longomontani, qui ejusdem observationi interfuit, major apparuerit, reddit ipse Longomontanus lib. 1. Theor. Astr. Dan. pag. 166. Et hæc quoq; Eclipsis, cum aliis nonnullis in Dania & Norvegia observatis occasionem ipsi præbuerunt Apparentiam Eclipsium in hisce Borealibus locis diminuendi; sicut & illa Anno 1608. ult. Julii, de qua pluribus infra agetur, ubi Hortensii improbationes circa Luminarium Semidiametros in disquisitionem vocatæ fuerint. Et hæc proinde momentis Eclipsium hic loci sufficiant.

#### TEXTUS HORTENSII.

**T**ertio: loca Luna extrâ Syzygias capta, non majori certitudine constare, didici. Nam pag. 125, Tom. 1. Progym. Tycho Anno 1587, Augusti 4, horâ 9 P.M. Altitudinem Luna Meridianam ex Observatione, ponit 15 gr. 1 scr. verum locum Luna in 7 gr. 31 $\frac{2}{3}$  scr. Capricorni: Latitudinem visam 5 gr. 14 scr. 49 sec. veram 5 gr. 0 scr. Borealem: quarum differentiam 8 scr. 49 sec. à Tycho sumit pro Refractione Luna. At pag. 460, assignat Luna Altitudinem visam 15 gr. 3 scr. locum verum 7 gr. 30 scr. Capricorni: Latitudinē veram 5 gr. 12 $\frac{1}{2}$  scr. Bor. Refractionē 0 scr. Differentia inter Altitudines Luna, est 2 scr. totidemq; inter utrumq; ejus locum. Inter Latitudines veras 6 $\frac{1}{2}$  scr. inter Refractionē pag. 460, & eam, quæ ex Tabula colligitur, scr. 2; & totidem inter Latitudinem visam, & veram posteriorem: deniq; si hac ut accuratius uti velis, deprehendes in loco Luna dimidio Gradu peccatum esse: nam ex Ascensione Rectâ & Latitudine prodit locus in 8 gr. 1 scr. Capricorni; assumptâ maximâ Solis Declinatione

10.

Loca Luna Extra Syzygias non rectè observata à Tycho.

23 gr. 30 scr. Verum quia Keplerus in Appendice ad Progymn. Tom. 1. hac excusare nititur, quod priori tempore, obiter, & perfunctorie dicta sint; quæ verò de Lunaribus Tycho scripsit, posterius elaborata & perfectiora; nolo hunc locum strictius urgere; sed conferre me ad illustre exemplum Observationis Luna 1587, Aug. 17: quod & Tycho Brahe, & ipsius Asspecta, in fidem Calculi ubiq. proferunt: ex quo etiam patebit. Declinationem Solis maximam, nostro seculo non esse majorem 23 gr. 30 scr.: quod supra præmisi me demonstraturum.

Anno igitur à nato Christo 1587, Augusti die 17, hor. 19 scr. 25 à Meridie; observatus esse scribitur locus Luna verus, per instrumenta Tychonica, in 26 gr. 23 scr. Geminorum; seu ut Longomontanus limitavit in 26 gr. 21 $\frac{1}{2}$  scr.: habens Latitudinem veram 5 gr. 13 scr. 15 sec. Australem. Vide Progymn. Tom. 1 pag. 023, & 114. Tab. Fris. Mulerij, pag. 409. Astron. Dan. Part. 2. pag. 123. Erat autem Luna, non in Quadraturâ Solis, ut refert ibi Tycho, sed penè in Aspectu Sextili; ejusq. Centrum in Meridiano, ut habet pag. 460, & ex assignato tempore deprehenditur. Pōnit enim locum Solis in 4 gr. 5 scr. Virginis; cujus Ascensio Recta est 155 gr. 59 scr.: huic additis 291 gr. 5 scr. quot competunt horis 19 scr. 25 à Merid. venit Ascensio Recta M. C. & Centri Luna, 87 gr. 14 scr. cui ex Tabulâ Ascens. Rectarum cedunt 27 gr. 28 scr. Geminorum; pro loco Luna ex simplici Ascens. Rectâ.

Quoniam verò Polus Eclipticæ non est præcisè in Meridiano, patet, locum Luna aliquatenus à Medio Cæli distare in Antecedentia Signorum. Adi ergò Canones Mediationum Cæli Regiomontani, in Dodecatemorio Geminorum, & videbis Ascensioni Rectæ 87 gr. 14 scr. cum Latitudine verâ 5 gr. 13 scr. Australi, deberi in Eclipticâ, 27 gr. 21 scr. Geminorum; qui est verissimus locus Luna.

Tycho Brahe, neglectâ differentiâ inter Medium Cæli, & locum Luna; ex aggregato Latitudinis Luna 5 gr. 13 scr. 15 sec. &

De.



Declinationis ejus 18 gr. 15 scr. 13 sec. Borea, accepit Declinationem Gradus culminantis 23 gr. 28 scr. 28. sec. quæ ei ex Tabulâ Declinationis Partium Eclipticæ, dedit 26 gr. 23. scr. Geminorum. At si simul Tabulam Accensionum Rectarum consulisset, ex Ascensione Rectâ 87 gr. 14 scr. invenisset 27 gr. 28 scr. Geminorum, quem locum nos tam ex Ascensione Rectâ, quam Declinatione Medii Cali sine respectu ad Latitudinem, collegimus.

Causa discriminis non alia est, quam Declinatio Solis maxima falso assumpta 23 gr. 31 scr 30 sec. Vidisti enim ex verâ 23 gr. 30 scr. locum Ascensionis Rectâ Lunæ, apud Tychonem & Regiomontanum eundem quidem esse; sed cum qui ex Declinatione Medii Cali colligitur, apud Regiomontanum plus integro Gradu esse proVectiorem: cujus unicaratio est, quod Angulus Eclipticæ & Equatoris  $1\frac{1}{2}$  scr. apud Tychonem major, locum ex Ascensione Rectâ, vix sensibilibiter in Eclipticâ alteret; locum verò ex Declinatione, plus integro Gradu retrahat versus Principium Arietis: ut sit in aliis Gradibus circa finem Quadrantis.

Porro, ut amplius confirmetur vera Zodiaci Obliquitas, tentabimus locum Lunæ verum, per Declinationem ejus & Latitudinem indagare. Itaq, quia locus M. C. & locus Lunæ ex Ascensione Rectâ ac Latitudine, inter se suprâ differebant scr. primis 7: Declinatio Lunæ totidem scr. secundis est minuenda, (tantum enim locus Lunæ in longitudinem, mutatur in scr. primis, quantum ejus Declinatio in secundis) ut fiat verissima declinatio 18 gr. 15 scr. 6 sec. Hac cum verâ Latitudine 5 gr. 13 scr. 15 sec. prabet ex Tabulis Declinationum Regiomontani, insolubili connexu, eundem prorsus Lunæ locum, in 27 gr. 21 scr. Geminorum: Argumento certissimo, Declinationem Solis maximam non excedere 23 gr 30 scr. ad quam Tabulæ Regiomontani constructæ sunt.

Et hoc illud Exemplum est, in quo, crassus & palpabilis Tychonis error, duo nobis ob oculos ponit. Primò: quæ de Lunari-  
bus

bus scripsit, et si posterius elaborata, non tamen idè perfectiora  
 esse; sed totam ejus Theoriam à Cælo esse alienam; utpote qua in  
 hac Observatione, qua tanquam fundamentalis proponitur, to-  
 to Gradu à veritate deficit. Tabulas quoq; huic & similibus Lu-  
 na Observationibus superstructas, Cælestia Phænomena, ut cre-  
 ditum hætenus, non amulari. Secundo: maximam Solis De-  
 clinationem, non esse 23 gr. 31 scr. 30 sec. quantam observavit  
 Tycho; sed tantum 23 gr 30 scr. quantam Regiomontanus. Land-  
 gravius & D. Lansbergius invenerunt: per hanc enim, locus  
 Luna in Eclipticâ, colligitur planè idem ex Declinatione, qui ex  
 Ascensione Rectâ. Quæ duo Astronomiam Tychonicam manife-  
 sta incertitudini obnoxiam esse, & Cælestibus Apparentiis non  
 convenire, aperte demonstrant.

Judicet nunc Lector Veritatis amans, an Calculo Luna,  
 & Observationibus Tychois, tanta sit habenda fides, quantam  
 eis inesse Tychonici neminem non jubent credere: & an non sum-  
 mo jure in illos retorquere liceat, quicquid Ptolemaeo quoad Ob-  
 servationes & Motum Luna, contumeliosè objiciunt. Nihil  
 enim apud eos frequentius, quàm Ptolemai Observationes, &  
 Theoriam Luna, à Cælo esse alienas: at quicumq; dixerit, Obser-  
 vationes Tychois in Lunâ erroneas esse, & Calculum iis super-  
 structum, fallacem an falsum duxerit, aut nimium? Non est  
 profecto artis, aliorum inventa sine causa subvertere; sed ve-  
 riora adferre, hoc opus, hic labor est: eòq; minùs toleranda, in-  
 signis Longomontani in Ptolemaum injuria; qua pag. 298, Par.  
 2. Astr. Dan. Observationem ejus in dubium vocat, quia cum suâ  
 Cursus Lunarum Hypothesi non convenit. Testatur enim Ptole-  
 maus, lib. 10. Magni Operis, cap. 4. quod Anno secundo Antonini,  
 Tybi 29, Venus erat inter borealissimam Fixarum, quæ sunt in  
 fronte Scorpij, & Centrum Luna apparens; & ad rectam cum  
 illis lineam; &c. Longomontanus autem, vult locum Luna vi-  
 sum secundum Ptolemai supputationem verius, quàm Observa-  
 tionem,



tionem, adsignatum. Item, lineam illam rectam, exensari aliter non posse, quam ut stella in fronte Scôrpii, Venerem atq; Lunam, per eandem ita respexerit; ut ipsa Luna dodrante gradus, provelletior appareret. Quibus verbis ostendit se Observationes Ptolemæi, ad quas præcipuè accommodandus erat Luna Motus; pro lubitu trahere ad vitiosam suam Hypothesin: & ex cæco affectu ergà proprium Calculum, Observatori fidem derogare, quasi dodrantem gradus visu nequiverit discernere. Quæ Longomontani temeritas in redarguendo Ptolemæo, non erat silentio prætercunda; ne præstantissimum artificem, aut cæcum fuisse, incautis persuaderet, aut Motum Luna non habuisse perspectum. Nam & veram esse Observationem, cogit credere, insignis cum hic, tum alibi, Ptolemæi Diligentia, & Amor Veritatis: & Calculo Luna, quoad motum Longitudinis, à Calo non adeò abire diversum, vel hoc solo videtur comprobari, quod Prosthapharesin Luna maximam in Syzygiis & Quadraturis, vera longè vicinorem per proprias Observationes invenerit, quam Tycho Brahe, & Longomontanus. Concludimus itaq; istam Luna in tali lineâ, ad Signorum Consequentia, cum Planetâ & Stellâ dispositionem, fuisse: quia Tychonici legitimam & Cælestibus Phanomenis congruentem Luna Hypothesin, non adhibuerunt. Restitutionem item Luna universalem, ab iis factam; ideò maximè labefactari, quòd à Ptolemæo descerepet; & Calculus cum Observatione, uti decebat, non conveniat. Sed quia de Calculo, mentio incidit, videamus quæso quid amplius in Theoria Luna Tychonica desideretur.

#### REFUTATIO.

SI hic existimaverit Hortensius cum suo Præceptore, Lansbergio, Dn. Tychonem ex solis trium istorum, Exemplorum lib. I. Progym. pag. 459., unde Parallaxes Lunæ venabatur, propositorum altitudinibus meridianis & temporis annotatione, loca Lunæ secundum lon-

H

gicu-

gitudinem acquiſiſſe, & non potius è diſtantiâ à Stellis,  
 Fixis longè à veritatis viâ exorbitat, id quod obſervatio-  
 nes ejusdem Lunares, ubi cum aliis lucem aliquando vi-  
 derint, ſufficienter convincent. Neq; enim Dn. Tycho,  
 cum vulgo Aſtronomorum, è loco Solis, & temporis,  
 quo Phænomenon Meridianum tranſit; reſolutione, lo-  
 cum Lunæ aut Stellarum, tantum inveſtigavit, probe in-  
 telligens hans viam eſſe lubricam: Nam hic 4. minuta  
 in tempore, ex Horologio, Linea meridiana, Stellævé  
 alicujus obſervatione, Horizonti aut meridiano nimis  
 vicina, ut antea dictum, aberratio; integri gradus varia-  
 tionem longitudini Phænomeni obſervandi importat;  
 ſicut etiam cum momentum diſtantiæ Lunæ à Stella  
 Fixa obſervatæ non mox in idem Tempus cum altitudi-  
 ne meridianâ ejusdem cõciderit, aut eò, ut decet, fue-  
 rit reductum. Quin & verba ipſius Tychonis lib. I. Pro-  
 gym. pag. 023. ſatis innuunt, longitudinem Lunæ Anni  
 1587., alio modo fuiſſe acquiſitam, quam ex Altitudine,  
 meridianâ; inquit enim: Anno Chriſti 1587. d. 18. Augu-  
 ſti, h. 7. m. 25. ante merid. obſervatus eſt per noſtra inſtru-  
 menta, verus locus Lunæ 26 p. 23. m. II.: imò, ſi rectius  
 attendiſſet Horſenſius, nec Larva Autoritatis Lanſber-  
 gianæ ipſi impoſuiſſet, vel potius impoſita fuiſſet, idem  
 ipſum docere potuiſſet obſervandi proceſſus: Nec enim  
 prius veræ Lunæ inveſtigatur declinatio, quàm Longi-  
 tudo; ut vel hinc docti intelligant, juſtum in hoc Exem-  
 plo D. Tychonem reprehendendi, ipſi deſuiſſe occaſio-  
 nem; licet interim hinc ſuam Eclipticæ obliquitatẽ 23  
 gr. 30 m. in velitatione noſtra tertia proſtratam, non tan-  
 tum confirmare; ſed totam Tychonis Lunæ Hypothe-  
 ſin diſturbare allaboret; ut nullus dubitem, ſi talibus per-  
 exerit nos involvere ſubtilitatibus Horſenſius, ſive ipſe  
 Lanſ-

Lansbergius, nec alia via loca Lunæ investigaverit, quàm  
hactenus factū; quin alia ipsi opus sit, præter suppositā,  
Lunæ Hypothesi, infinitis fermè Anomaliis consuendā.  
Præterea, Redargutionem Hortensii, circa æstimationem  
observationis Ptolemaicæ à Longomontano pag.  
298, part. 2. Astr. Dan. adhibitam, quàm odiosè satis exa-  
gitat, quod attinet; illa non magni est momenti: ibi si-  
quidem Longomontano ferè tantum controversia exi-  
stit cum Ptolemæo de loco Lunæ apud eundem paulò  
ultra gradus semissem majore, quàm reformata Hypo-  
thesis per omnes circumstantias admittit: Et ideo etiam  
Longomontanus in figendā Epicycli orbis Veneris Ano-  
maliā; non hâc, sed antiquā Timocharidis uti voluit. Et  
obsecro, Hortensii, quoniam tam strenuus observatio-  
nis hujus Ptolemæi defensor esse velis, cur non etiam  
Hypothesis Lunarum in universum? Cur non latitudi-  
nem Lunæ maximam 5 gr. cum eodem lib. 5. Almag. c.  
12., ubiq; retines? Quis te docuit eandem juxta accura-  
tissimas Dn. Tychonis observationes ultra gradus qua-  
drantem penes Quadraturas augere? Et, cur quæso cras-  
sum ejusdem Ptolemæi errorem cap. proximè sequente,  
circa Lunæ Parallaxes, etiam ex observatione ejusdem  
provenientem, juxta Lunæ Quadraturam, non propu-  
gnas? quam Nic. Copernicus lib. 4. Revol. cap. 2. primus  
merito castigavit & emendavit, tota Lunæ Theoria ob  
eandem causam renovata: Cujus etiam Restitutionem  
per omnia æmulatur Ph. Lansbergius in sua Uranome-  
tria, præter reciprocam quandam, si non ridiculam, or-  
bis Lunarum Anomaliā, quam absq; evidenti causā in  
Hypothesin ejusdem introducit. Sed de Parallaxibus  
infra, secundum ordinem ab Hortensio servatum plu-  
ribus agetur.

TEXTUS HORTENSII.

11. **H**anc non tantum ob inconstantiam Observationū, à Cælo dis-  
 Theoria. sentire certum est, sed etiam quia Tycho ei multa addit de  
 Lunę Ty suo, quæ in Cælo talia non observantur. Primò enim, Progym-  
 chonica. tom. 1. p. 05. de Motu Luna Prosthaphæresin Luna maximam in  
 à cælo Syzygiis, quam Ptolemæus invenit 5 gr. 1. scr. Alphonsini, Coper-  
 dissentit. nicus, D. Lansbergius 4 gr. 56 scr. facit 4 gr. 58 scr. 30 sec. Non  
 quòd reverà tantam ex Observationibus indubiis invenerit;  
 sed quòd pro more suo, medius iuverit inter Copernicum & Ptole-  
 mæum; ratus se hoc modo non longè à vero abiturum. Heic enim  
 ut ait Longomontanus, eodem cum animo fuisse, quo in assu-  
 mendâ distantiâ Solis, quæ quæso religio erit suspicari? quin pro-  
 bat idem res ipsa: nam subductâ Æquatione Copernici à Ptole-  
 mæicâ, venit differentia 5 scr. cuius medium, 2 scr. 30 sec. uni ad-  
 ditum, aut alteri demptum, reddit Æquationem TychoNICAM,  
 4 gr. 58 scr. 30 sec. præcisè.

REFUTATIO.

**C**ausam hic reddit Hortensius geminam, cur Theori-  
 am Lunæ TychoNICAM à cælo discrepare existimet;  
 nempe inconstantiam observationum, & additamenta  
 eorum, quæ in cælo non observantur. At utraq; hæc re-  
 latio falsa est, ad criminandum & calumniandum tan-  
 tum excogitata: Nam quantum roboris illis infuerit,  
 quæ hætenus pro observationum discrepantia ab illo  
 sunt allata, cuivis intelligenti vel è præmissis relinquo æ-  
 stimandum. Sed de Additamentis jam dispiciemus.

Initio reprehendit Hortensius Dn. Tychonem, quòd  
 maximam Lunæ Prosthaphæresin in Syzygiis cum Sole,  
 non observando; sed media via, pro more suo, inter Pro-  
 lemæum & Copernicum incedendo sit affecutus &c. At  
 ego dico prudenter fecisse Dn. Tychonem, in altitudi-  
 ne Solis à terra capiendâ; cùm illa, ut antea ostensum,  
 ob-

observatu vix sit possibilis : & tamen propterea nemo facile crederet, Dn. Tychonem hanc Lunæ Prosthapharesin maximam, 4 gr. 58½ m. propter observationum Lunarium defectum, è Ptolemæo & Copernico, vel horum media limitatione, emendicasse, & non potius ex observationum ad tot Eclipses in Huæna habitatum collatione, tantam adinvenisse. Nam complura ejusmodi, ante latentia, simili hîc investigavit industriâ ; ut I. Lunam se non medio, sed vero motui Solis ubiq; accommodare II. Æquationem Eccentricitatis Lunaræ æquædari, ac in reliquis Planetis, præter Solem, quod & Paralaxes Lunæ rectè examinatæ contestantur. III. Celeriorrem aliquantò esse Lunæ motum prope Syzygias, quàm Quadraturas ; & hanc inæqualitatem circa medias à Syzygiis in Quadraturas digressiones, ad 40½ m. se extendere, citrà seu in egressu addenda ; ultrà, seu in regressu, subtrahenda. Hæc tria Dn. Tycho ex Eclipsibus, & aliis accuratissimis Lunæ observationibus, circa ejusdem longitudinem, primus patefecit, tanta in omni Lunæ Revolutione constantia, ut non dubitarit eadem perenni Lunæ Hypothese includere ; quicquid interim, sive Keplerus cum suis 10 m., sive Lansbergius ac Hortensius, reluctentur. Sed hunc ulterius audiamus.

#### TEXTUS HORTENSII.

**S**ecundo : Prosthapharesin maximam in Quadraturis, ibidem 12. facit tantum 7 gr. 28 scr. cum Hipparchus, Ptolemaeus, Al-Tycho phonsus, Copernicus, D. Lansbergius, unanimi consensu invenerint 7 gr. 40 scr. Neq; obtinuit eam Tycho ex Cælo, sed ex bise- minus amplam  
Etione prima inæqualitatis Lunæ, uti in reliquis Planetis. Nam constituit  
si 4 gr. 58 scr. 30 sec. biseces, dimidium 2 gr. 29 scr. 15 sec. priori Prosthapharesin  
addas ; prædabit Æquatio maxima in Quadraturis 7 gr. 27 scr. maximâ  
45 sec. Lunæ



in Qua-  
draturis.

45 sec. aut si differentiam utriusq. Equationis 2 gr. 29 scr. 30 sec. duplices, redit Aequatio prima 4 gr. 39 scr. Id autem nequam fieri debere in Luna, monet & vera differentia inter Aequationem maximam in Syzygiis & Quadraturis; quæ demonstrante D. Lansbergio, ex infallibilibus Observationibus, est 2 gr. 44 scr. dimidio primæ Equationis Tychonice, 15 scr. major: & dissimilitudo in quibusdam Planetis. Et si enim bisectio Eccentricitatis, in tribus Superioribus locum habeat, non valet tamen in Sole & Venere. De Venere, ex suis Observationibus nos certos reddit D. Lansbergius; de Sole, propria Observationes per Tubum Opticum peculiariratione instituta.

Nam ex quo Sententiam doctissimi Joh. Kepleri, de bisectio-  
ne Eccentricitatis Solaris, præcipuè hinc conceptam legi; quòd  
per subtilem Observationem Diametri Solis, se compèrissè arbi-  
traretur Proportionem Diametri Apogææ ad Perigæam, quæ est  
30 ad 31, seu 125 ad 129; cæpi eandem Proportionem per Tubum  
Opticum explorare: & tertius nunc abit Annus, quòd manente  
eàdem Tubi diductione, invenio eam, ut 125 ad 133 ferè; quantũ  
in rapidâ Disci Solaris translatione, & tremore limbi; oculis &  
circino, inter diversæ quantitatis circulos, discernere possum.  
Quod idcò addo; quia non sum nescius, etiam per hunc modum,  
post extremam diligentiam, posse nos de tertiâ scrupuli parte  
adhuc ambigere; sicut manus operi admoventi, facillè apparet:  
& miratus sum aliquoties, Keplerum pag. 341 Opticor: non plus  
dimidio scrupulo, à seipso dissentire. Licet enim utrobq., motus  
& trepidatio Solis rapida, visum turbet; longè tamen major  
limbi Solaris præcisio, per Tubum offertur, quàm per Foramen:  
cujus diversa quoq. quantitas, præcisionem aut impedit, aut ad-  
juvat; ut facetur idem, Optic. pag. 300 & 301. Quocircà ex no-  
strâ Observatione, certius quàm Keplerianâ concludi potest;  
bisectio Eccentricitatis, in Theoriâ Solis locum non habere:  
sed eum reverà nobis in tantum recedere, quantum aliundè per  
Calculum colligitur.

Hac

*Hac per occasionem de bisectione Eccentricitatis Solis; quam etiam in Lunâ haud esse concedendam, ex Proportione Diametri apparentis liceret concludere, nisi res esset difficillima, & scrupulosissima, Diametrum Lunæ per Tubum (ut de Foramine taceam) ad scrupulum observare. Itaq; cum aliundè per Observationes certissimas comperiatur, maximam Equationem in Quadraturis esse 7 gr. 40 scr. non 7 gr. 28 scr. satis hinc perspicitur, bisectionem primæ Inæqualitatis non esse admittendam. De Venere (non longius à Proposito abeam) nunc plura non addo: ubi Theoria D. Lansbergii lucem viderint; dictorum veritas Lectori abundè satis fiat perspicua.*

REFUTATIO.

**Q**Uæ jam subnectit Hortensius circa Lunæ longitudinem, de maxima ejus Prostaphæresi in Quadraturis, ea magis ex odio Dn. Tychonis, & amore Præceptoris, quàm studio veritatis profecta videntur. Nam posito, quòd Copernico, aut etiam Lansbergio, de quo tamen dubitatur, ex una aut altera Lunæ observatione, non circa Quadraturas exactâ (nam hic plura ad solidam ejus certitudinem requiruntur) maxima Lunæ digressio inventa sit 7 gr. 40 m.; non statim sequitur, ideo illam ex plurimis Dn. Tychonis accuratioribus observationibus (quales illas vult esse, quæ lib. I. Epist. Astr. pag. 39. extant) inter se collatis, 12 minutis minorem esse non potuisse. Ostendat autem Hortensius, infallibiles illas Lansbergii observationes, unde demonstrare satagit, maximam Lunæ à Syzygiis in Quadraturis digressionem, esse 2 gr. 44 m. Quod nî fecerit, certò statuet cuncta hæc, quibus D. Tychonis observata suspecta reddere conatur, cælum perpetuò exhibere; quod etiam ulterius manifestabitur, quando illa, quæ etiamnum in Thesauro Observationum Dn. Tychonis delitescunt, fuerint publi-

publicata. Interea, si proportionatas *Æquationes* in Hyppothesium constitutione nōlit admittere Hortensius, ipsam naturam impugnare v. detur, certo numero, Sap. II. v. 21 mensurā ac pondere dispositam. Reliqua, de bisectione Eccentricitatum in Planetis, quibus Calumnias suas exornat Hortensius, prætereo; cum impertinentia sint, & Keplerum magis, concernant; nisi quatenus sub finem, ad Lunam torqueantur, cūjus integram Eccentricitatem absq; *Æquatione* retinendam, ex conficta magnitudine apparentis Diametri Lunæ, suaq; Parallaxium mensura, concludere videtur Hortensius; sed quā ipsū hęc opinio fallat, in sequentibus, Deo dante, ostendetur.

#### TEXTUS HORTENSII.

13. Tycho constituit differen-  
tias Parallaxium in Luna ju-  
sto minores.

**T**ertio: Tycho Brahe differentiam Distantiarum Luna à Terrā, constringit ad  $8\frac{1}{2}$  Semidiametros Terrā; quam Copernicus extendit ad 10 Semid. 4 scr. Et Distantiam Lunæ maximam in Syzygiis, facit 58 Semid. 8 scr. in Quadraturis, 60 $\frac{1}{2}$ ; cūm Ptolemaeus, Albategnius, & D. Lansbergius, in Syzygiis invenerint 64 Semid. 10 scr. Reprehendit quog. Copernicum, Progym. tom. 1. pag. 119. quod etsi Theoriam Lunæ aptiorem quā antea erat in usu, ingeniosè condiderit; tamen & eam, Luna à Terrā Divagationes, nimis ampliantem, inconsideratè admiserit: quia scilicet Parallaxium Observationes, differentiam Distantiarum,  $8\frac{1}{2}$  Semidiametris Terræ, non majorem, sed potius aliquantò minorem patiuntur. Sed quantum Tychonis Parallaxium Observationibus fidendum sit, vel ipsa sex Exempla, pag. 460 & c. producta, edocent: in iis enim hoc unum agitur; Latitudine & Refractione Lunæ, etiam idèò immutatis: quas si nihilominus pro veris recipias: adhibita distantia Lunæ à vertice, invenies ejus Remotionem à Terrā, in Exemplo, Anni 1587, Augusti 17. 63 Semid. 32 scr. 1583, 12 Octob. 62 Semid. Terræ: ut pateat,



patcat, Tychonem vel ab his Observationib. potuisse edoceri, Lunam Apogeam in Quadraturis, longè transcendere 60 $\frac{1}{2}$  Semidiametros. Si enim juxta ejus Sententiam, Copernicaas Parallaxes sic comprobent, ut in ipso penè scrupulo consentiant; comprobabunt quoque Copernicaas Lunæ Distantias; quæ Tychonicas tam in Syzygijs & Quadraturis, quàm extrà eas, longissimè excedunt. Unde fit evidens; cum Hypotheses formasse ex propria Opinione, quâ Lunam in tantum à Terris non digredi, sibi persuaserat; neque affectum esse, veram ejus Distantiam: si enim illas ex Observationibus extruxisset, non fecisset Lunam Apogeam adeò humilem in Quadraturis; cum extrà eas, penè tribus Semidiametris altiore, ex proprijs ejus Dedomenis demonstraverimus.

Id autem imprimis admiratione dignum; Tychonem, qui tot Cometarum Distantias à Terrâ, per parallaxes novit ad scrupulum determinare, non accuratiorem prodidisse Distantiam Lunæ: facilius enim hoc, in perennibus & Mundo coevis Corporibus, quàm in caducis istis, & citò evanescentibus: & qui illic Lynceo perspicacior erat, quomodo potuit hîc cacutire, ubi tot commoditates se offerunt, quæ in Observatione Cometarum vix ullibi inveniuntur? Sed datum est in illis examen Posteritatis subterfugere, & Parallaxes adscribere pro lubitu; in Lunâ non item: manet enim, & manebit ad Finem Mundi; cui libet occasionem relinquens, Distantiam ejus diligentius explorandi: quæ quidem ex diligentissimis Observationibus D. Lansbergii, in Syzygijs maxima, est 64 Semid. 10 scr. in Quadraturis 60 Semid. 18 scr. Differentia autem à minimâ, in Syzygijs, 10 Semid, 10 scr. in Quadraturis 15 Semid. 40 scr.

Quod si nihilominus pertinaciter iis inhæreas, quæ de Cometarum Parallaxi & Distantiâ Tycho tradidit, cedo cur nobis non determinavit Parallaxin Diurnam, & per hanc, Distantiam reliquorum Planetarum? Scio eum tentasse in Marte; sed

etiam, Anno 1597, Decemb. 10, dimidium Gradum aberrasse, in loco maximè oportuno, ad probandas Martis Parallaxes, ut testatur Doctissimus Joh. Keplerus, in Comm. de Motu Martis, pag. 62 & 63. Deceptum quoq; à Ministris, in Observationibus Anni 1582, ut videre est pag. 64. Scio Keplerum in Epit. Astr. pag. 479 & 886, fateri, Parallaxin Martis, ex iisdem Tychonis Brahe Observationibus supputatam esse insensibilem, & ob Radiorum explicationem vix observabilem. Sed nolo nunc ista ulterius persequi: quicquid enim in Marte observatum; à Motu Solis, Declinatione maximâ, locis Fixarum, præsertim in medietate Zodiaci Australi, & à Modo observandi per Distantias, adhuc longè redditur suspectius: redeamus potius ad Lunam.

#### REFUTATIO.

**I**N præscriptis verbis conatur Hortensius Eccentricitatis Lunaræ Equationem, è pluribus exquisitissimis Dn. Tychonis Observatis, ut supra introductam, rursus eliminare; in considerationem adductis prioribus ejus Observationibus, è lib. I. Progym. pag. 459 &c. quas tamen habuit, non tam pro Theoriâ Lunæ conficienda; quàm ut ex iis Lunæ Parallaxes utcunq; inquireret, & cum Copernicæis conferret, pro loco Stellæ novæ Anni 1572 supra Lunæ confinia ostendendo. At si dictas observationes strictè urgere voluerit Hortensius, haut fuerit difficile easdem, adhibitâ Nodorum inæqualitate, aliisq; requisitis (hoc quoq; non neglecto, quòd Altitudines, quæ duobus simul Quadrantibus capiebantur, altiores hinc sint selectæ, ut ex iis Parallaxes Copernicæis quodammodo redderentur æquales, licet his semper majores, sicut ibidem videre est) cæteris reconciliare, ut quæ differentiam distantie Lunæ à Terrâ non ultrâ dimidiæ Eccentricitatis exigentiam; nempe  $8\frac{1}{2}$  Semid. Terræ identidem astruant. Et talem postea quoq; Dn. Tycho, imò minorem,

norem,

norem, lib. 1. Progym. pag. 123 ex duobus accuratissimis  
 Lunæ observationibus, tam juxta Apogæum, quàm Peri-  
 gæum, Lunâ utrobiq; è Refractionibus liberâ, demon-  
 strabat: qualis quoq; in omnibus aliis observationibus,  
 ubi publici aliquandò juris factæ fuerint, declarabitur:  
 Sicut & mediam Lunæ à Terra distantiam, non superare  
 56 Semid. Terræ, id quod in Huânâ tribus ultimis Annis  
 1595, 1596, & 1597 summâ industriâ acquisivit Dn. Ty-  
 cho, in primis ab observationibus Lunæ in meridie circa  
 Tropica puncta versantis; unde etiam Longomontanus  
 in hisce parallaxes Lunæ lib. 1. Theor. Astr. Dan. pag. 151,  
 fundare voluit. Et sic liquet Hypothesin Lunæ Tychoni-  
 cam, etiam hâc in parte frustrâ ab Hortensio impugnatâ  
 esse: licet interim non desinat, tanquam Triumphator,  
 facilitatem Parallaxium Luminarium inquirendarum,  
 præ Cometarum & Martis, deprædicare; mireturq; Ty-  
 chonem, qui in Cometarum distantis à Terra per Paral-  
 laxes determinandis tam fuit scrupulosus, in Lunâ tant-  
 operè fuisse hallucinatum; nec Parallaxin ejus diur-  
 nam; & per hanc, distantiam reliquorum Planetarum  
 determinasse &c. quæ singula, dum in Tychonis contu-  
 meliam prolata existimat; propriam prodit, in hac Ar-  
 te, apud intelligentes, inscitiam.

TEXTUS HORTENSII.

**Q**uartò: Prosthapheresin Nodorum, & Variationem in Lu- 14.  
 nâ à nemine hucusq; Astronomorum observatam; Tycho  
 locis intermediis, inter Syzygias, & Quadraturas inducit. illa  
 efficit Motum Latitudinis Medium inaequalem, & cum maxima  
 est, excrescit ad 1 gr. 45 sc. hac, Medium Motum ipsius Lunæ;  
 & est 0 gr. 40 1/2 scr. quanquam non ubiq; sibi consentiens reperta  
 sit, sed vaga intra 10 scr. ut testatur Joh. Keplerus, Epitom. Astr. 14.  
 pag. 816. Verùm D. Lansbergius diligentissimè expensis Solis, Lu-  
 rectè ejus

inferuit  
Hypo-  
thesi.

*naq. Defectibus; quin & Cursu Lunari Calestibus Apparentiis collato; neg. Prosthapharesin ullam in Nodis, neg. Variationem Motu Luna potuit deprehendere; at contra Equalitatem utrobique manifestam uti suo tempore sufficienter declarabit. Nec est quòd Tychonem per indubias Observationes easdem è Cælo primum deprompsisse quis putet: nam quod exstructam Luna Theoriam, quàm Cælo exactissimè convenire putabat, quoties loca observata à Calculo discrepabant, Causam non in falsam suam Theoriam, sed potius novas Luna Anomalias contulisse videtur, easq. Posteris obtruisse, quasi reverà in Cælo essent conspicua: cùm contra Hypotheses emendanda fuissent; que per partes exstructa, ad universalem consensum revocari non poterant, sine immutatione priorum inventorum, quod nunquam effecit. Huc accedit, quod loci Luna ob inevitabilem Parallaxeos intricacionem, & difficillimam Temporis Cognitionem, Instrumentis non sint ad amussim observabiles: quod ut nullus Tychonicorum facillè concesserit, (quid enim non præstituisse videri volunt, suis Instrumentis?) sic veteris illi Astronomie Principes, & scivere, & pro summo suo candore, Posteris pramonuere. Testatur n. Ptolemeus, disertis verbis, Magni Operis Lib. 4. cap. 1. Illud apprimè tenendum esse; quòd non simpliciter, neg. casu, Observationibus (qua ad Lunam pertinent) utendum sit; sed ad Universales quidem Apprehensiones, illis præcipuè Demonstrationibus attendendum, qua non solum ex majori tempore, verum etiam ab ipsis Observationibus Lunarium Eclipsium capiuntur. Istis enim duntaxat exquisitè locum Luna verum posse inveniri. Alias verò, sive per Transitum juxta Stellas fixas, sive per Instrumenta, sive per Eclipses Solares considerentur; propter Luna Parallaxes non parum fallere posse. Ad particulariora verò Accidentia, etiam ab aliis Observationibus considerandum esse. Et paulò post: his de Causis ad Universalem, non Apparentium, sed Verorum Luna locorum considera-*

derationem, Defectus ejus accipi debent: & ad hæc, quoniam quod quidem ordinatum & simile est, necesse est ut inordinato atq. dissimili, anteponatur. Quare aliis quidem Observationibus, in quibus visu Observantium, Stellarum loca capiuntur, non esse utendum asserimus: solis autem ipsius Lunæ Defectibus; quoniam nihil ad deprehensionem locorum, Visus in ipsis conducit. Digna certè aternâ memoriâ admonitio; ex quâ satis patere arbitror, veteres Astronomos, nihil quod Arti impedimento esse possit, dissimulasse: tum etiam judicari posse, quâ certitudine Tychonici Universalem suam Lunæ Restitutionem Observationibus per Instrumenta superstruxerint; & Prosthaphæresin Nodorum, Variationemq. in Theoriam ejus invexerint.

Et sic quidem Motum Solis ac Lunæ, prout à Tychone restitutus creditur, consideravimus:

#### REFUTATIO.

**U**ltimum hoc est Horrensii in Theoriam Lunæ Tychonicam convitium, quo Prosthaphæresin Nodorum & Variationem prænominatam impugnat, tali Enthymemate: Tycho Prosthaphæresin Nodorum, & Variationem in octonis partibus à Syzygiis, seu medio inter has & Quadraturas loco Theoriæ suæ Lunari absq; cœli consensu inferuit: Ergò illam minus rectè constituit. Antecedens sequentibus confirmare nititur rationibus:

I. Quòd hæc duo à nemine hætenus sint observata.

II. Nec à Lansbergio, circa Eclipses, aut alibi deprehensa.

III. Quòd Tycho generali Lunæ Theoriæ falsò constitutæ novas toties affingat Anomalias, quoties illam à cœlo discrepare animadvertit.

IV. Quòd loca Lunæ extra Eclipses ob inevitabilem Parallaxeos intricacionem instrumentis ad amissim non sint observabilia, quod confirmare intendit Ptolemæi

testimonio lib. 4. Almag. cap. 1. & ideo talem admonitionem æternâ judicat dignam memoriâ.

Et hæc quidem satis speciosè, sicut & cætera ad illaqueandos imperitiores ab Hortensio proponuntur: Verum si ab hujus Artis gnaris ritè fuerint æstimata, ejusdem cum superioribus invenientur valoris, hoc est, nullius, prout nunc ordine declarabitur.

I. Si coelestes Revolutiones & Apparentiæ exactè cum veterum observatis convenirent; opus non fuisset illa novis institutis ad cœlum emendare: At cum in multis manifesta à cœlo detur discrepantia, haut immeritò & Nic. Copernicus totam Lunæ Hypothesin à Ptolemæo relictam castigavit & immutavit; & Dn. Tycho latitudinem Lunæ maximam ex accuratissimis suis observationibus recognovit, quam, mirum est Hortensium hic simul in Examen non vocasse. Ex Lansbergii verò Observationibus hætenus nullam in Lunâ extra Eclipses videre contigit, præter Altitudines quasdam meridianas, è quibus, cum neq; Hypothesis Longitudinis aut Latitudinis ritè confici; nec Parallaxes ritè mensurari possint; sequitur Hypothesin ejus Lunarem in Uranometriâ fabricatam, extra Systema Copernicæum, nempe in reciproco orbis Anomaliæ motu, nihil solidi continere, de quo etiam in superioribus aliquid est dictum.

II. Inconsiderantia est, si non imperitia, Hortensii simul & Lansbergii, quòd has Anomalias non suis locis, sed apud Eclipses inveniri existiment. Neq; enim Nodorum Inæqualitas, nec Variatio Lunæ nisi in locis inter Syzygias, & Quadraturas mediis, satis sensibilibiter percipiuntur: cum illa in Eclipsib. ferè sit inobservabilis; & hæc non nisi horario Lunæ Motu ibidem paulò concitatiore deprehendatur; ut proinde demirandum non fuerit.

Keple-

Keplerum de hâc Nodorum in Lunâ inæqualitate perpetuò dubitasse; & Variationem ejus vagam intra 10 m. semel fortè reperisse, ut qui observationibus Lunaribus pro Theoriâ ejus conficienda ita nunquam invigilârit, ut Tycho ipse, ac Ch. Longomontanus.

III. Ineptè hic quoq; reprehendit Hortensius Dn. Tychonem, non attendens totum, absq; sufficiente partium enumeratione, constitui non posse; neq; enim ulla vera ac generalis Lunæ Hypothesis, unquam dari poterit; nisi omnes particulares Anomalias in cœlo conspicuas in se comprehenderit. Legat Hortensius, si placet, Dn. Tychonem, lib. 1. Progym. pag. 05, de Variatione Lunæ sic verè loquentem. Verum, cum per multiplices & accuratas observationes experti simus, hos Circulos omnibus apparentiis necdum satisfacere; siquidem in octantibus sive mediis locis inter Quadraturas & Syzygias, cum Luminaria sequisigno inter se distant, adhuc inæqualitas quædam & differentia satis perceptibilis sese ingerat &c. ubi Dn. Tycho Variationem, de quâ hic agitur, pluribus describit, Lunæq; Hypothesi includit. At si in hîc Hortensius Dn. Tychoni credere recusaverit, cœlum ipsum adeat, Lunamq; circa dicta puncta, si poterit, observet, & quæ Dn. Tycho tot observationibusprehenderat, vera esse cognoscat. Porro, si variatio maxima, ab una parte, 40½ m. duplata fuerit, ostendet in cœlo differentiam utriusq; digressionis mediæ, à Calculo Copernici & Lansbergii 1. gr. 21. m.

Nec est, quòd hîc quis existimet, Dn. Tychonem circa cursus Lunæ observandos & in Hypothesin redigendos sponte à cœlo aberrare voluisse; & non potiùs certissimas suas observationes secutum; quæ certè tanti ipsi fuerunt, ut de eo maximè fuerit sollicitus quâ ratione

intemerata ad posteritatem propagari possent, id quod  
testatur ipse, cum alibi, tum lib. I. Epist. Astron. pag. 39,  
his verbis: Omnes cœlestes Observationes ad exactam  
amussim, quatenus in sensus humanos cadunt, instituen-  
das cenſeo: adeò ut si quid in his desideretur, vel tantil-  
lum, pro irritis habeam. Præterea, neq; abs re fuisset, si  
Hortensius ea legisset, quæ de Prosthaphereſi Nodorum  
habet Dn. Tycho lib. I. Progym. pag. 26 &c. ubi quatuor  
proponuntur Exempla de hac Nodorum inæqualitate,  
in ipsis Lunæ observationibus diligenter fundata; prius-  
quam in summum, omnium rectè ſentientium iudicio,  
Astronomum tam petulanter fuisset invecſus.

IV. Deniq; quod Testimonium Ptolemæi lib. 4 Al-  
mag. cap. 1. ab Hortensio citatum concernit; illud pa-  
rum aut nihil ejus cauſæ patrocinator, si rectè æſtima-  
tum fuerit. Quis enim cum Ptolemæo Eclipses Lunæ, ut  
maximè universales in ipsius Hypothesi eſſe diffitetur?  
cum in illis prima & poſſiſſima Lunæ digreſſio à me-  
dio motu ſit fundata. At quæ extra has, majori tempo-  
re, ſeu ampliori à medio digreſſione, accipiuntur, eam  
Ptolemæo infra appellantur particularia accidentia; ad  
quæ etiam ab aliis Observationibus conſiderandum eſſe,  
monet non modò hic Ptolemæus; ſed etiam ipſa ratio  
dicitur. Cœterum Observationes ejuſmodi ſi pluribus  
ſimul inſtituantur Organis ſufficientibus (qualia hæc-  
tenus Lantgraviana, & inprimis Tyconica, reputata ſunt)  
idq; multiplici iteratione, etiam diverſis temporibus, ut  
iis debita limitatio, collatioq; inter ſe & cum novæ Hy-  
potheſeos fabricâ poſſit inſtitui; nihil impedit, quo mi-  
nus locus Lunæ infra unum & alterum minutum cœlo  
congruus acquiratur, præcipuè in diſtantiis à Stellis Fixis,  
Luna juxta Nonageſimum Eclipticæ gradum, ubi nulla  
longi-



longitudini ejus adheret Parallaxis, existente: nec etiam hic Temporis Aequatio, ubi nulla sentitur, urgenda. Aliis locis, ubi loca Stellarum, mediante Luna, visu observantium capiuntur, non adeò utendum esse, monet hic Ptolemæus, cum Luna extra nonagesimum Eclipticæ Gradum inevitabilem habeat Parallaxeos intricacionem. Atq; cum hic genuinus verborum Ptolemæi sit sensus, pro Tychone maximè faciens, non video quâ ratione ipsi contrarius esse possit; nisi Hortensio ita existimante, cujus Calumniis etiam optimè ab aliis dicta quandoq; servire coguntur. Et hæc etiam pro Observationibus & Hypothesibus Luminarium Dn. Tychonis, contra criminationes Hortensii asserendis, benevolæ Lectori satisfactura confido. Sed cum interea non destinat Hortensius rursus ad Eclipses provocare, ut ex illis apparentes Luminarium Diametros ad præceptoris sui placitum confingere possit, etiam illa in considerationem vocabimus.

#### TEXTUS HORTENSII.

**R**estat, ut qua de Luminarium apparentibus Diametris tradidit, breviter excutiamus; initio factò à Diametro Solis. 15.  
 Hanc scribit Tycho Prog. Tom. 1. pag. 470, in Apogæo se observasse, non majorem scr. 30: in Perigæo scr. 32; idq; per Canalem 32 Pedes longum. Christianus S. Longomontanus, Astr. Dan. Part. 2, pag. 171, & 172, eandem quantitatem prodit quam Tycho Brahe. Job. Keplerus, Optic. pag. 341, Apogæam quæ rectè definitur, Tychonis Observationibus concludit; quæ à præcedente integro scrupulo deficit. Sed quàm facile Keplerus Tychonem 32 scr. in Perigæo posuisse dicit, Hypotheseos Eccentricitatis persuasione; tam facile retorquetur, Keplerum persuasione dimidia Eccentricitatis eam fecisse 31 scr. Observatione ejus per foramen in-

Tycho  
apparentes Lumi-  
narium,  
Diametros non  
rectè defini-  
vit.

K  
stra-

frumenti Ecliptici, nihilo certiore existente, quàm est Observatio Tychonis per Canalem. Et si enim hoc modo, vera Quantitas Diametri Solaris, non sit observabilis; Tychoni tamen, non alia potuit obvenire Proportio, quàm ut 30 ad 32: errore qui est in Apogeo circa Limbum Solis, recurrense in Perigæo: unde fit, ut ea, Proportioni nostræ superius expressæ, inveniatur penitus consentire.

Quod autem nec Tycho Brahe, neq. Keplerus, Observationibus suis veram Diametri Solaris quantitatem, affecuti sint; docuit nos difficultas observandi & eorum dissensus; tum præcipuè melior experientia Doctissimi D. Lansbergii. Difficultas observandi, consistit in motu & trepidatione Radii, in fallaciâ oculorum, in confusione Limbi, & in diversâ quantitate Foraminis. Motus & trepidatio Radii, quo longior distantia, hoc maior est; nec in minori omnino cessat: fallacia oculorum pro diversis Observatoribus, & tenebris inter Observandum, diversa confusio Limbi, ubiq. se insinuat; nec quicquam difficilius, quàm præcisum Radii terminum, visu internoscere: quantitas Foraminis, speciem Solis sensibilibus alterat; si enim nimis ampliatur, non fit sufficiens Radiorum interjectio, aut inerat nimium lucis; si nimis contrahatur, Species fit summe debilis, & immiscet se splendor Aeris circumstantis, ut fatetur Keplerus Optic. pag. 300. quis ergo Foramen ita accommodabit, ut infallibili dimensione metiri queat veram Solis Diametrum?

Dissensus quoq. inter dictos Autores, Observationem admodum lubricam indicat. Nam Optic. pag. 341, tradit Keplerus se ipsum Anno 1600 in æstimatione Diametri Apogæi,  $\frac{1}{2}$  scr. aberrasse: Tychonem autem 1591, vagam observasse à 28 scr. 40 sec. in 31 scr. 20 sec. & quinto Decembris 31 scr. quantam ex ejus Observationis computavit; cum tamen ille prodât 32 scr. Eundem, in Long. Mediâ, Anno 1578, observasse 30 scr. 6 sec. & 30 scr. 50 sec. discrimine 44 sec.: In initio, bis 30 scr. 4. sec. semel 29  $\frac{1}{2}$  scr. dif.

differentiâ 34 sec. Opt. pag. 342. Ex quibus perspicuum est, quanta sit incertitudo hujus Observationis, quæ tot impedimentis undiquaq; solet esse obnoxia: nec unquam ab eâ justam præcisionem expectandam, quantacumq; adhibeatur diligentia.

Quantum ad Experimentum D. Lansbergi, scito Reverendo huic Viro in Observatione Eclipsæ Solaris, Anno 1001 Decembr. 14, contigisse eam felicitatem, quæ nescio an à multis Annis ulli Mathematicorum obvenerit. Luna namq; Apogæa Solem Perigæum ita tegebat, ut superiore suo limbo, cum limbo Solis faceret Angulum Contactus; luxque perpetuo conamine niteretur Globum Lunarem quasi superare; quod tamen non evenit. Favebant etiam nubecula candida & rare, subinde intercurrentes, quo certior fieret Partis Residuae dimensio: quam in Medio Eclipsæ, cum schema Defectus prorsus conveniret cum Schemate Tychoonis Brahe, Progym. Tom. 1. pag. 136; observavit subtendere  $6\frac{1}{2}$  scr. proximè: unde, cum Diameter Luna Apogæa (de quâ postea) esse 30 scr. ejusq; limbus superior aliquantulum videretur excedere limbum Solis; patet certissimo experimento, Diametrum Solis Perigæi esse 36 scrup. proximè. Hic ergo casa est glacies, & tali Observatione confirmata Solis Diameter, quæ neque exceptionem, neque dubium ullum post se relinquit. Nam in qualicumq; Solis Defectu ubi talis commoditas deest, semper aliqua suspicio manet de Diametro aut Solis, aut Luna; ubi autem præsto est, quid facilius quàm Partem Residuam dimetiri? quâ obtentâ concluditur, Diametrum Solis in tantum excedere Diametrum Luna, quantum Partis Residuae Mensura ostendit.

Porrò, Diameter Solis in Apogæo, occupat 33 scr 34 sec. quod & ab Eccentricitate Solis, & ab Apparentiis aliarum Eclipsium, comprobatur D. Lansbergius; me verò Experimentiâ propria Die 1. Junii Anno 1029, edocuit. Horâ enim, à Merid. cymorta nebu-

la conspectum Solis impunè permitteret, observari ejus Diametrum Radio Astronomico; non nudis oculis, sed per lamellam æream minutissimo foramine pertusam; eratq. aliquoties distantia Pinnacidiorum  $39\frac{1}{2}$  partium, qualium index cum lamellâ 4102. Fiat ergò, ut 4102 ad  $39\frac{1}{2}$ , ita Radius 100000, ad 963 Tangentem 33 scr. 10 sec. Diametrum Solis apparentem. Sic eodem Anno, eademq. occasione, Octobris Die 12, observari Interstitium Pinnacidiorum, partium 41 proximè; undè efficitur Diameter Solis 34 scr. 30 sec. circa Longitudinem mediam. Sed neg. huic Modo, satis tuto fidere licet: eoq. malo Lectorem ab Observationibus D. Lansbergii, & universali Eclipsium consensu stare; quæ Apogæam Diametrum ostendunt, 33 scr. 34 sec. Perigæam 36 scr. In Mediâ Longitudine, 34 scr. 47 sec.

Secundò: Diametrum Luna plena in Apogæo, Tycho ponit 32 scr. in Perigæo 36 scr. Prog. Tom. 1. pag. 135. Longomontanus Astron. Dan. Parte 2, pag. 172, in Apogæo quidem 32 scr. sed in Perigæo tantum 34 scr.; addens, ex abitu suo à Bohemiâ, solidum minutū in Luna Perigæa semiametro, apud Tychonē abundare. At si Luna reverà totali Eccentricitate à nobis in Syzygiis recedat, ut ex accuratissimis Observationibus demonstrat D. Lansbergius, & Diameter Apogæa sit 32 scr. sequitur Perigæam debere esse scrup. 38; à quâ Tycho abest scr. 2, Longomontanus scr. 4. Si autem Diameter Lune in Apogæo assumatur scr. 30, erit in Perigæo scr. 35 sec. 38, cui Observationes propius accedunt. Refert autem Doctissimus Keplerus Optic. pag. 348, Tychonicos Anno 1592; 12 Februarii, Luna non humillimâ, prodidisse scr. 35. & 1588, Martii 2, cum tenderet à Perigæo ad Longitudinem Mediam, 33 scr. proxima est Diametro Luna juxta D. Lansbergium in Long. Mediâ 32 scr. 36 sec.; ac proinde eandem ferè, in Perigæo ostendit. Quoniam verò hisce Observationibus non est nimis insistendum, partim ob diversitatem Oculorum, & Pinnacidiorum, partim ob copiam Luminis nocturni, quæ monente

Kep-

Keplero, Observantiibus creberrimam errandi occasionem suppeditant; necesse est, de certioribus nobis prospiciamus.

Ha fiunt Appulsu Luna ad Fixas inter se vicinas; vel per Eclipses Solis. Appulsus Luna ad Fixas, Exempla duo pulcherrima refert Joh. Keplerus Optic. pag. 347: Anno namq. 1598, Martii Die 29, Luna circa Plejades versante, videbantur duae in occidentali latere Quadrilateri, longius distare, quam ut utramq. simul Luna tegere potuisset, siquidem super eas fuisset ingressa. Erat Luna inter Apogaeum & Longitudinem Mediam, Anomaliā habens circiter 10 Sig. 3 gr. Stellula autem, distant inter se 31 scr.: unde sequitur, Diametrum ejus fuisse aliquantō minorem, puta 30 scr. 44 sec., quantum prodit D. Lansbergii Calculus; & in Apogeo non esse majorem scrup. 30.

Simili Casu, Keplero 17 Julii, Luna Diametro aquare videbatur Distantiam clararum duarum transversarum in Plejadi-bus. Stellula inter se distant scr. 32 ferè, Lunag. 2 gr. 47 scr. aberat à Longitudine Mediā versus Apogaeum: unde in ipsā Longitudine Mediā efficitur aliquantō major, scilicet 32 scr. 36 sec. quantam exhibent Tabula D. Lansbergii: quae si rursus Distantia Luna in Apogeo & Perigaeo conferatur, praebet Diametrum Apogaeam 30 scr. Perigaeam 35 scr. 38 sec.

In Eclipsibus Solaribus non desunt Exempla, quibus ostendatur vera quantitas Diametri Luna Apogae: quas inter, duae sunt à Christophoro Clavio observatae. Prima contigit Conimbrie, Anno 1500, 21 Augusti; quo tempore, Sol circa Meridiem non modico tempore contactus latuit, & tenebra fuere, nocturnis quodammodo majores. Quo casu, oportet Diametrum Solis veram, saltem 30 sec. fuisse minorem Diametro Luna: cumq. illa fuerit 34 scr. 10 sec. secundum quantitatem, in Apogeo & Perigaeo ei à D. Lansbergio assignatam; consentaneum est, Luna Diametram fuisse 34 scr. 40 sec. idq. in Distantiā à Perigaeo, 1 sig. 14 gr.; unde rursus in Apogeo colligitur esse scr. 30.



Alteram Eclipsin Solis, memorat Clavius visam fuisse Roma, Anno 1567 die 9 Aprilis; quo Sol non totus defecit, sed relictus est exilis quidam Circulus lucens circumcirca. Erat Distantia Luna ab Apogeo 3 sign. 10 gr. ejusq. Semidiameter superabatur à Semidiametro Solis, demonstrante D. Lansbergio, besse unius scrupuli: erat autem Semidiameter Solis in illo situ 17 scr. 7 sec. à quâ ablatis 40 sec. restant 16 scr. 27 sec. pro Semidiametro Luna; ut tota fuerit 32 scr. 54 sec. Hæc iterum eodem consensu, in Apogeo dat 30 scr. in Perigeo 35 scr. 38 sec.

In aliis Eclipsibus Solis, quos quot à præstantibus Astronomis observata sunt, D. Lansbergius similem prorsus deprehendit harmoniam inter Lunam & Solem; ut dubitandum non sit, quin ea verissima sit Diametri Lunaris quantitas: & consentiunt ei aliquatenus Observationes Joh. Kepleri, quibus reperit Diametrum Luna 30½ scr. in Apogeo: Tycho autem & Longomontanus excedunt eam scr. 2, cum non sit 32 scr. sed tantum 30.

Tertio: Diametrum Luna in Eclipsibus Solis, promiscuè dimittit parte circiter quintâ; Apogeam statuens 25 scr. 30 sec. Perigeam 28 scr. 48 sec. cui Experientia aperte refragatur. Fateatur enim Longomontanus Astr. Dan. Parte 2, pag. 166, se in Bohemiâ Anno 1600, Junii 30, Eclipsin Solis, quam è suâ Luna Restitutione viz 4 Dig. futuram expectabat; plus quàm sesquialtero Digito majorem conspexisse: quam Apparentiam, etsi per Aeris majorem puritatem conetur excusare, neq. uni ut tum videbatur Miraculo, tot Observationes in Daniâ habitas, velit postponere; patet tamen, Diminutionem Luna Tychonicam evidenter eluisse. Nam quòd Aeris diversitatem atinet, ea inter Bohemiam & Daniâ tanta non est, ut Eclipsin Solis sesquialtero Digito majorem queat ostendere: hoc enim posito, necesse est etiam Refractiones in Daniâ longè majores fieri; cum ipse Tycho 2 scr. minores quàm in Bohemiâ invenerit, ut videre est in Observat. Hassiacis D. Snellij, pag. 86 & 114.

Sic Anno 1601, Decemb. 14. refert Longomontanus conspexitam fuisse Solis Eclipsin Bergis in Norwegia; Sole intra sui complexum ita Lunam comprehendente, ut undiquaq; luce sua sesquialtero Digito equaliter quasi emineret: additq;, quod Luna quamvis propè Apogæum versaretur, non tamen in reformatâ Hypothesi ita diminutâ Diametro conspecta fuisset, nisi densior Aer, & quasi vapor Oceani intervenisset. At non hac causa fuit istius Phænomeni; sed Diametri Luminarium in reformatâ Hypothesi malè constituta. Si n. semidiametrum Solis assumas 18 scr. Luna 15, eminebit de Sole in margine integer Digitus circumcircuit: cum verò non fuerit Eclipsis planè centralis, maximâ ex parte emittit Dig.  $1\frac{1}{2}$ , uti à Piscatoribus in littore vicino observatum est. Unde patet, Longomontanum cum dissensus est inter Calculum & Apparentias frustra ad Diminutionem Lune ob Aerem crassiozem confugere; ac proinde inutilem esse ejus Tabellam, pag. 176.

Sed longè illustrius Exemplum est, in Eclipsi Solis Anni 1608, ultimo Julii: hac n. teste Davide Origano in Ephem. Anni 1608; secundum Tychonem si Semidiater Lune ut in Conjunctionibus ab ipso constituitur, attendatur, nulla prorsus isthoc tempore notari potuit; sed Luna absq; contactu ullo Solem præterit: cum tamen Witteberga observata sit à Melchiore Joesstelio, Dig. ferè 2: & Goesa à D. Lansbergio Dig.  $2\frac{1}{2}$ : cujus Calculus prodit Wittebergæ defecisse 1 Dig. 37 scr. planè uti Joesstelius observaverat. Quo experimento, Diminutio Luna Tychanica in Novilunio, radicitus eversa est. Nam quod Longomont. Hafnia adhibitis quinq; accuratissimi visus Studiosis, nullâ se conspexisse dicat, nescio quam mereatur fidè; cum ad minimû apparere debuerit 1 Dig. 8 sc. ut patet ex Calculo D. Lansbergii. Nec potest confugere ad Densitatē Aeris, quippe quem adeo sensibilibus crassiorē esse in Dania, haud facillè cuiquam persuaserit. Sin parvis ferè concedas Crassitici, uti est omninò concedendus, tum Wittebergæ, & Goesæ,

*Goesa, dictam Eclipsin simili modo longè minorem fecisset; quod cum non contigerit; concludimus, neq. Diminutionem Tycho-  
nis, neq. Causam ejus, Longomontani, fundamentis Astrono-  
mie, & Experientie uti debebat inniti; sed purum figmentum  
esse, ex falsis, incertisq. Observationibus natum; quales suprà  
tam in Eclipsibus Solis, quàm Luna adduximus.*

#### REFUTATIO.

**D**iscursum hunc Hortensianum de Apparentibus Lu-  
minarium Diametris satis copiosum & uberem, quo  
suam & Lansbergii sententiam, non tantum contra D.  
Tychonem, Longomontanum & Keplerum; sed & Ve-  
teres, imò ipsissimas coeli Apparentias astruere, & vulgo  
persuadere allaborat; nos pro instituto nostro, quo non  
minutissima quæq.; sed præcipua tantum momenta ex-  
cutienda judicamus, cum ut omnis impericis adimatur  
serupulus, tum ut Doctoribus hæc aliùs pensiculandi de-  
tur occasio, eadem heic brevissimis diluemus.

Observationes igitur Semidiametrorum Solis &  
Lunæ, à Dn. Tychone & cæteris Astronomis habitas, ut  
in conspectu sint, sequenti includemus Tabellæ:

	juxta Ptol.	Copernic.	Tychonē.
Semid. Solis in Apogeo	15 sc. 40 sec.	15 sc. 50 se.	15 scr. 0 sec.
Semid. Lunæ in Apog.	15. 40	15. 0	16. 0

Has autem Semidiametros, ut incertitudinis arguat,  
Hortensius, nugatur Observationes D. Tycho-  
nis circa  
Diametrum Solis per Canalem 32 pedum sæpius pluriū  
Annorum decursu reiteratas, non esse tam certas, ac illas,  
quæ censurâ visus à Stellis Fixis sunt acceptæ: & ut Lans-  
bergianam Solis Semidiametrum Apogæam 16 scr. 47 se.  
Lunæ verò tantum 15 scr. 0 sec. confirmet; Eclipsium  
non-



nonnullas observationes in medium adducit; quæ tamen, si rectè expendantur, magis Dn. Tychoni, quam Lansbergio favent, ut nunc sumus ostensuri.

Initio itaq;, quantum Eclipsin Solis Anno 1601, die 14 Decembr. factam attinet; illa violenter in sententiam Lansbergii detorquetur: nam cum, hæc juxta Apogæum Lunæ contigerat, ideo Lansbergius, ut Parallaxeos Lunæ exiguitatem, quæ ejus Hypothesin Lunarem comitatur, defendat; non hic cum Hörtenſio Lunam ad contactum Limbi Solis septentrionalis, sed supra evehit in sua Utranometria pag. 76; & insuper Diametrum Solis, ut infra major ejus pars relicta cerneretur, pro obtento adauget: ut nihil dicam de Vaporoso aere, qui in altitudine Solis vix 12 gr. qualis tunc temporis Gocſæ fuit, multum ejus observationem adjuvare poterat, dum Diametrum Solis verâ aliquantulum majorem exhiberet. At si eandem Eclipsin considerationi eorum adhibuerimus, quæ Bergis in Norvegiâ sub Elevatione Poli 60 gr. circiter obveniant, illa ad Hypothesin Dn. Tychonis optimè quadrare deprehendetur. Nam cum Parallaxis altitudinis Lunæ à Sole, in altitudine utriusq; ab Horizonte 4 gr. circiter, inveniatur 56 m. proximè; & Parallaxis Latitudinis 54 min. Ideo, si Latitudo Lunæ vera 53½ m. à Parallaxi Latitudinis fuerit subducta, relinquitur visa Lunæ Latitudo tantum ½ m. meridionalis. Fuit autem Lunæ vera Diameter circa Apogæum non minor 32 min. per 10 minuenda; Et ideo visibilis Lunæ Diameter 22 min. Sed cum Solis Diameter in Perigæo fuerit 32 m. relinquebantur circumquaq; de Sole quasi 5 m., quod prorsus cum observatione congruit. Vid. Astr. Dan. Part. 2. p. 165.

Pergamus nunc ad Eclipses à Clavio observatas: earum prior, quæ contigit Anno Christi 1560, die 21 Augu-

Lib. 1. Cap. 1. Observ. 1. 11

si Conimbriciæ in Lusitania; si Calculo Dn. Tychonis, vel Longomontani in Astron. Dan. accommodetur, rectius ejus Apparentia salvabitur, quam per Lansbergium: Nam cum illic Lunæ Diameter fuerit  $32\frac{1}{2}$  m. ferè, cum verâ quantitate proximè conveniens, ob aerem in Lusitania satis purum; Et Solis  $30\frac{1}{2}$  m. relinquitur differentia 2. m. satis pro totali Solis, cum aliqua mora defectu, dummodo conjunctio ibi fuerit centralis. Atq; hic notari velim maximum Lansbergii absurdum, qui ut Diametrum Solis justò majorem à se assumptam excusare possit; fingit pag. 66 suæ Uranometriæ, Radios Solis circa totales formæ Eclipses contrahi, contra naturam Luminis ab Opticis demonstratam, ipsamq; adeò experientiam.

Altera Solis Eclipsis, quæ à Clavio dicitur observata Romæ Anno 1567, die 9 Aprilis, ubi Sol non totus defecerat. sed relictus est exilis quidam circulus undiq; circumlucens, itidem parum contra Dn. Tychonem concludit: nam cum Diameter Lunæ, juxta ejus Calculum fuerit 33 m. Ergo subtractis hinc 3; sec. relinquitur Apparens 32 scr. 25 sec.; Diameter autem Solis 31 scr., qui proinde totus à Luna rectus fuisset, nisi visibile Lumen Solis senon nihil dilataisset, ejusq; visibilis Diameter amplior extitisset, incrementum proculdubio, etiam à Vaporibus è Tiberi ascendentibus, præcipuè isto vernali Tempore, capiens. Et hæc etiam de Diametro Solis dicta sint; progrediamur ad Diametrum Lunæ. Hanc D. Tycho in Eclipsibus Solis quinta sui parte, communiter diminuit, quod tamen de Horizonte Uraniburgico præcipuè est intelligendum, ubi præcipuas Eclipsium observationes habuit, quæ extant lib. 1. Prog pag. 02.: Et certè, quotquot ibidem in Sole consignatæ reperiuntur, idem sufficienter convincunt, si ad Hypothesin Dn. Tychonis rectè fuerint accommodatæ.

Verum ut hæc Diametri Lunar̃s diminutio, uni-  
versalior, quoad fieri poterat, redderetur, Cl. Longo-  
montanus Astron. Dan. Part. 2. pag. 176, eidem Limita-  
tionem aliquam adhibere voluit; cujus etiam diminu-  
tionis analogiæ Eclips̃s Solis in Bohemia Anno 1600. ob-  
servata, satis benè correspondebat.

Sed ut aliquid etiam addam de Illustri Exemplo Ec-  
lipseos Solaris Anni 1608, ultimo die Julij, quo veritas  
Parallaxium & Diametrorum Luminarium secundum  
Dn. Tychonis Hypothesin non parum stabilitur. Illam  
præstantissimus vir & calculi Astronomici peritissimus  
D. David Origanus in suis Ephemeridibus ita describit;  
ut Semidiametrum Solis è Calculo Tychonico invenerit  
 $15\frac{1}{2}$  m. Lunæ verò, ex ejusdem D. Tychonis propor-  
tione tantum 13 m.; quæ tamen ex Astron. Dan. Part. 2. pag.  
176. emendata, evadit 15 m. ferè, utpotè ad Elevationem  
Francofurt. ad Oderam: Hisce itaq; Luminarium Semi-  
diametris in unam summam collectis, evadit Aggrega-  
tum  $30\frac{1}{2}$  m. à quo si subducatur Latitudo Lunæ visa  $25\frac{3}{4}$   
min. relinquitur  $\frac{1}{4}$  m.; ut hinc apparet, aliqualem inibi  
contigisse Solis Eclipsin, licet quanta fuerit, Origanus  
non notavit, nec, ut existimo, ibidem observavit. At Cl.  
D. Joestelius eandem Wittebergæ se deprehendisse scribit  
2 digit. ferè: Et Lansbergius Goesæ  $2\frac{1}{2}$  digit.; idq; sub eo-  
dem Parallelo, fortè ut Parallaxes Lunæ, ac Diametrum  
Solis, juxta suam tueri possit Hypothesin: Verum cum  
eandem Eclipsin Elevationi Hafniensi accommodat, re-  
perit illam Calculo Uranometriæ suæ pag. 87,  $1\frac{1}{2}$  digit.  
ferè; licet nulla prorsus ibi sit deprehensa, quæ in ullum,  
sive Longomontani, sive quinq; quos sibi testes assive-  
rat, Studiosorum sensum ocularem cadere poterat, cum  
tamen cælum tunc temporis Hafniæ extiterit satis sere-

num. Viderit proinde Hortensius, quâ fronte, dum hanc Eclipsin unâ cum aliis ad confictas Lansbergii Luminarium Hypotheses conatur detorquere, fidem Longomontani tot testibus roboratam ausit in dubium vocare, qui certè unus pervigili suâ apud Dn. Tychonem curâ & industriâ, decennio integro sidera cœlestia pro solida veræ Astronomiæ Restitutione observando, observationesq; dirigendo, plus promoverat, quàm Lansbergius, nedum Hortensius, per omnem eorum vitam. Interim & hoc observandum; Lunam, cum per se corpus opacum sit, quando plenè à Sole illuminatur, Diametrum aliquantò ampliorem; quàm re vera est, observantium exhibere oculis, sicut supra quoq; innuimus, & patet è discursu Longomontani lib. I. Theor. Astr. Dan. pag. 191. Atq; hîc iterum judicent intelligentes, num Hortensius justam in hisce Dn. Tychonem & Cl. Longomontanum carpendi habuerit occasionem? Annon potius, merâ calumniandi libidine tantum, ut Magistri sui voluntati se attemperaret, falsamq; ejus Hypothesin astrueret, utrumq; conviciis fuerit insectatus? quasi hæc de Luminarium Diametris doctrina, præcipua Astronomiæ pars esset; & non illa multò magis, quæ Longitudines & Latitudines Siderum enucleat atque mensurat; quam ferè totam omittit, ut suis se oblectet nugis.

TEXTUS HORTENSII.

16.  
Tycho  
Stellas Fixas minus  
verè re-  
stituit.

**A** Tque ita post Motum Luminarium, eorundem visibiles Diametros apud Tychonem non parum à Cælo recedere vidimus. Superest nunc, ut quæ de Fixis tradidit simili examine perpendamus; in his enim ad Cælestem Normam restituendis, esset maximum impenderit laborem, uti tota Posteritas non invita fatebitur; nihilominus ad absolutam perfectionem accessisse haud censendus est, cum non pauca inveniantur, in quibus accuratior lima merito desiderari potest.

Pri-

Primò enim, etsi Tycho in Epist. Astr. pag. 101. & in Prog. Tom. 1. pag. 219, se loca Fixarum secundum Longitudinem ad scrupulum imò & dimidium scrupuli, restituisse tradat; Longomontanus tamen, earum Locis in Abaco Tychonis Anni 1600, integrum scrupulum detraxit; quanquam extrema (ut ait) diligentia, quæ ab humanâ industriâ unquam expectari debet, fuerit accommodata.

Secundò: in Altitudinibus Fixarum Tycho sibi non ubiq. consentit. In Epistolis enim Astron. pag. 53, assignat Spica Virginis, Altitudinem Meridianam ad finem Anni 1586, 25 gr. & scr. sed tom. 1. Prog. pag. 218, circa ejusdem Anni initium 25 gr. & scr. 55. sec. quæ priori integro ferè scrupulo major est, satis manifesto Observationis vitio. Declinatio enim Stellarum, circa Puncta Æquinoctialia, spatio Anni vix  $\frac{1}{2}$  parte scrupuli immutatur, ipseq. Motum in Longitudinem Annuū, statuit 51 sec.: At qui in Altitudinibus Fixarum integro scrupulo à seipso differt, quomodo potuit earum loca restituere ad partem scrupuli dimidiam?

Tertiò: inter Tychonem & Guilielmum Hassia Landgravium, perpetua inventa est discrepantia, vel 6 scr. in Longitudinibus Fixarum, uti passim videre est in Epist. Astronomicis. Et quanquam Tycho summapere conetur Observationes Landgravii variis de causis suspectas reddere, stat tamen ab eis veritas, docente omnium Observationum consensu, quibus D. Lansbergius loca Fixarum totidem scrupulis proveciora deprehendit, quot Landgravius. Quod ut Exemplo comprobemus, sumamus veram Declinationem spicæ, Anno 1599 ineunte à D. Lansbergio observatam, 9 gr. 1 scr. ejusq. Latitudinem veram 1 gr. quantam & observatio, & Proportio mutationis Obliquitatis Zodiaci efflagitat: Solis item Declinat. maximam 25 gr. 30 scr. Ex his Dedomenis, per Supputationem, innotescit Locus Spicæ, in 18 gr. 19 scr. 9 sec. Libra: sed Tycho ni ad idem Tempus, est in 18 gr. 14.

scr. 18. sec. Longitudo ergo D. Lausbergii, est ; fere scrupulis  
Tychonica major.

Quarto: ipse modus restituendi Loca Fixarum, à Tycho-  
ne usurpatus, non videtur esse absoluta certitudinis. Posito enim,  
Locum Solis præcisè cognitum esse, quod Tycho à suo Solis Mo-  
tu & Obliquitate Zodiaci nunquam fuit sperandum, ut patet  
ex iis quæ suprâ annotavimus: posito quoq; Locum Veneris, in  
Longum & Latum ad scrupulum constare: nihilominus dupli-  
ci de causâ negotium hoc etsi primâ fronte certissimum appareat,  
insidum redditur & inconstans. Una est, quòd ex inventis Di-  
stantiis Stellarum, adhibitis Complementis Declinationum, in-  
vestigatur earum Differentia Ascensionalis: & ex Ascensione  
Rectâ ac Declinatione, Longitudo & Latitudo. in tot enim  
Triangulis, toties supputandis, si Anguli aut nimis acuti aut ni-  
mium obtusi sint; Cruraq; circâ initium aut finem Quadrantis  
versentur, neg. ad ipsa scrup. secunda sibi consent; facillimè a-  
liquot scrupulis aberrari experiunt manifestum est, & à ma-  
gnis Viris dudum animadversum. Notum autem, in Observatio-  
ne non semper occurrere istam commoditatem, ut Crura aut An-  
guli mediocris conditionis eligantur; aut etiam Distantia, ad  
præcisam secundorum scrupulorum subtilitatem acquirantur.

Alterâ causa, est Syderum circâ Horizontem Refractio.  
Hæc enim cum ultrâ 30 gradum (ut mox videbimus) sese exten-  
dat, non sinit Distantiam Solis à Venere, aut Veneris à Fixis, per  
omnia Zodiaci Loca ad scrupulum observare; sed pro variâ Al-  
titudine nunc majorem, nunc minorem Diversitatem inducit;  
& maxime circâ Equinoctia & Solstitium Hybernum. In Ob-  
servationibus autem Tychois, rarissimè captam videas Solis à  
à Venere, aut Veneris à Fixis Distantiam, qua libera sit ab omni  
Refractio; creberrimam verò, infrâ 30 gradum, & circâ E-  
quinoctia ac Solstitium Hybernum: in quibus, etsi per Venerem  
Matulinam & Vesperuinam, se impedimentum Refractionum sa-



tis remouisse arbitretur; earum tamen inconstantia & singulos Dies mutabilis quantitas (ut ipse fatetur Epist. Astron. pag. 97.) non concedit tam precisam aberrationis compensationem ac putauit: praesertim, cum Venus in Observatione ad Fixas, subinde non multum excedat gradum vigesimum, quandoq. etiam infra consistat: in quo situm quis Tycho non regerat, quod Rhotmano semper obiebat, nimirum, cum Refractionem in Stellis humilioribus, non satis praecauisse?

Tutius sanè loca Fixarum cum Landgravio per Transistum per Meridiem, aut cum Veteribus per Lunam restituere potuisset, si quidem Motum Lunae benè habuisset exploratum. Modum enim per Venerem, nihilo certior, imò maiori intricacioni obnoxius est, quàm per Lunam: quo ut simpliciore Veteres & D. Lansbergius non sine summâ Ratione usi sunt. Illi quidem ad unum omnes, loca Stellarum suo tempore indagatum per Lunam Appulsus, ut patet ex lib. 7. Magni Operis Ptolemai, cap. 3: Hic verò, postquam Cursum Lunarem Caelo consonum fecit: longè maiorem fidem ei deferens, quàm Veneri; praecipuarum Fixarum in Zodiaco loca non tantum nostro seculo emendauit, sed & Veterum temporibus ita attemperauit, ut eorum Aetate, veritati, Caelog. planè consentiant, & Modum restituendi per Lunam, mirificè commendent.

Quintò: Refractiones Fixarum Tycho non satis altè extulit. Quas enim vicesimum gradum non transcendere, Experientia didicisse in Scriptis suis testatur; easdem ad tricesimum Altitudinis gradum extendi, Rationes Opticae, & Experientia Rerum Magistra edocent. Rationibus Opticis manet immotum hoc Axioma, Radium à quocumq. prodeat intervallo, eandem pati in Medio denso Refractionem: eoque cum Sol penè ad 40 grad. Refractioni subiaceat, necessariò etiam Fixas Opticè consideratas, in parti Altitudine ei esse obnoxias. Quoniam v. Causa Efficiens Refractionis, Physica est, & variis mutationib. subjecta;

amit-

amittunt nonnihil Fixæ de Refractione Solis, tam in Horizonte, quam in aliis Altitudinibus, quia de Nocte, & præsertim hyeme observantur, Sol de Die, & Æstate; quemadmodum hæc à Doctissimo Keplero exensantur Optic. p. 137. Qui propterea non Fixarum tantum, sed & Solis Refractionibus utitur, in Comment. de Motu Martis, pag. 84. 152. & alibi. Hinc ergo Refractio Fixarum in Horizonte, quæ secundum leges Opticas debebat esse ejusdem quantitatis cum Refractione Solis, ob Rationes Physicas, est tantum 30 scrup., & paulo ultra 30 grad. insensibilis: cum Refractio Solis Horizontalis sit 34 aut 34½ scrup. & ad 30 grad. ferè observabilis. Nec tamen idè cum Tychone, pro Refractione Fixarum, in omni situ de Refractione Solis 4½ scrup. deducenda sunt: id enim suo quodam Proposito potiùs videtur facere, quàm quòd ab Experientiâ sufficiente sit edoctus: cum hoc supposito, quòd Refractiones Stellarum non transcendant 20 gr., deductisq. 4½ scr. de Refractionibus Solis, necessariò in tali Altitudine deficient, ut experientiâ patet: cum & ipse aliàs Prog. tom. I, pag. 69, in observandâ Altitudine Poli expresse præcaveri jubeat, ne Stella circumpolares infra 30 grad. Horizonti appropinquent, quo Refractionum in decliviori situ impedimentum prorsus excludatur. Undè manifestò colligitur, non adfuisse constantem Experientiam.

Postquam n. in Bohemiam appulit, invenit Refractionem in Sole quidem duobus scrupulis majorem quàm in Daniâ, cum potiùs debuisset esse minor, uti eam in Hassiâ Rhotmanno apparuisse, multis legere est in Epist. Astron. in Fixis autem, sensibilem in 30 gradu Altitudinis. Nam in Arce Benaticâ, cum Anno 1600, Observationes continuaret, 3 Februarij, post observatum Saturnum, invenit Altitudinem Meridianam Spicæ Virginis 30 gr. 41 scr. 30. sec. quam fatetur debuisset esse 30 gr. 40 scr. 37. sec. integro scrupulo minorem: vide Observat. Hassiacas W. Snellii, pag. 75. Quo Experimento & priores in Daniâ Observa-



servationes refutavit, & in Bohemiâ Fixas in 30 gradu 1 scr. proximè refringi, ostendit: ut nullum dubium sit, quin ejus Tabula Refractionis Fixarum, longissimè à Cælestibus Apparentiis distideat.

Præterea, ne uni tantùm Experientiæ hanc Reminuti putet, invenit D. Lansbergius Spicam Virginis Refractioni obnoxiam esse, in Observationibus P. Hajnzellii, Copernici, Tycho-  
nis, & suis. Locum enim ejus, ad constantem cæterarum Fixarum Promotionem, debitâ præcisione reducere nequit, nisi variam in dictorum Autorum Observationibus Refractionem, pro diversa Altitudine Poli, consideret. Et quanquam Refractionis circâ 30 grad. certa quantitas, intra  $\frac{1}{2}$  scrup. non facile queat definiri, quod etiam Tycho monet Epist. Astron. pag. 136: deprehendit tamen ex collatione Observationum, Geggingæ seu Augusta Vindelicorum, & Praga, Spicam refringi 1 scr. proximè; Goesæ 1 scr. 30 sec.; Uraniburgi 3 scr. circiter; Fruenburgi 2 scr. 30 sec.: unde liquet, Tychonem nullâ Ratione aut Observationum certitudine, Refractionem Fixarum tantùm ad vicesimum Altitudinis Gradum extendere.

Assertâ igitur Altitudine Refractionis Fixarum; facile judicari potest, quid de illarum locis sentiendum sit, quæ infra 30 gradum, in Daniâ sunt observata: quo pacto Cælo convenire queant, quæ per Distantias & Triangulorum Calculum, tam in Fixis quàm Planetis Tychonici exstruxerunt: & annon ob perpetuum Refractionis impedimentum irrita ferè reddita sint, quæcumq; in decliviori situ observabantur.

Sexto: Motus Stellarum Fixarum quem Tycho prodit, non est Cælo consentaneus. Nam uti Motus Solis, ita & Fixarum, ob Reciprocationem Sectionum Equinoctialium, manifesta inæqualitati obnoxius deprehenditur: quæ si negligatur, non potest assignari Motus, qui omnibus sæculis respondeat. Occurrit illud in Numeris Tychonicis: in quibus loca Fixarum Cælo non

M

con-

congruere, vel hi 29 Anni ab earum Epilogismo elapsi, in Spicâ Virginis testantur. Observavi n. circa initium hujus Anni 1630 aliquoties, Altitudinem ejus Meridianam 29. gr. 22. scr. ferè: quæ si ex Sententia Tychonis absq. Refractione usurpetur, & ab Elevatione Equatoris Middelburgensi 38 gr. 29 scr. subtrahatur, relinquit Declinationē Spicæ Australē 9 gr. 7 scr. Assumatur jam Declinatio Solis maxima, juxta Tychonis Hypotheses 23 gr. 31½ scr. Latitudo Stella 1 gr. 50 scr. & veniet locus ejus per Ratiocinia Triangulorum in 18 gr. 31 scr. Libra; cum tamen Abacus Tychonis prodât 18 gr. 41 scr. ferè; ut ita Observatio nostra, ad Hypotheses ejus accommodata, 10 scr. differat ab illius loco: & Motum Fixarum longa majoris tarditatis arguat, quàm ipse putavit.

Quòd si juxta Hypotheses D. Lansbergii, ab Altitudine Spicæ 29 gr. 22 sc. auferas 1 scr. 30 sec. pro Refractione; & verâ Declinatione 9 gr. 8½ scr. cum verâ Latitudine 1 gr. 58 scr. necnon Declinatione Solis maximâ 23 gr. 30 scr. utaris; invenies 18 gr. 38 scr. Libra: qui est locus Spicæ verus, unico tantum scrupulo differens à Tabulis D. Lansbergii, quod per Refractionum inconstantiam faciliè excusatur.

#### REFUTATIO.

**Q**uid veri priori hujus Transitionis Hortensianæ parti infuerit, è præmissis Benevolò Lectori relinquitur æstimandum: Restat nunc, ut etiam posterioris Vanitas brevissimis ostendatur.

**I.** Itaq; , quod fundamentum Restitutionis Fixarum attinet, jecerat quidem Dn. Tycho lib. I. Progymn. cap. 2. accuratatione & labore incredibili, illud satis firmum ac stabile, maximè ab Observatione Stellæ Veneris interdiu cum Sole, ( ut liquet pag. 165. & seqq. idq; juxta Solis Motum prius à se restitutum. Longomontanus verò easdem, in Canone Longitudinum, integro minuto in Antecedentia reposuit, postquam plerisq; D. Tychonis

nis

nis in Sole Observationes generali Examini subiecisset; cujus sui facti rationem ipsemet reddit lib. 1. Theor. Astr. Dan. pag. 46. & 62; in cœteris, Stellarum respectu, nihil alterare præsumens.

Quod autem Hortensius hanc Stellarum Restitutionem multorum Annorum pervigili curâ, & sumtu incredibili, à Dn. Tychoe exantlatam, ideò improbare satagit, quòd discrepantiola quædam semissis unius minuti in Observationibus earundem, per plura organa, ut docuit, habitis & limitatis, quandoq; occurrat, in eo apud intelligentes, cum Dn. Tychonis industriam, tum sui ipsius in observando prodit inscitiam. Nam dum alii præstantes viri, tantam Dn. Tychonis circa Canonem Fixarum perpetuo posteritatis bono conditum, diligentiam gratissimo anima agnoscunt; Hortensius in extremis minutis ansam Calumniandi quærit; ut optimè à Dn. Tychoe constitutorum laudem, suo Lansbergio, quovis jure injuriæ vindicare possit. Cœterum, cum hæc Fixarum Restitutio Hortensio minus placeat, adeat Ptolemæi Abacum, adhæreatq; Hipparchi & Veterum observatis, eaq; cum Dn. Tychonis conferat; videbit Cœlum ita pro Dn. Tychoe pugnare, ut & ejus innocentia, & illius in ipsum ingratitude toti mundo futura sit conspicua.

2. Cum Observatio Altitudinis meridianæ Spicæ Virginis circa initium & finem Anni 1586. (si utrobique cum exiguo motu Stellæ interea fuerit reconciliata) vix det differentiā 7 m. quæ ascribenda est, non Temporis prioris, ob fidem omnium instrumentorum collationem, sed potius posterioris Observationi, ut proinde tam scrupulosus frustra hic etiam extiterit Hortensius.

3. Incassum etiam laborat, prærogativam Obser-

servationum Lantgravianarū præ Tychonicis, propter discrepantiolam quinq; vel sex minutorum, Autoritate Lansbergii astruere: Neq; enim hic, sive declinatio Spicæ Virginis, sive reliqua, ad eandem semel, fortè in solâ Altitudine hujus meridianâ à Lansbergio observata, unquam apud intelligentes præponderare poterunt iis, quæ toties à Dn. Tycho ad eandem Stellam sunt animadversa. Quin nec ipse Illustrissimus Lantgravius, aut ejus Mathematicus, D. Rothmannus, unquam se Tychonicæ Fixarum Restitutioni opposuerunt, postquam intellexissent eam tot infallibilibus observationibus, tam ex Venere à Sole, quam aliis Stellis inter se collatis, inniti, ut liquet è toto capite 2. lib. I. Progymn. D. Tychonis; ubi fundamentum Restitutionis Fixarum maximo positum est labore.

4. Affert hic Hortensius, præter Motum Solis, quem existimat se in superioribus demonstrasse minus rectè à Dn. Tycho, ad hæc etiam secula restitutum; (quo tamen Crimine nos ipsum supra quoq; liberavimus) alias duas causas, cur existimet Fixarum Restitutionem ab eodem peractam, absolutæ non esse certitudinis: quæ tamen ambæ ita à Dn. Tycho sunt eliminatæ, ut isti negotio parum aut nihil obesse potuerint. Nam primò, quòd existimet Hortensius Calculum, ab obliquo siderum in distantis capiendis ad invicem positu, reddi incertiorẽ; id etiam D. Tycho Studiosè attendebat & cavebat, & proinde etiam, neq; Solem cum Venere, nec Stellas, nisi ad ductum Eclipticæ aut Equatoris, in quantum fieri poterat, voluit observari (exceptis Cassiopææ Stellis, & nonnullis aliis, ex solis distantis vice versâ restitutis; quod certè improbari non potuit, in primis in distantis præcisè acquisitis) sicut cum alibi, tum in tribus  
sche-

schematibus pag. 196. & seqq. lib. I. Progymn. Tychonis, ubi fundamentum Restitutionis Fixarum luculenter est expositum, perspicere potuisset Hortensius. Deinde, ut Refractiones siderū in locis Horizonti vicinioribus declinaret Dn. Tycho; semper in tali situ ita observationes attemperabat, ut Stellæ in distantis observandæ parem quàm proximè altitudinem supra Horizontem obtinerent. Et certè, cum ejusmodi distantia in illis versâ vice habitæ, & postea Calculo subductæ, eundè ignotæ Stellæ locū satis præcisè determinarent; exinde & instrumenti sufficientia satis arguitur; & utraq; Hortensii difficultas eliditur, ut hisce amplius immorari non videatur necessum. Verum, si rectè conjicio, tota hæc Hortensii suspicio inde oritur, quòd observationum praxi non sit assuetus; nec satis attentè illa legerit, quæ de hac re habet Dn. Tycho cap. 2. Progymn. Alias enim, nec Transitum Fixarum per meridianum, propter incertum Temporis momentum; nec Restitutionem Stellarum mediante Lunâ, ob inevitabilem Parallaxeos intricacionem, pragmatia Tychonica prætulisset. Cœterum, cum etiamnum cœlum Hortensio pateat, quæso, per hosce tutiores modos, nempe Transitum Stellarum per meridianum, sive ipsam Lunam; vel utrumq; simul; denuò Fixas nobis restituat, ut de re tanti momenti posteritas dijudicare poterit.

5. Movet hic quidem Hortensius scrupulum de Refractionibus Siderum, ut Dn. Tychonis Experientiam suspectam reddere, & incertitudinis arguere possit; sed irritò planè conatu; cum illæ solâ constant experientiâ; & rationem Opticam, seu potius Physicam, Kepleri & aliorum eludant, siquidem non negatur, Solem majores & continuatiores præ Stellis Fixis habere Refractiones.

Cumq; D. Tycho primus Refractiones Siderũ per Observationes suas adinvenit, ut apparet lib. I. Prog. p. 91. & c. & alibi passim; idq; maximo Astronomiæ restituendæ bono, in primis quoad Veterum observata, hisce implicata, rectius usurpanda; certè non poterat aut debebat Hortensius ullo jure, huic Dn. Tychonis Experimentiæ (quam habuit Uraniburgi in Daniâ, ubi Observationes factæ, & Stellæ restitutæ sunt) se opponere. Sed cum in more habeat Hortensius, ubiq; Nobilissimi hujus Viri estimationi detrudere; etiam hic illud proverbiale implere voluit: Calumniare audacter, semper aliquid adhæret. Interea tamen, cum Refractiones, non tantum ex Aeris inæquali crassitie, sed & temperie in diversis Regionibus diversa dependeant, nemo mirabitur easdem in dissitis locis alias atq; alias esse, imò in iisdem quandoq; licet variatio ista per exigua sit inæqualis, juxta Temporis Anni vicissitudines. Quòd verò Hortensius hîc ab experientia Lansbergii inter alia, Refractionem Spicæ Virginis, in Altitudine meridiana Uraniburgica, 3 min. circiter comminiscatur; id vix ulli unquam persuadebit, ei in primis, qui Dn. Tychonis circa hanc rem noverit industriam, & inter alia Organâ, maximas illas Armillas Æquatoreas, in Refractionum mensuram & discerniculum potissimum constructas, & in usum directas, Uraniburgi coràm tractaverit: Neq; enim unam Spicam Virginis in tali Flexatione; sed & plurimas alias, in altitudine circiter 20 grad. omni sensibili Refractione in eo loco carere, certissimis deprehensum est Experimentis. Quòd verò alibi Dn. Tycho à Stella Polari, vel aliis infra Polum ad 30 grad. non exaltatis, abstinendum judicaverit; causâ esse poterit, quòd Refractiones Siderum

rum nondum satis exploratas habuerit, & quòd coelum infra Polum, semper sit majore aeris crassitie op-  
plerum.

6. Ultimâ hâc hujus invektivæ Præfationis incusa-  
tione ostendere conatur Hortensius, Tychonicam Fi-  
xarum Restitutionem, ad omnia Tempora extendi  
non posse, quòd inæqualem Æquinoctiorum Præcessio-  
nem neglexerit; imò, ne uni seculo respondere; quod  
iterum probare intendit ab exemplo Spicæ Virginis.  
Verum cum prioris illationis ratio eadem sit cum illa,  
de Motu Solis medio, ea hîc ulteriore non eget refutatio-  
ne. Et licet Dn. Tychoni propositum non fuerit, Mo-  
tum Solis, unde reliquorum Siderum cursus depen-  
dent, omni Tempore; sed tantum quatuor seculis  
proximis accommodare, uti videre est libr. I. Progym.  
pag. 219. 256. & alibi: Interim tamen, quoniam Fi-  
xæ uniformiter moventur (si modò moventur) ideò  
etiam vera Æquinoctiorum Præcessio ad quodvis ob-  
latum tempus, singulis ritè applicari poterit; post-  
quam earum loca, singulari Dn. Tychonis curâ, cum  
pari Astronomiæ commodo, sunt verificata: id quod  
addere libuit propter imperitiores, ne ab Horten-  
sio seducti, existiment tam laboriosam & sumtuo-  
sam Fixarum Restitutionem, sequentibus seculis, fu-  
turam inanem ac inutilem, nisi denuò Lansbergii ope-  
ra accesserit.

Altera Hortensii ratio, desumpta est ab Altitudi-  
ne Meridiana Spicæ Virginis, quam sub initium An-  
ni 1630, Middelburgi observarat 29 grad. 22 min. ferè:  
unde dupliciter Longitudinem ejusdem Spicæ inquir-  
it, primum juxta Tychonis dedomena, absque Re-  
fractione; deinde Lansbergij, adhibitâ Refractione  $1\frac{1}{2}$  m.  
ubi



ubi scopum in 2 $\frac{1}{2}$  m. propius attingit, juxta motum Spi-  
 cæ in Annis 29. At si hæc Observatio, per unicum Qua-  
 drantem facta, rectè æstimetur, & cum exactissimis Dn.  
 Tychonis Observationibus multipliciter ad eandem Stel-  
 lam habitis ut liquet lib. 1. Progymn. pag. 218. & anteced.  
 conferatur, nihil pensi habebit. Fallitur etiam Horten-  
 sius, si existimaverit se ex declinatione Spicæ Virginis ob-  
 servatâ, & Latitudine tanquam cognitâ præsuppositâ, ita  
 hujus Stellæ Longitudinem, paucorum annorum inter-  
 vallo venari posse, ut exinde veram Stellarum in conse-  
 quentia, successu Temporis, prorogationem elicere que-  
 at; quodcunq; tandem adhibeat cum Lansbergio fig-  
 mentum, sive in Refractione excogitandâ & eliminan-  
 dâ; sive Latitudine Stellæ, aut declinatione Solis maximâ  
 indebitè minuendâ: Nam talis pragmatia, dum circa  
 minima oocupatur, facilè errorem inducit; non secus  
 atq; olim Hipparchi Experientia ad eandem Spicam Vir-  
 ginis in Eclipsibus Lunæ apud Ptolemæum lib. 3. Almag.  
 cap. 2, his verbis: Per quosdam defectus Lunæ propè  
 Stellæ Fixas factos, computavit Hipparchus, quantum  
 Stella, quæ Spica vocatur, in singulis Annis Autumna-  
 nale punctum præcedit, & per hoc arbitrabatur invenisse,  
 quod aliquando in vitâ 6 gr. 30 min. ad summum; ali-  
 quando 5 gr. 15 m. distantia ejus fuerit. Nequit igitur tar-  
 dissimus Fixarum Motus absq; longiori Temporis inter-  
 capedine rectè enucleari, riteq; constitui; quod etiam  
 consideravit Dn. Tycho lib. 1. Progymn. pag. 253. & seqq.  
 Verum cum ipsemet rationem inæqualitatis Sectionis  
 Æquinoctialis non habuerit, & medium insuper morum  
 Fixis paulò concitatiorem attribuerit; ideo etiam Lon-  
 giori temporis intervallo aliquid Erroris earum Motui  
 inducitur, licet non tantum, ut per 29 Annos fiat 10 m.

ut vult Hortensius; sed vix  $\frac{1}{2}$  min. At si Lansbergiana Fixarum Restitutio ab hac Stellâ incipiat, ejusq; Longitudo sit 6 min. Tychonica provectior, qualis ab Hortensio circa hujus de Fixis disquisitionis initium est asserta, cur quæso eandem temporis Motus hujus differentiam non retinet? Verum cum jam satis demonstrata sit, et jam hujus accusationis Hortensianæ nullitas; ad sequentia progrediamur.

#### TEXTUS HORTENSII.

**E**Thac quidem præcipua sunt, Amice Lector, quæ de Astronomiâ Tychonica dicenda habebam: quæ si debito modo recum perpenderit, judicium ferre potes, an Tycho Brahe cum Affectis, Astronomiam nitori suo, ut vulgò fertur, perfectè restituerit. Nobis quidem, non modò eam non restituisse, visus est, sed etiam hæc Viâ ne potuisse quidem restituere: eisi enim Observationes certissimas obtinisset, tamen quia eas non contulit cum Observationibus Veterum, non potuit Universalem Astronomiam condere, suamq; Restitutionem ad omnia secula extendere. Id enim imprimis Astronomo propositum esse debet, ut sine respectu ad Veteres, nihil concludat; sed in Harmoniâ Motuum constitutendâ (ut monet Doctissimus Rheticus in Narratione ad Schonerum) Musicos imitetur; qui chordâ unâ vel extensâ vel remissâ, cæterarum omnium sonos, tamdiu summâ curâ & diligentia adhibita, formant & attemperant; donec omnes simul exoptatum referant Concentum; neq; in ullâ dissoni quicquam annotetur. Quod tantum abest ut Tycho cum suis observaverit, ut contra, Veteribus exclusis aut solio deturbatis, solus Regnum obtinere, & quasi nulla antea Astronomia fuisset, à suis Observationibus incipere quaesiverit; universum Terrarum Orbem instrumentorum fastuoso Apparatu occacans: adeòq; hæc unicâ Re neglectâ, aliquandò, si modò (ut ait Rheticus) vera fateri animus est, totius Astronomiæ Ruinâ metuenda fuisset; nisi

17.

Harmonia Motuum cœlestium  
Lansbergiana cōcinnior  
Tychonica.

*singulari Dei Providentiâ D. Lansbergio melior via aperta fuisset, & in Restitutione Astronomia usurpata.*

*Is enim, Veteribus omnem honorem hætenus detulit; Observationes eorum non rejecit, sed pro summâ ipsorum Scientiâ & Industriâ, fide dignissimas reputavit: & consideratis omnibus, suas ita accommodavit, ut perfectissimum Consentum è concordis inter se compositis eliciens, absolutam Astronomia Restitutionem, labore verè Herculeo, affectus sit. Fecit idem Prolemaus in Observationibus quæ ante eum conscriptæ erant: Fecit & Copernicus, qui omnium Astronomorum Observationes ante oculos habuit: sed contrâ malâ fide, quæ Proposito suo serviebant recepit, alias neglexit. D. Lansbergius autem, ne unam quidem omisit, sive à Veteribus, sive à Recentioribus Astronomis obtentam; sed omnes, ad unam eamq. jucundissimam Harmoniam reduxit.*

#### REFUTATIO.

**E**T hæc quoq; præcipua sunt, Amice Lector, quæ pro defensione Astronomiæ Braheanæ simul & Danicæ, adversus præcipuas Martini Hortensii Calumnias (nam eas consultò præterii in quibus hic homo omnes verecundiæ fines pertransierat, qualis illa est, quæ Criminetur. 13. pag. seqq. : *Sed datum est in illis (Cometis) examen posteritatis subterfugere, & Parallaxes adscribere pro lubitu &c.*) reponenda volebam; quæ si tu etiam hîc debito modo tecum perpenderis, facile judicium feres, quo loco hæc in Nobiliss. Dn. Tychonem & Cl. Longomontanum, Astronomos incomparabiles, concinnatæ Calumniæ sint habendæ. Nihil enim, fastuosis illis Conclusionibus, super Præmissas tam frivolas extructis, aliud hætenus quæsi visus est Hortensius, quàm ut Generosiss. Tychonem Brahe, Virum, si quis unquam alius, de Astronomia optimè meritum, omnibus, etiam iis, quibus hætenus in  
magno

magno honore ac æstimatione fuerit, invisum ac suspectum reddere, eiq; Lansbergium, tanquam singulari Dei providentiâ Astronomiæ restaurandæ natum & datû, temerario suo iudicio in omnib<sup>9</sup> præferre possit. Sed cum de hoc ipsius conatu plurib<sup>9</sup> in Proœmio egerim, hic copiosior esse nolo: Tantum verbulo Lectorem commonefaciam, ne sibi imponi patiatur ab Harmoniâ illâ cœlestium, non Pythagoræa in orbibus; sed Lansbergiana in Siderum Motibus, cui Hortensi<sup>9</sup> pleno Rhetici ore acclamat: Cum certus sim illam intra pauca secula sonos editurâ satis dissonos, nisi denuo chordæ ad observata D. Tychonis, quæ nunc tam temerè rejiciuntur, in hac, non Lansbergiana, sed vera cœlesti symphonia fuerint tensæ, & ritè ac discretè Veteribus accommodatæ. Nam quem, per paucorû Annorû Apparentias, Lansbergius, ex Observationib<sup>9</sup> qualibuscunq; etiâ aliunde emendicatis, & Refractionû vicio laborantibus, hoc tempore introducere conatur, concentû, quemq; Hortensi<sup>9</sup> perfectissimû vocare non dubitat; is mihi crede, subsecuturis seculis manifestam abibit in dysphoniam; ut vel sic posteritas tandè intelligat, qua providentiâ divinâ, vel potius, quo fastu astuq; , Lansbergio melior via fuerit aperta, & in Restitutione Astronomiæ usurpata. Nolo hîc odiosè exagitare crimen, quod falsò D. Tychoni affingitur ab Hortio; ac si ille, Veterib<sup>9</sup> exclusis aut folio decurbatis, solus Regnum obtinere; & quasi nulla antea Astronomia fuisset, à suis observationibus incipere quæsierit; universû Terrarum orbem Instrumentorû fastuoso apparatu occæcans: quam ejus assertionē, veritati non esse consentaneā, vel hinc quivis, nisi cum Hortensio cœcutiat, facile perspicere poterit; quòd Dn. Tycho, tanquam Astronomus periclitissimus optimè noverit, medios Siderum Mo-

tus ad cuncta secula extendi non posse, absq; Veterum observationum adminiculo; ut proinde illos excludere nec potuerit nec voluerit. Adhæc, tantum abest, ut Mundus instrumentorum Apparatu quiverit occurrari, ut potius multis modis illo sic illustratus, dum ejusmodi Organa Uraniburgi per viginti duos, aut amplius, Annos, strenuè usui, diu noctuq;, fuerint accommodata; veluti totidem Annorum in Planetis & Fixis observationes luculenter testabuntur, ubi lucem aliquando viderint; de quâ re etiam supra in Proœmio ad Lectorem pluribus est dictum; Unum hic præterire nequeo, quod vel solum Calumniam hanc Hortensianam eludet; idq; Stelliburgo Hvenensi primitus à Dn. Tychoe inscriptum; post etiam libro I, Epist. Astron. 242. insertum, ita habet: Astronomiam Scientiarum omnium antiquissimam & præstantissimam, diu quidem multumq; cultam, nondum tamen satis solidè constitutam, aut à mendis vindicaram animadvertens, ei instaurandæ perficiendæq; varia eademq; exacta adinvenit construxitq; Organa, ad omnimodas cœlestium corporum observationes sufficientia, labore, diligentia, impendioq; incredibili &c. Quibus verbis, Nobiliss. ille Vir, & Astronomus incomparabilis, ita mentem suam, cum erga Veterum Astronomiam, tum instrumentorum Apparatum necessario introductum exponit, ut pro hisce Hortensii Phlyariis refutandis, verbum amplius addere, fuerit superfluum.

#### TEXTUS HORTENSII.

18.  
De Motu  
Terræ in  
Eclipti-  
ca; Itē.

**Q**uoniam verò Astronomia aut Quiesci, aut Motui Terra in-  
adificanda est; voluit Libellum hunc de Motu Terra quasi  
Prodromum esse, integri Operis Astronomici quod sub manibus  
habet: cumque is Belgico Sermone conscriptus atq; editus esset,

& ob singularem utilitatem, dignus videretur, qui non Belgis <sup>plici cælo</sup>  
tantum, sed & Exteris apud quos Regina Astronomia suis ho- <sup>Lansber-</sup>  
nos est, communicaretur; non potui, quin meâ qualicunq; opel- <sup>giano.</sup>  
lâ Astronomis prouiderem, vertendo eum in Sermonem Latinum.  
In quo tamen cā libertate versatus sum, ut non Verbum Verbo  
curarim reddere, sed ad mentem præcipuè Autoris, & ipsam  
Materiam, qua maximâ ex parte Astronomica est, respexerim.

Continet autem duo veluti Fundamenta Astronomia Re-  
stituenda. Primum est de Motu Terra, alterum de verâ  
Mensurâ Sphærarum Cælestium. Quantum ad Motum Terra  
attinet, de eo multi hæcenus multa probabiliter disputarunt;  
nemo, quod hic sit, Scientificè quicquam demonstravit: duobus  
enim Argumentis Autor Motum Terra Annuum Insuperuixit ad-  
struit. Primo, à Motu Luna, qui sine Motu Terra Cælo consen-  
taneus fieri nequit. Etsi enim Ptolemæus Apogæum Luna in  
Antecedentia Signorum, & Centrum Epicycli in Consequen-  
tia, hæc lege moveat, ut linea mediî Motus Solis totâ Lunatione  
intermedio versetur loco, & sic Lunam proximo Nouilunio sub  
Solem reducat; non tamen eo Motum Luna Cælo consonum fa-  
cit. Nam motus iste Lineæ Augis, fictitiuſ est, & in Cælo haud  
conspiciuus; tam & Centrum Epicycli in Quadraturis contrâ  
Testimonium Observationum, nimis appropinquat Centro Ter-  
ra; ac deniq; Motus Luna in suo Orbe permiscetur cum Motu  
Solis in Eclipticâ, quod absurdissimum est; neq; in Motu Luna in  
suo Orbe locum habet, sed in Motu ejus per Zodiacum, ut ipse ait  
lib. 4. Magni Operis cap. 3. Inspice Schema Eras. Oswaldi in  
Comm. in Peurbachium, pag. 50. & absurdum primâ inspectione  
ipse deprehendes.

Præter effugium hoc in Hypothesibus Ptolemæi, nihil reli-  
quum est quod Argumentum queat infringere: id a. neg. à me,  
neq; ab ullo quod sciam Mathematicorum, in Motu Luna ante D.  
Lansbergium animadversum est: cum tamen, irrefragabile

*Sic, apud omnes, qui Fundamenta Astronomia penitus inspicere.*

*Alterum Argumentum sumit Autor à Motu aliorum Planetarum: qui uti ex Motu Solis in Eclipticâ & proprio in suis Orbibus componitur, ita etiam sine Motu Terra Cælo consonus exhiberi nequit, uti latius videre est in Textu. Hoc verò adversus Ptolemaum validissimum, à Tychone per Motum Solis & totius Systematis Planetarum elideretur, nisi is in alia absurda per hanc Positionem impingeret. Cogitur enim admittere Orbium Penetrationem; tum & Spirarum miram involutionem; necnon Deferentem esse minorem Orbibus dilatis; ac deniq; Motum singulorum Planetarum non fieri in uno Circulo, quod absurdum est, & Principiis Astronomia planè contrarium. Ex quibus ut & aliis in Textu, colligitur, Argumentum hoc à Tychonico Solis Motu non infringi; sed aequè scientificum esse ac prius quod petitur à Motu Lunæ.*

*Præter hæc & alia Argumenta, ocularem Demonstrationem Motus Terra ac Luna per Zodiacum præbent Sydera Jovialia, quæ peculiari mensurâ in Tabulâ Sphærarum expressimus. Quis n. aut miretur, aut dubitet amplius, Lunam posse Terram per Eclipticam perpetuò comitari, cum videat Jovem quatuor Comites secum circumducere per Zodiacum; ipsis interim circa eum suas Periodos absolventibus: sed Motu earum in Zodiaco, composito ex Motu Jovis & proprio in suis Circulis?*

*Secundum Astronomia Restituenda Fundamentum, est accurata Cælestium Sphærarum Mensura. Hanc D. Lansbergius ex infallibilibus Demonstrationibus expressit, quas Deo volente, in Uranometriâ brevi editurus est. Nec est quisquam Astronomus, qui non summopere sibi gratulari debeat, quòd hujus Viri Industriâ, vera tandem Cælestium Sphærarum Magnitudo & Proportio innotuerint. Est n. inter Præcipua Astronomi Munera. Domicilii hujus Mundani quòd incolimus, mensuram, Mortali-*  
*bua*



bus manifestare; quò absterſo ab oculis variarum Opiniónũ cæno, clariùs intueantur & mente comprehendant, quæ & quanta Corpora Æterna Dei Potentia ſuprà nos locarit; & per hanc Cognitióne, trahantur in amorem magni illius Dei, qui non hoc Cælum tantùm, ſed & Tertium Hominiſ gratiã condidit, uti Autor pulcherrimè demonſtrat. Inſpice ſodes, Amice Lector, & non ſine delectatione talia, immò majora quàm nunc dico offendes.

In Deſcriptione Secundi Cæli, duo ſunt, quæ ſcrupulum aliquem movere poſſe videntur. Vaſtitas nempe illius Cæli, & ingens Magnitudo Fixarũ. Sed cum illa iſdem Fundamentis innitatur, quibus Menſura aliarum Sphærarum, non puto, quin facile conceſſurus ſis, Cælum Secundum non ſine Ratione in tantam ampli tudinem extenſum eſſe; præſertim ſi attendas, quæ D. Lanſbergius de Uſu ejus pluribus verbis declarat: eſt n. revèrã finitum ſed infinito ſimile; nec poſtremum Argumentum Infinita Potentia Divina. Magnitudo Fixarum per ſuppoſitionem Apparentiũ Diametrorum ex Geometricã ſupputatione deducta eſt: & ſi Diametri minores ſint, erit ipſa quoq; minor. Id verò nos ab Annis aliquot Tubus Opticus (tanta bonitatis, ut omnia conſpicienda præbeat, quæ obſervavit Galilaus) docuit: quo deprehendimus, Stellas Prima Magnitudinis non apparere majores ſextæ parte unius ſcrupuli: unde patet eas longo minores reddi, neque abſurdum ullum magnitudine ſua ſecum trahere.

In cæteris, Autor Lectori plenariè ut ſpero ſatisfaciet, ſi modo omni præjudicio depoſito, Argumenta ad Trutinam Veritatis examinet: quo factò, ſolido hujus Hypotheſeos Fundamento, reliqua ab illo ſuo tempore in lucem edenda, ſine ullà difficultate ſuperſtrudere poterit.

Parat autè editionẽ Uranometria, ſicut in hoc Libello non ſemel promittit: in quã veras Solis, Luna, & aliorum Planetarũ à Terrã Diſtantias, unà cum Obſervationibus ex quibus deductæ ſunt, Lectori exhibebit. Parat item Aſtronomiã novã, ex omniũ

*Temporum Observationibus exstructam, & cum omnium Seculorum Observationibus consentientem: Tabula jam supputata sunt, Observationes inter se collata, Demonstrationes Geometricæ additæ; nec quicquam desideratur, quàm ut in ordinem redactæ, Publico Usui consecrentur. Parat denique Theorias Planetarum exactissimas, & in omnibus Planetis ferè sibi similes: quæ non modò præ aliarum Obscuritate, ob quam meritò non pauci ab hac pulcherrimâ Doctrinâ absterrentur, clara sunt & perspicua; sed præcipuè Observationibus omnium Astronomorum prorsus consentanea: & has Autor successivè perficere & ad umbilicum deducere incipit: tu modò benigne Lector, labore ejus precibus apud Autorem omnis boni Deum adjuva; ut Astronomia nitore suo tandem restituta, tibi, mihi, studiisque omnium bonorum, eos fructus adferat, quos ex perfectâ hujus Artis Restitutione in Rempublicam Literariam scis reddituros. Vale amice Lector; & hæc festino calamo ad te perscripta, æqui bonique consule.*

#### REFUTATIO.

**H**Actenus fuit Specimen Eximii illius Profectus Hortensii sub Lansbergio facti, quo totam Astronomiam Brahæanam, si non ad Examen veritatis vocare; at in Calumnias rapere valuit & voluit: ut vel sic ostendat, quàm belle noverit, & aliorum laudabiles taxare labores, & falsarum laudum præconem agere. Cui instituto ne quid desit, post jacta in Dn. Tychonem convicia, in Lansbergium verò encomia varia; deinceps commentationes ejus in Motum Terræ diurnum & Annuum, quas pro Astronomiæ Prodromo agnoscit, pleno ore laudare incipit; de quibus paucis meam sententiam aperiam.

Cum Commenta ista Lansbergiana, ut plurimum, de triplici Cœlo, saltem ex consequentia agant, quorum Primum Astronomiæ; Reliqui duo, considerationis sunt

sunt Theologicæ : Cumq; primo cœlo Lansbergiano Terra etiam includatur, de hâc quæritur: Sicné in Universi medio, ibidemq; quiescat, ut statuit cum Platone, Aristotele, Hipparcho & Ptolemæo Dn. Tycho? An verò extra medium in Ecliptica duplici feratur Motu, juxta mentem Nic. Copernico ab Aristarcho Samio, Nicæto & Philolao informatam, Sole in Centro Mundi existente?

Hanc Controversiam diu multumq; inter Astronomos ventilatam, solus Ph. Lansbergius, pro acumine ingenii sui, duobus Argumentis se dirimere posse putat, iisq; scientificè, ut ait Hortensius, Motum Terræ demonstrare. Unum ducitur à Cursu Lunæ; Alterum à Motu reliquorum Planetarum circa medium: Quæ tamen ambo, vix unius sunt facienda flocci; cum hoc in confesso fuerit, Tychonicam mundi Hypotyposin, meram esse Copernici inversionem. Nam circa primum, de Luna; mirari meritò quis poterat, quî fiat; quòd cum orbem Lunæ Eclipticæ homocentricum, Lansbergius agnoscere necessum habeat, Tellure in medio existente, reliqua, quæ orbi Lunæ, (præter exiguam ejus in Latitudinem declinationem) rectè quoad visum nostrum accidunt, videlicet Motum Apogæi Lunæ, item medium Periodicum, & medium Synodicum Solis respectu, ad Eclipticam referri ignoret?

An igitur hæc demonstratio adeò sit *Παρανομή*, ut propter illam Terra cum Lunâ Eclipticam necessariò occupare debeat, in quem finem etiam bipartita illa schemata infra pag. 18. & 19. sunt delineata: equidem aliis relinquo æstimandum. Certè postquam Ego istas evolvissem paginas, demonstrationisq; vim percepissem, sa-

tis demirari nequivi, tam eruditum senem hic adeò in-  
 tire, ut quid discriminis inter *ἡμετέριον καὶ κοινόν* inter-  
 fit, non observavit: Licet fortè illud minus mirum  
 esse poterit, ei præsertim qui attenderit, quâ ratione  
 jam olim in suâ Cyclometriâ nobis persuadere conatus  
 fuerit, Circulum Minorem non prorsus eandam serva-  
 re proportionem cum Majore, quoad Circumferentiam  
 & Diametrum.

Alterum Argumentum, quo probare vult cum Lans-  
 bergio Hortensius; Solem medium universi; Terram  
 verò Eclipticam occupare, à penetratione Orbium in  
 Motibus Planetarum deductum, jam olim à Dn. Tycho-  
 ne in doctrinâ cœlestium Cometarum protritum est, va-  
 lidissimèq; ostensum; ejusmodi Orbes in rerum naturâ  
 non existere; & proinde talem penetrationem non esse  
 pertimescendam: itaq;

*Non sic Hortensi Tellus tibi scandit in astra;  
 Sed manet in Medio divinâ Lege quæta.*

Nam & illud sacræ Literæ omni exceptione majores  
 sufficienter evincunt, id quod paucis hic ostendam.

Genes. 1. v. 1. & 2., cum Deus Cœlum & Terram condi-  
 dit, universum hoc sphæræ voluit esse simile; in testi-  
 monium, quòd cætera corpora mundi majora, nem-  
 pe Terra, Sol, Luna, & reliqua Astra sint Sphærica. Jam  
 in Sphæra duo in primis attenduntur, Peripheria & Cen-  
 trum: sicut igitur Peripheria rectissimè cœlo attri-  
 buitur; sic Centrum Terræ primo die creatæ: opor-  
 tuit siquidem primi diei opus Sphæricum suo consta-  
 re Centro, quod Sol esse non potuit, utpote non-  
 dum creatus; & proinde Terram fuisse illud Centrum  
 certum

Definit. 15  
 & 16 Ele-  
 ment lib.  
 1. Euclid.

certum est, nisi tertium quid dare poterit Hortensius. Quod verò tunc Centrum fuit, illud etiam sequenti tempore mansit, cum ejusdem Sphæræ non nisi unum Centrum esse possit. Viderit proinde Hortensius, quâ ratione cum Magistro suo Terram jam triduum in suo loco fundatam ausit, cum Sideribus, quarto demum die creatis in expanso collocare, contra expressam litteram Mosaicam. Idem liquet è Psalm. 104. versu 5., ubi sic ait Spiritus Domini: Fundavit [DEUS] Terram super bases suas ne dimovebitur in seculum & in perpetuum: Quibus verbis peculiare aliquid dicere intendit Spiritus Dei de Terrâ, quod Soli, reliquisq; Planetis attribui nequeat; id autem esse ejus immobilitatem, seu quietem, patet etiam Testimonio Ecclesiastæ, cap. 1. v. 4.; ubi alterationi rerum, & motui Solis opponitur statio Terræ, quæ nulli proinde Motui in Eclipticâ, ut Sol, obnoxia esse poterit. Et hinc patet, quo jure Theologi nostri Terram in medio universi collocent immobilem; quæ etiam in Collatione ad Cælum Fixarum Puncti vix obtinet rationem. At si hic regerere voluerit Hortensius: moveri & circumvolvi non esse idem quod dimoveri, seu à Centro divelli, quod non metuendum in Terra, si maximè ei Motus attribuitur; & locum Ecclesiastæ exponi posse de Apparentia, &c. [quod tamen vix concedi poterit; cum ita nihil singulare Spiritus sanctus de Terrâ dicat, quod non itidem Soli, Lunæ, & reliquis Planetis possit accommodari: Nam & illa inter movendum, à suis Centris non dimoventur: & collatio Textuum expositionem illam manifestè refellere videtur] cur non potius Telluri in Medio universi locatæ, ut jam suprà

ostensum, motum ascribit super proprio Centro tantum  
 diurnum? Cum ita Apparentiæ cœlestes majori Naturæ  
 compendio salvari possint; de quâ relegatur Cl. Longo-  
 montanus lib. 1. Theor. Astronom. Dan. pag. 19. Nam  
 hanc suam censuram olim in Huæna Longomontanus,  
 cum juyenis esset, Dn. Tycho ni coràm significasse se af-  
 firmat; incredibile cæteroquin existimans Stellas Fixas in  
 cœlo, absque orbe materiali, æquali motu proprio cieri,  
 sed potius prorsus à motu quiescere. Præsertim siqui-  
 dem Astronomis quasi in confesso sit, ipsas in dispari à  
 Tellure remotione sitas esse. In quâ opinione postea alii  
 fuere, imprimis vero Cl. David Origanus, velut in Præ-  
 fatione Ephemerid. suarum ostendit. Interim tamen,  
 etiam hoc in confesso est, non tantum apud Veteres quos-  
 dam, & Nic. Copernicum; sed & Tychonem ipsum; So-  
 lem reliquorum quinque Planetarum centrum existere,  
 eodem scilicet cum ipsis creatum, & in expanso colloca-  
 tum dic, Gen. I. v. 14. Quæ cum ita sint, non video quid  
 causæ subesse possit, cur Hypothesis Dn. Tychonis super  
 hisce fundata, non debeat retineri! imprimis, ut vastum  
 illud interstitium inter Saturnum & Sphæram Stellarum  
 Fixarum à Copernico introductum, & in majorem im-  
 menritatem à Lansbergio, dum hic Solem in longè re-  
 motiore à Terrâ, quàm ille, distantia ponat, possit tolli.  
 Neque n. Potentia Dei in hisce visibilibus, tam in immen-  
 sâ illâ amplitudine, ut vult Hortensius; quàm in Siderum  
 à Deo ter opt. maximo ad Terram illuminandam &c.  
 Gen. I. v. 17., creatorum directione & conservatione cer-  
 nitur. Et sic etiam concidit Secundum illud cœlum,  
 quod non è scriptura, sed cœcâ suâ ratione nobis descri-  
 bere conatur Lansbergius, Nam cum Expansum illud  
 Gen.

Gen. 1. descriptum, in quod Sidera sunt collocata, unicum sit, à superficie Terræ ad extimum cœlum visibile continuatum, quod digito quasi Dei factum dicitur Ps. 8. v. 4. (ubi tamen in plurali ponitur propter distincta Sidera eorundemq; Motus diversos,) malè ab ipso in duos dispescitur. Quin nec Tertium cœlum Lansbergianum, quod Homini gratiâ conditum asserit Hortensius, ullum solidum in scriptura habet fundamentum: Nam quantum Textum Paulinum 2. Cor. 12. v. 2. concernit; ibi Apostolus Tertiũ cœlum κατ' ἰσχυρὰ, ponit pro summo & perfectissimo, etiam ipso Calvino teste: Aut si omnino tres hinc sint astruendi Cœli; dico Primum esse cœlũ illud corporeum & visibile ac Sidereum, de quo etiam supra est dictum: Alterum verò esse spirituale & invisibile, quod æque quidem ac primum, creatum; sed non tali loco &c. ut illud, circumscriptum ac determinatum; Angelorum nempè quasi domicilium, Matth. 18. v. 10.; Et beatarum animarum & hominum post hanc vitam receptaculũ, 2. Cor. 5. v. 1. & 2. Apoc. 3. v. 21. Quod etiam Paradisus (Cœlestis) vocatur Luc. 23. v. 43.; & in hoc cœlum raptus fuit Apostolus Paulus, 2. Cor. 12. v. 4. At Tertium, quod & Thronus Dei vocatur, non est creatum, ut vult, cum Lansbergio, Hortensius; sed increatum, ipseq; adeo Deus, quod satis innuit Apostolus loco citato, 2. Cor. 12. v. 2. & vide Apoc. 12. v. 5. præter locum Esa. 66. v. 1. &c. Dicit enim se raptum εἰς τρίτον ἰεγεῖν, quod rectè Syrus vertit; usq; ad tertium cœlum; & non, in tertium cœlum usq; , ut Theod. Beza: aliàs enim scripsisset Paulus; εἰς πρῶτον ἰεγεῖν, ut postea, v. 4.; εἰς ὠκυδηνειον: Paulus igitur in Paradisum, seu statum aut sedem Beatorum raptus, ab ipso Deo, seu Throno & Agno (qui pro eodem poni vi-



dentur Apoc. 7. v. 9. quem thronum Tertium Cœlum. hic vocat.) ἡ κκστὴ ἀρχὴ τοῦ ζήματι. Deus igitur in se, hoc Tertium Apostoli Cœlum est, infinitum, omnipræsens, omnipotens & æternum, quod reliqui Cœli, seu Cœli Cœlorum capere non possunt, 1. Reg. 8. v. 27.; Lux inaccessa in sese, 1. Timoth. 6. v. 16., quæ tamen omnia illuminat, Joh. 1. v. 9., & maximè humilibus ac contritis cordibus se associat, Psal. 34. v. 19. Esa 57. v. 15. ut fidem in eis accendat &c.

Atq; hunc genuinum Verborum Apostoli sensum, mecum proculdubio fatebuntur omnes sobriæ Theologiæ Studiosi, qui non stolidæ Rationis ductu in divinis cœcutientis, sed ipso Dei Spiritu, qui profunda Dei scrutatur, verâq; fide, hæc mysteria cognoscere satagunt;

extra quam noli alta sapere; nam scrutator

Majestatis opprimitur à gloria.

